

BUCHANAN (George)

PARAPHRASIS IN LIBROS PSALMORUM (7749 vers)

Ce texte a été établi à partir de deux éditions de l'oeuvre poétique de Buchanan : celle publiée à Amsterdam en 1641 chez Johannes Iansonium et celle, hollandaise également, parue chez Arnoldus Langerak, en 1725.

Nous avons aussi tenté d'utiliser le texte numérisé proposé par le 'Philological Museum' : mais celui-ci, émaillé d'innombrables erreurs de lecture (quelques vers ou mots omis, mais surtout des centaines de fautes de reconnaissance) nous a très peu apporté, d'autant que les indications sur la métrique des pièces sont parfois erronées.

oooooooooooooooooooo

GEORGII BUCHANANI PARAPHRASIS IN PRIMUM LIBRUM PSALMORUM.

PSALMUS I. BEATUS VIR QUI NON ABIIT IN CONSILIO IMPIORUM etc.

P_1_1	v.1	Felix ille animi, quem non de tramite recto
	2	impia sacrilegae flexit contagio turbae,
	3	non iter erroris tenuit, sessorve cathedrae
	4	pestiferae facilem dedit irrisoribus aurem,
	5	sed vitae rimatur iter melioris, et alta
	6	mente Dei leges noctesque diesque revolvit.
	7	Ille velut riguae quae margine consita ripae est
	8	arbor erit, quam non violento Sirius aestu
	9	exurit, non torret hiems, sed prodiga laeto
	10	proventu beat agricolam. Nec flore caduco
	11	arridens blanda dominum spe lactat inanem.
	12	Non ita divini gens nescia foederis, exlex,
	13	contemptrixque poli, subito sed turbine rapti
	14	pulveris instar erunt, volucris quem concita gyro
	15	aura levis torquet vacuo ludibria caelo.
	16	Ergo, ubi veridicus iudex in nube serena
	17	dicere jus veniet, scelerisque coarguet orbem,
	18	non coram impietas maestos attollere vultus,
	19	nec misera audebit justae se adjungere turbae.

20 Nam pater aethereus justorum et fraude carentum
 21 novit iter, sensumque tenet, curvosque secuta
 22 impietas fraudum anfractus scelerata peribit.

PSALMUS II. QUARE FREMUERUNT GENTES ?

P_1_2 v.1 Quid trepidae gentes vano fremuere tumultu,
 2 minisque populi saeviunt inanibus,
 3 et cum principibus magni coiere tyranni,
 4 Dominumque Christumque Domini adversum truces ?
 5 "Vincula quin horum fortes dirumpimus," aiunt,
 6 "et lora nostris demimus cervicibus ? "
 7 At pater aethereus, rerum cui summa potestas,
 8 ridebit impotentium irritas minas.
 9 Tum justa accensus miseros affabatur ira,
 10 et per furorem caeca consilia suum
 11 turbabit. "Cingamque meum diademate regem,"
 12 inquit. "Sionis jura sanctis collibus
 13 qui dabit, et late fundet mea jussa per orbem."
 14 Deinde allocutus Dominus est me : "Filius
 15 tu meus es, genui te hodie. Me posce, daboque
 16 omnes ut haeres gentium fines regas,
 17 qua circumfuis tellus se porrigit undis,
 18 regasque sceptro sempiternum ferreo.
 19 Cumque voles, tumidosque premas frangasque rebelles,
 20 ut ficta fragili vasa franguntur luto."
 21 At vos, in populos quibus est permissa potestas,
 22 et jus ab alta sede plebi dicitis,
 23 errorum tenebras depellite, discite verum.
 24 Servite Domino cum tremore. Gaudiis
 25 et timor et Domini accedat reverentia vestris,
 26 ut missum ab illo filium amplectamini,
 27 in vos ne justae vindictam exerceat irae,
 28 de calle recti devios. Nam cum brevi
 29 saeviet injustos contra justa ira, scietis
 30 quam sint beati spes in illo qui locant.

PSALMUS III. DOMINE, QUID MULTIPLICATI SUNT ?

P_1_3 v.1 Heu quanta numero viribusque factio
 2 me vexat odiis impiis !
 3 Quam perditorum firma conspiratio
 4 conjurat in meum caput !
 5 Et asseverant spem salutis in Deo
 6 superesse jam nullum mihi,
 7 cum tu sub umbra proeliantem me tui
 8 tam saepe scuti texeris,
 9 cum laudis autor sis meae, cum gloria
 10 meum coronas verticem,
 11 cum nocte Dominus invocantem me suo
 12 de monte sancto exaudiat,
 13 curis solutus et recumbo et dormio,
 14 resurgo liber a metu.
 15 Domino excubante, nec meum formidine

16 pectus movebunt agmina
 17 numerosa, nec si saeva feritas omnium
 18 conjuret in me gentium.
 19 Tu, Domine, in aciem ductor, ut me libereres,
 20 prodibis, hostium omnium
 21 malasque franges, impiorum et conteres
 22 dentes potenti dextera.
 23 At tu, salutis una spes, populum tuum
 24 bonitate solita amplectere.

PSALMUS IV. CUM INVOCAREM EXAUDIVIT ME DOMINUS.

P_1_4 v.1 O pater, o hominum divumque aeterna potestas,
 2 sincerae mihi conscie mentis,
 3 qui mihi consiliique inopi, incertoque salutis,
 4 imploranti rebus in artis,
 5 tutum pandis iter, latumque educis in aequor,
 6 nunc obsesso fraude maligna
 7 da mihi te facilem, et justis bonus annue votis,
 8 non dura placabilis aure.
 9 O hominum caecae mentis, quo meusque relicto,
 10 intenti mendacibus umbris
 11 sollicita in vanas torquetis pectora curas ?
 12 Tandem credite vera monenti,
 13 quem Deus electum miro dignatur honore,
 14 per discrimina cuncta tuetur.
 15 Me Dominus clamantem ad se, auxiliumque rogantem,
 16 mitis et exorabilis audit.
 17 Ergo Dei, miseri, nunc saltem agnoscite numen,
 18 et vitiis absistite pravis.
 19 Vobiscum in tacito per noctem expendite lecto
 20 longi dicta ac facta diei.
 21 Non pecudum fibris Domino sed mente litatur
 22 innocua. Si admoveris aris
 23 hanc, poteris sperare animi securus ab alto
 24 dextra munera larga benigna.
 25 Poscit opes modo degeneres pars maxima vulgi,
 26 haec animos vota una fatigant.
 27 At tu me placido tantum bonus aspice vultu,
 28 aura tui jucunda favoris
 29 me super irradiet. Sat amico te mihi felix.
 30 Alter frugibus horrea stipet,
 31 impleat et multas generoso nectare cellas,
 32 et congesto gaudeat auro.
 33 Ast ego curarum vacuus de nocte recumbam,
 34 et sine sollicitudine somnos
 35 accipiam. Tu securum mihi robore mentem,
 36 tu certa spe pectora firmas.

PSALMUS V. VERBA MEA AURIBUS PERCIPE.

P_1_5 v.1 O potens rerum Deus, aure leni
 2 mitis exaudi mea verba, mentis
 3 mente non dura tetricusque tristes

4 percipe questus.
 5 Adspice attentus, mihi quanta tendat
 6 vox latus. Quando mihi rex Deusque
 7 solus es, solum veneror precorque
 8 rebus in artis.
 9 Mane clamentem, Deus aequus, audi.
 10 Nam tuum casta prece, non inanem
 11 spem fovens, nomen jubar ante Eoum
 12 mane ciebo.
 13 Tu, Deus, laetus pietate vera,
 14 impii ritus scelus exsecraris,
 15 nec frui pravi studiosa mens te
 16 speret amico.
 17 Vis tuos vultus metuit, nefasque.
 18 Hostis es fraudum et cupidae cruoris
 19 caedis. Audacem simulare linguam
 20 falsa recides.
 21 At tua fretus bonitate sacrum
 22 limen accedam, tua templa inibo.
 23 Rite adorabo tua sancta castis
 24 numina votis.
 25 Tu mihi, ut casses fugiam dolosos
 26 hostium, lumen, Deus, aequitatis
 27 dux tuae praefer, dubioque caecos
 28 dirige gressus.
 29 Hostium verum fugit ora, pectus
 30 incolit fraus spurcitiesque, guttur
 31 taetrius putri est, quod hiat recludens
 32 funera busto.
 33 Lingua adulatrix tacito veneno
 34 blandiens caecos meditatur ictus.
 35 O Deus, rerum o pater alme, gentem
 36 perde nefandam.
 37 Redde conatus, pater alme, vanos.
 38 Quique te linqunt, scelerum suorum
 39 sentiant poenas meritas, ab ima
 40 stirpe recisi.
 41 Sed tua semper bonitate tuti
 42 gaudeant qui spem posuere in uno
 43 te sibi certam impavidi, tuumque
 44 nomen adorant.
 45 Namque tu rectos animique puros
 46 larga opum dextra recreas benignus,
 47 et tui, tamquam clypeo, favoris
 48 protegis umbra.

PSALMUS VI. DOMINE, NE IN FURORE TUO ARGUAS ME.

P_1_6 v.1 Dum fervet ira, Domine, dum mens aestuat,
 2 ne me merentem corripe.
 3 Dum saevientis flagrat in cursu furor,
 4 exigere poenas abstine.
 5 O parce, parce. Languor aegrum conficit,
 6 manum salutarem admove.
 7 Corpus, solutis ossium compagibus,

8 enerve vires deserunt,
 9 mentemque graviter maeror angit turbidam.
 10 Quo me usque miserum negliges ?
 11 Quo me usque linques ? Jam revertite, ac libera
 12 aegrum inferum de faucibus.
 13 Ubi saeva duram mors manum iniecit semel,
 14 quis amplius meminit tui ?
 15 Quis mortis alta subrutus caligine
 16 nomen celebrabit tuum ?
 17 De nocte pectus anxium suspiriis
 18 pulsans gemensque lacrimis
 19 lavo cubile. Strata fletuum madent
 20 rorata largis imbribus.
 21 Caligat acies luminum, doloribus
 22 hebetata longis. Hostium
 23 interque risus et dolos emarcuit
 24 color vigorque corporis.
 25 At tu, sceleribus turba gaudens impiis,
 26 facesse, spem pone irritam.
 27 Lamenta Dominus et meorum fletuum
 28 placatus audiit sonum.
 29 Dominus benignus supplicem me exaudiit,
 30 orationique annuit.
 31 Subitus ut hostes obruat pudor meos,
 32 vultusque confundat rubor,
 33 tristi repente ut palleant infamia,
 34 fugamque turpem maereant.

PSALMUS VII. DOMINE DEUS MEUS, IN TE SPERAVI.

P_1_7 v.1 In te salutis spem posui meae,
 2 servator orbis. Faucibus hostium
 3 me libera, qui mente saeva
 4 interitum mihi moliuntur.
 5 Si nemo vindex asserat, ut leo
 6 imbelle crudus dilaniat pecus,
 7 sic me ferus discerpit hostis,
 8 innocui sitiens cruoris.
 9 Si verus index me merito arguit,
 10 nec falsa mendax crimina texuit,
 11 si damna tranquillo creavi,
 12 promerito male ne peperci,
 13 me persequatur dum capiat sequens,
 14 captumque sternat, stratum et humi pede
 15 conculcet, et sceptri superbum
 16 proterat abjiciatque fastum.
 17 Exsurge, justas te furor impius
 18 meorum in iras excitet hostium,
 19 exsurge, promissamque redde
 20 perfidiae, Deus, ultionem.
 21 Exsurge, terris luceat omnibus
 22 augusta majestas tua. Te suum
 23 accurrat agnoscatque regem
 24 concilium populi, patremque.
 25 O qui potenti sceptrum tenens manu,

26 gentes per omnes crimina vindicas.
 27 Me vindica, si rite poenas
 28 ore pio innocuoque posco.
 29 O juste iudex, cordis in intimo
 30 quem nil recessu praeterit abditum,
 31 frange impios ausus malorum,
 32 fulci animos refoveque justos.
 33 Securus hostes nil metuo, Deo
 34 custode, quem simplex animi juvat
 35 candor. Pios servat, malisque
 36 exitium assidue minatur.
 37 Si perstet hostis, jam gladium tenet,
 38 jam tendit arcum promptus, et arripit
 39 ferale telum, et igne saevo
 40 letiferas acuit sagittas.
 41 En qui nefandum parturiit scelus,
 42 concepit aerumnam, pariet velut
 43 quae vana per somnum inquietas
 44 ludificant simulacra mentes.
 45 Fodit dolosam, ut me caperet, scrobem,
 46 incautus in fossam ipse suam ruit.
 47 In verticem ipsius recurret
 48 pernicies, recidentque fraudes.
 49 Ergo expeditus fraudibus et metu,
 50 rerum parentis justitiam canam,
 51 nomenque sanctam, gratiasque
 52 laetus agam, repetamque laudes.

PSALMUS VIII. DOMINE DOMINUS NOSTER, QUAM ADMIRABILE etc.

P_1_8 v.1 Gentis humanae pater atque custos,
 2 quam sancta majestas tui
 3 nominis terras stupefecit omnes,
 4 sol quas recurrens adspicit !
 5 Et super caeli radiantis orbes
 6 tua magnitudo se extulit.
 7 Quam pia mundum tueare cura,
 8 lactentis aevi infantia
 9 prodit, ut linguas temere obstrepentum
 10 tibi refutes hostium,
 11 hostium, quorum vomit os furorem
 12 in te, sititque sanguinem.
 13 Luce cum caelos vitrea sereno
 14 pollentis opera dexterarum
 15 cerno, cum lunam, nitidasque stellas
 16 per te creatas conspicio,
 17 quantulus (mecum tacitus revolvo)
 18 homo est, ut ejus sis memor !
 19 Quantula humanae est sobolis propago,
 20 dignere ut illam visere !
 21 Hunc Deo aequalem prope reddidisti,
 22 ornasti honore et gloria,
 23 et tuae dextrae super universa
 24 opera creasti principem.
 25 Cuncta vitalis quibus haustus aerae est,

26 illi dedisti sub pedes.
 27 Huic boves parent et oves, pecusque
 28 quodcumque campis pascitur,
 29 quique pennarum celeri volatu
 30 metitur ales aera,
 31 quique pinnarum celeri natatu
 32 piscis pererrat aequora.
 33 Gentis humanae pater atque custos,
 34 quam sancta majestas tui
 35 nominis terras stupefecit omnes,
 36 sol quas recurrens adspicit !

PSALMUS IX. CONFITEBOR TIBI, DOMINE, IN TOTO CORDE MEO.

P_1_9 v.1 Rerum certa salus, te cano, gratias
 2 exsolvo meritas ex animo tibi,
 3 et miranda futuris
 4 pandam facta nepotibus.
 5 Tutus praesidio nil metuam tuo,
 6 laetus laeta canam sed tibi carmina.
 7 Te laudabo supremi
 8 aeternum aetheris arbitrum.
 9 Spes hostis temere elatus in improbas,
 10 conversus trepida terga dedit fuga,
 11 et virtute potentis
 12 dextrae pessum abiit tuae.
 13 Tu vindex cupidos exitii mei
 14 perdis, tu trepido praesidium es reo.
 15 Tu litem mihi iudex
 16 ex alto dirimis throno.
 17 Tu gentis valido robore barbarae
 18 compescis furias, destruis impios,
 19 ut nec nomina seris
 20 narret fama nepotibus.
 21 En hostis tumidae quo recidunt minae !
 22 En qui sternit humi funditus oppida,
 23 et prostrata perennis
 24 condit nube silentii.
 25 At rerum Dominus perpetuus thronum
 26 fixit perpetuum justitiae sibi,
 27 orbem ut legibus aequis,
 28 ut juste populos regat.
 29 Cum vis incubuit feta superbia
 30 infreni, miseris praesidium pates,
 31 tuti pandis asyli
 32 arcem rebus in asperis.
 33 In te uno merito spem solidam locant
 34 qui novere tuum nomen, et ultimo
 35 ut discrimine amicos
 36 numquam destituas tuos.
 37 Ergo arcis merita laude Sioniae
 38 custodem Dominum pangite, consilii
 39 decreta ardua gentes
 40 late ferte per exteras.
 41 Vindex innocui sanguinis expetit

42 poenas, vi tenues nec sinit opprimi
 43 impune, applicat aurem
 44 clamantum querimoniis.
 45 Afflictas bonus o res propius meas
 46 contemplare, odiis quem petit improbis
 47 vis hostilis, et atrae
 48 mortis faucibus eripe.
 49 Ut, qua mole Sion crescit in aethera
 50 late conspicua, laudibus efferam
 51 te, laetusque salutem
 52 acceptam referam tibi.
 53 Demersit merito fraus sua perfidas
 54 gentes exitio, queis alios plagis
 55 irretire parabant,
 56 haesere impliciti pedes.
 57 O miranda Dei iudicis aequitas !
 58 Fraudis fraude sua prenditur artifex.
 59 O res pectoris altis
 60 condenda in penetralibus !
 61 Sic est : interitu devorat impios
 62 improvisa dies. Immemores Dei
 63 gentes mors inopina
 64 aeternis tenebris premit.
 65 At confisa Deo nuda modestia
 66 aeternum Domini non animo excidet,
 67 nec laeto miserorum
 68 spes frustrabitur exitu.
 69 Rerum surge parens, neu sine ut impotens
 70 adversus tenues crescat homunculus,
 71 et juris preme frenis
 72 gentes arbiter impias.
 73 Circumsiste tuae mole potentiae,
 74 terroremque feris mentibus ingere.
 75 Agnoscat male firmam
 76 sortem gens hominum suam.

PSALMUS X. UT QUID, DOMINI, RECESSISTI LONGE ?

P_1_10 v.1 Quonam usque custos gentis humanae tuos
 2 in rebus artis negliges ?
 3 Quonam aberis usque, dum pios tyrannide
 4 premit arroganter impius ?
 5 O si scelestum vergat in caput scelus,
 6 suisque pereat artibus !
 7 Dum mentis explet per nefas libidinem,
 8 sic gloriatur impius.
 9 Sic gaudet in se, sempiternum ceu decus
 10 rectis pararit artibus.
 11 Aequi atque iniqui negligit discrimina
 12 infrenis arrogantia,
 13 suaeque plaudit suaviter prudentiae,
 14 nullum esse quod putet Deum.
 15 Felicitatis somnio indulget suae,
 16 quod cuncta cedant prospere,
 17 nec te futurum cogitat vel iudicem,

18 vel perpetrati vindicem.
19 Hostes minoris aestimat nihilo suos,
20 sic ipse secum computans,
21 "Incommodi expers ad senectam usque ultimam
22 securus aevum transigam.
23 Non cura laetis ulla sese gaudiis,
24 non aegritudo interseret."
25 Os execranda despuit convicia,
26 spumatque probris et dolis.
27 Bonis labores continenter pestilens
28 lingua et dolores parturit.
29 Circa viarum compita insidias locat,
30 ut innocentem clam involet.
31 Intentus oculis intuetur acribus
32 in transeuntes pauperes.
33 Qualis cruentus subter alta delitet
34 spelaea conditus leo,
35 sic e latebris, corde trepido palpitans,
36 infirmioribus imminet,
37 et occupatos multinodis nexibus
38 nassae involutos attrahit,
39 malisque subigit, et tenebris occulit
40 crudelitatem callidus.
41 Ah, strage quanta transeuntes perculit,
42 grassatus istis artibus !
43 Sic deinde secum colligit male credulus,
44 haec prorsus ignorat Deus.
45 Avertit ora rebus humanis sua,
46 fandi et nefandi negligens.
47 Exsurge, Domine, tolle in altum dexteram,
48 librata fige vulnera.
49 Ope destitutos ne pios silentio
50 oblivioso desere.
51 Tene impiorum pervicax vesania
52 sic audeat contemnere ?
53 Secreta secum corde tacito ut murmuret,
54 "Humana non curat Deus."
55 Cernis profecto cuncta, cernis, et tuam
56 scelestus in manum cadet.
57 Ut te labores et dolores pauperum
58 non praeterire intelligat.
59 Tibi relictus est inops atque innocens,
60 tu tutor orbos protegis.
61 Tu frange vires impii, violentiam
62 tu mentis improbae doma.
63 A stirpe caesa donec impietas simul
64 eliminetur et impius.
65 Tum firma Dominus saeculorum in saecula
66 sceptra obtinebis imperii,
67 gentesque terrae finibus procul tuae
68 exterminabis impias.
69 Haec vota duris obruti laboribus,
70 has supplices fundunt preces,
71 animosque stimulis incitati talibus
72 te lacimantes postulant.
73 Pupillum et inopem ut vindices potentium

74 ab impotenti audacia,
 75 homo ut feroces spiritus ponat, suae
 76 infirmitatis conscius.

PSALMUS XI. IN DOMINO CONFIDO.

P_1_11 v.1 Cum spe salutis non dubia fruar,
 2 Deoque fidam, vos mihi dicitis,
 3 "Facesse rupes in remotas,
 4 antevolans pavidas volucres."
 5 Intendit arcum (en aspicias) impius,
 6 nervo sagittas admovet, ut petat
 7 incogitantes e latebris
 8 innocuos animique rectos.
 9 At tu potenti, rex bone, dextera
 10 domas rebelles, et facis irrita
 11 decreta vesani furoris
 12 contra humiles male nil merentes.
 13 Aeterna caeli templa colens Deus,
 14 et lucido astrorum in solio sedens,
 15 humana per terras acutis
 16 facta oculis speculatur omnes.
 17 Non justus illum, non latet impius
 18 cuncta intuentem, sed studio ad nefas
 19 pronos maligno justus orbis
 20 ex animo moderator odit.
 21 Super scelestos retia depluet,
 22 ignes remisto sulphure flammeos
 23 ad impios eliminandos
 24 fulmineae rapiunt procellae.
 25 Justosque justus justitiae parens
 26 amore sancto amplectitur unice,
 27 et fraudis ignarum ante vultus
 28 assidue videt aequitatem.

PSALMUS XII.SALVUM ME FAC, DOMINE.

P_1_12 v.1 Affer opem, servator, opem fer. Pulsa recessit
 2 intemerata fides.
 3 Nuda fides hominum fugit commercia, vana
 4 cum socio loquitur
 5 quisque suo, blanda exercens mendacia lingua,
 6 corde scelus meditans.
 7 Ora Deus fraudum dulci medicata veneno
 8 conterat, et penitus
 9 grandiloquam ex ima lingua radice revellat.
 10 Quique pudore carent
 11 dicere nec metuunt, "Falsa ad perjuriam linguae
 12 fortiter intrepidi
 13 assuescamus, et os age confirmemus ad omne
 14 flagitium. Neque enim
 15 oris frena mei linguaeve repagula quemquam
 16 me nisi habere puto."
 17 At Dominus planctus miserorum et dura ferentum

18 aure trahens gemitus,
 19 "Surgam," ait, "atque inopem, tuta ut respiret in arce,
 20 insidiisque procul
 21 securum statuam." Haec Dominus. Quod ab ore fideli
 22 cumque fluit Domini
 23 auro purius est, auro quod fusile fecit
 24 septima flamma coquens,
 25 dum faex in fumos exploratore camino
 26 crassa abit et cineres.
 27 Polliciti memor ergo malae mala toxica linguae,
 28 sancte parens, inhibe.
 29 Pestifera de gente hominum nos, optime custos,
 30 assere perpetuo.
 31 Nam late impietas grassatur libera, passim
 32 omnia plena malis,
 33 cum penes injustos jus est, et jussa malorum
 34 sunt metuenda bonis.

PSALMUS XIII. USQUE QUO, DOMINE, OBLIVISCERIS ME ETC.

P_1_13 v.1 Quousque, rector unice,
 2 me destitutum negliges ?
 3 An sempiterna me obrutum
 4 oblivione deseres ?
 5 Quousque vultum amabilem
 6 iratus abscondes mihi ?
 7 Quousque curae turbidae
 8 mentis quietem distrahent ?
 9 Quousque cor cruciabitur
 10 maeroris aestu fluctuans ?
 11 Quousque, me prostrato, aget
 12 hostis triumphos insolens ?
 13 Regnator orbis, adspice,
 14 opem fer et lucem tuam
 15 infunde, ne mors lumina
 16 somno perenni sopiat.
 17 Ne jactet hostis arrogans
 18 me viribus fractum suis,
 19 ne me perosi perfidi
 20 meo dolore gaudeant.
 21 Tu me salutis recreas
 22 spe, largus auxilii. Tuum,
 23 salute parta, laudibus,
 24 Rex magne, nomen efferam.

PSALMUS XIV. DIXIT INSIPIENS IN CORDE SUO etc.

P_1_14 v.1 Secum insania callide,
 2 indulgens vitiis, sic loquitur : "Deum
 3 formido sibi credula
 4 commenta est hominum, cum temerario
 5 casu sors ferat omnia."
 6 Ergo flagitiis se penitus dedit
 7 secreta impietas Dei,

8 nec quisquam ex animo recta sequi studet.
 9 De templo aethereo Deus
 10 ad curas hominum lumina verterat,
 11 si quis non stolide improbus
 12 ad cultum revocet pectora numinis.
 13 Omnes in scelera omnia
 14 conjurasse putes : foeda, nefaria
 15 detestandaque perpetrant,
 16 nec cuiquam est studium recta capessere.
 17 Nam qui recta capesserent ?
 18 Quem sanis aditum consiliis darent,
 19 quorum nequitia et scelus
 20 infecere animos ? Qui populum meum,
 21 ceu praedam fera, devorant,
 22 nec rerum Dominum mente colunt Deum.
 23 Ast illos gelido metu
 24 horror concutiet, justitiae Deus
 25 cum patronus opem feret
 26 insonti, increpitans talibus impios :
 27 "Vobis ludibrio fuit
 28 insontum pietas. Vos inopum pium
 29 risistis studium, preces,
 30 spes lentas, trepidas sollicitudines.
 31 At, cui fidit inops, Deus
 32 spes et vota bonos ducet ad exitus."
 33 O si mittat opem suis
 34 speratam Deus e rupe Sionia !
 35 Nam cum vincula ruperit,
 36 exsolvetque suos, pectore libero
 37 gaudebunt Abrahamidae,
 38 et justa Isacidae laetitia frement.

PSALMUS XV. DOMINE, QUIS HABITABIT IN TABERNACULO etc.

P_1_15 v.1 Sanctae Sionis templa quis incolet,
 2 Rex magne, tecum ? Quem statues tuum
 3 sanctum super montem, ut malorum
 4 liber agat placidam quietem ?
 5 Quem fraudis expers simplicitas juvat,
 6 urgetque rectum propositi tenax,
 7 nec mente saevus grata blandum
 8 edocuit simulare linguam,
 9 nec ore mendax exitiabilis
 10 concinnat artes, nec mala proximis
 11 excogitat, nec dulcem amicum
 12 opprobriis maculat pudendis.
 13 Qui fastuosum despicit impium,
 14 Dei timentem suspicet et pium,
 15 tenaxque promissi, fidemque
 16 indocilis temerare pactam.
 17 Qui non egenos fenore perdidit,
 18 non innocentes munere prodidit.
 19 In monte sancto haec qui peregit
 20 perpetua requie fruatur.

PSALMUS XVI. CONSERVA ME, DOMINE.

P_1_16 v.1 O rerum sator et salus
 2 humani generis certa, periculis,
 3 qui te respicit unum, famulum instantibus eripe.
 4 Te servus Dominum libens
 5 agnosco, et populis praedico, sed tibi
 6 omni ex parte beato officiis nil opus est meis.
 7 Ergo illuc animum appuli,
 8 ut gentem studio prosequerer pio,
 9 quam tu ex omnibus unam populis sorte receperas.
 10 Ast illi immemores tui
 11 defecere. Novos quisque sibi deos
 12 effinxere, colentes animi ludicra somnia.
 13 Horum sanguineas dapes
 14 non libabo, epulas respuo, nomina
 15 testis numquam adhibebo, aut fidei foedera sanciens.
 16 At sortis populum meae
 17 defendit Domini perpetuus favor,
 18 mercedemque laborum cumulatam dabit affatim.
 19 O pulchra agricolatio !
 20 O praeclara mei sors patrimonii !
 21 Ut florum undique ridens animum pascit amoenitas !
 22 Immortalis honor Deo
 23 aeterno, monitu cujus ago dies,
 24 arcanisque per umbram stimolor pectora motibus.
 25 Quicquid molior aut gero,
 26 praesentem Dominum conspicio. Is mihi
 27 semper dexter adhaeret, stabili ne movear gradu.
 28 Pulsat pectora gaudio
 29 cor laeto trepidum. Lingua tuas avet
 30 laudes promere, corpus tacite spes bona recreat.
 31 Nam nec degere Tartari
 32 permittes animam sub tenebris meam,
 33 aut ut putre cadaver resolutum in cineres fluat.
 34 Tu vitae reseras viam,
 35 de vultu fluvii laetitiae tuo
 36 manans, tu tribuis munifica gaudia dextera.

PSALMUS XVII. EXAUDI, DOMINE, JUSTITIAM MEAM.

P_1_17 v.1 Aequus exaudi, bone rector orbis,
 2 aequa poscentem, tibi quas profundit
 3 lingua non mendax, cape non iniqua
 4 aure querelas.
 5 Ad tuum laesus fugio tribunal
 6 et fidem appello. Mihi cognitorem
 7 te peto, oppressos oculis benignis
 8 adspice justos.
 9 Saepe per solas tacitae tenebras
 10 noctis arcanos mihi cogitatus
 11 cautus inspexti, trepidoque corda
 12 turbida motu.
 13 Saepe, ceu flammis, animum probasti

14 casibus duris, neque comperisti
15 conscium fraudis scelerumque, sonti
16 saeva minantem.
17 Os fuit concors animo, sonusque
18 sensui. Legum monitis tuarum
19 pectus innixum scelera impiosque
20 horruit ausus.
21 Hac via gressus rege per tuarum
22 orbitam legum, dubio vacillent
23 ne pedes lapsu, instabilesque turbent
24 lubrica plantas.
25 Te voco, duris ad opem periculis
26 saepe tentantam fugio, precantis
27 admove attentam miseris benignus
28 questibus aurem.
29 Tu bonus fulci tibi qui salutem
30 spemque committunt, tibi contumacis
31 spiritus cordis tetricus refrena
32 vindice dextra.
33 Me velut pupillam oculi tenellam
34 providus muni, procul impiorum
35 impetu alarum trepidum tuarum
36 conde sub umbra.
37 Nam meae vitae manus impiorum
38 imminet. Vallant opibus, superbis
39 intonant linguis, male dira saeva
40 voce minantur.
41 Obsident cunctos aditus viarum,
42 commoda observat loca, destinantque
43 ad meam caedem, facinusque patrant
44 mentibus absens,
45 qualis in praedem leo fertur ira
46 fervidus, qualis catulus leonis
47 lacte depulsus speculatur alto
48 abditus antro.
49 Surge, conatus, pater, anteverte
50 impios, stratoque in humum tyranno,
51 me tuo, quo nunc furit ille saevus
52 eripe ferro.
53 Neu sine ut me vi premat impotentum
54 divitum fastus, quibus una cura est,
55 dum licet, blandae illecebras caducas
56 carpere vitae.
57 His opes terris penitus refossis
58 de penu fundis locuplete, ventri
59 sufficis fruges, hilarasque multa
60 prole penates.
61 Puritas vitae mihi te tueri
62 corporis vinclis tribuet soluto.
63 Illa lux vere faciet me ab omni
64 parte beatum.
65 Lux voluptatum cumulata cunctis
66 gaudiis, cum se sine nube menti
67 pura majestas dabit intuendam
68 lumine puro.

PSALMUS XVIII. DILIGAM TE, DOMINE etc.

P_1_18 v.1 Te, Deus alme, colam, te toto pectore amabo,
 2 sancte parens, mea vis, mea sola potentia, turris,
 3 praesidium, spes, et rebus solamen in artis.
 4 Tu clypeus, tu tela mihi, tu certa salutis
 5 ancora, tu statio tuti placidissima portus.
 6 Nam simul atque tuas in laudes ora resolvo
 7 te venerans pacemque petens, inimica facessunt
 8 arma, salus, placidisque comes pax advolat alis.
 9 Jam me letiferis mors circumvolverat atra
 10 cassibus, obsessum jam me torrentibus Orcus
 11 impediabat aquis, Stygia jam compede vinctus
 12 haerebam, laqueoque pedem retinente trahebar.
 13 Hic ego deprensus, supplex humilisque vocavi
 14 voce Deum, et dubiis clamavi ad sidera rebus.
 15 Ille super solio residens flammantis Olympi
 16 audiit orantem. Postquam pervenit in altum
 17 clamor, et attentas advertit questibus aures,
 18 protinus e vultu Domini conterrita tellus
 19 intremuit, montesque cava compage soluta
 20 nutarunt, penitusque imis fremuere cavernis.
 21 Fumeus afflatus de naribus aestus anhelus
 22 undabat. Rapidae contorto vertice flammae
 23 ore fluunt, vivaque animant attacta favilla.
 24 Utque suum Dominum terrae demittat in orbem,
 25 leniter inclinat jussum fastigia caelum.
 26 Succedunt pedibus fuscae caliginis umbrae.
 27 Ille vehens curru volucris, cui flammeus ales
 28 lora tenens levibus ventorum adremigat alis,
 29 se circum furvo nebularum involvit amictu,
 30 praetenditque cavis piceas in nubibus undas.
 31 Acribus ex oculis vibratae spicula flammae
 32 discutiunt tristes claro fulgore tenebras.
 33 Inde ruit crepitans lapidosae grandinis imber,
 34 discursantque vagae sinuosa volumina flammae.
 35 At vero ut sancto sermone silentia rupit,
 36 protinus horrifico tonitru caelum omne remugit,
 37 grandinis et crebra tellus crepitante procella
 38 pulsa sonat, ruptisque micant e nubibus ignes,
 39 flammiferaeque volant magnum per inane sagittae,
 40 fulguraque ingeminant. Laticum concussa lacunas
 41 pandit hians tellus, et fontibus ora relaxat,
 42 succutiturque pavens, et fundamenta revelat,
 43 et reserat Chaos. Aeterni sic vox tonat oris,
 44 sic formidandae grave spiritus infremat irae.
 45 Ille salutiferam porrexit ab aethere dextram,
 46 et me de rapidis pereuntem sustulit undis.
 47 Hostibus eripuit validis, et acerba potentum
 48 in me odia elusit. Cum me studiosa nocendi
 49 temporibus duris caeca fraus arte petebat,
 50 auxilium tulit, et rebus patefecit in artis
 51 latum iter, electumque a morte reduxit amicum.
 52 Scilicet immunem sceleris, mentemque manumque
 53 adspexit Deus, et merito dignatus honore est.

54 Quippe nec impietas nec pravi credulus error
 55 avertere meos recto de tramite gressus.
 56 Ante oculos mihi lex Domini, mihi jussa verenda
 57 semper erant animo praesentia. Simplice vero
 58 gaudebam, fraudisque illo sub teste voluntas
 59 libera, flagitium et scelerum vitaverat artes.
 60 Ergo mihi integrae fructum hunc decerpere vitae
 61 magnificus dedit, et qui conspicit omnia justus
 62 arbiter innocuam cumulavit munere vitam.
 63 Quisque suis sibi te conformat moribus, erga
 64 innocuum innocuus, te sentit amicus amicum,
 65 inque bonos bonus es. Male cautas cautior artes
 66 artibus eludis. Duro in discrimine servas
 67 res humilis populi afflictas, oculique superbos
 68 dejicis elati fastus. Tu plebis ab imae
 69 coetibus ereptum celebri me in luce reponis,
 70 illustrasque meas claro splendore tenebras.
 71 Te duce perrumpo florentes aere phalanges,
 72 altaque turrigeri supero fastigia muri.
 73 Scilicet ut sanctus Deus est, sua signa secutis
 74 sancta salutiferae pandit compendia vitae.
 75 Illius aeterno quicumque effluxit ab ore
 76 sermo repurgato flammis sincerior auro est.
 77 Ille suo clypeo fida spe pectora fulva
 78 protegit, adversisque vetat succumbere rebus.
 79 Dicite qui colitis picti ludibria trunci,
 80 aut ebur in varias aut saxa excisa figuras,
 81 ecquis in aethereo rerum moderatur Olympo
 82 frena alius Dominus ? Quis terrae temperat orbem
 83 alter, et invicta quae vult facit omnia dextra ?
 84 Ille Deus viva mihi vi corroborat artus,
 85 ostenditque viam maculosa labe carentem.
 86 Me pedibus fecit celeri contendere cervo,
 87 et procul a saevis subduxit in alta periclis,
 88 et tractare manu duro in discrimine belli
 89 arma dedit facili, solidoque ex aere rigentem
 90 flectere, et inflexum confringere viribus arcum.
 91 Ille salutiferi totum munimine scuti
 92 me tegit, et dextra nutantem fulcit et auget,
 93 largus opis. Perque insidiis obsessa viarum
 94 pandit iter tutum, prohibetque per invia plantas
 95 offenso titubare gradu. Te persequor hostes
 96 auspice, disjectos comprehendo, nec ante revertor
 97 quam cecidere animi fracta virtute minaces,
 98 affusique cadant pedibus, ne surgere possint
 99 rursus, et antiquas armis reparare ruinas.
 100 Tu mihi diffundis vivum per membra vigorem,
 101 et validos crudo distendis robore nervos.
 102 Tu bellare doces. Tu me quicumque lacessit
 103 sternis humi, trepidosque fuga mihi disjicis hostes.
 104 Clamantes nemo exaudit : "Domini prece poscunt
 105 auxilium. Aversam negat implorantibus aurem."
 106 Hos ego, seu versat Boreae violentia nubem
 107 pulveream, impello, et turbatis fervidus insto,
 108 et pedibus premo, ceu caenum deforme lutosus
 109 conteritur triviis. Tu me sine nomine plebis,

110 contemptu ereptum, populos frenare superbos
 111 imperio facis, et famulas mihi tendere dextras
 112 per longinqua jubes ignotas oppida gentes,
 113 attonitas famae novitate, et nomine tantum
 114 audito, et blandis verba assentantia linguis
 115 fingunt, nec tutis satis audent credere muris.
 116 Laus, honor, imperium Domino, qui robore cinctum
 117 me tegit, incolumemque rapit de morte propinqua,
 118 qui mihi perfidiam sceleratam ultricibus armis
 119 frangere dat, populosque facit parere volentes,
 120 securumque vetat belli trepidare tumultus.
 121 Qui mihi praesidio est, populi cum saeva rebellis
 122 ira furit, mentisque malae scelerata retundit
 123 consilia. Ergo feram late tua facta per urbes
 124 finitimas, semperque meo celebrabere cantu,
 125 sancte parens, regem qui dura per omnia tutum
 126 esse jubes, cumulasque opibus, plenoque favore
 127 ipsum, et perpetuum sobolem amplecteris in aevum.

PSALMUS XIX. CAELI ENARRANT GLORIUM DEI etc.

P_1_19 v.1 Insanientis gens sapientiae
 2 addicta mentem erroribus impiis,
 3 tot luce flammaram coruscum
 4 cerne oculis animoque caelum.
 5 Hinc disce, prudens quam fuit artifex
 6 qui templa Olympi fornice flammeo
 7 suspendit, et terrae capacem
 8 et pelagi sinuavit arcum.
 9 Dies tenebras, et tenebrae diem
 10 semper prementes perpetua vice
 11 non fortuito res caducas
 12 ire monent per inane lapsi,
 13 sed tota concors fabrica personat
 14 Dei tuentis cuncta potentiam,
 15 non voce quae paucorum ad aures
 16 perveniat strepitu maligno.
 17 Nam nec remotis barbara finibus
 18 gens ulla terras incolit ultimas,
 19 quae nesciat certa meantis
 20 lege poli stabilem tenorem.
 21 Quis nocte clara lumine flammeo
 22 semper micantes non stupeat globos,
 23 aut mane castris prodeuntem
 24 cum rutilo videt axe solem ?
 25 Sive ille Eois fluctibus exerit
 26 vultus decoros, sponsus uti novus
 27 auro refulgens, gemmaeque
 28 tempora conspicuus corona,
 29 seu cum fugacem praecipitans diem
 30 curru citato tempora dividit,
 31 artusque viresque impetumque
 32 centimano similis giganti.
 33 Abusque Eoo cardine ad ultimam
 34 metam occidentis sidera permeans

35 obliqua, vitali calore
 36 cuncta creatque fovetque alitque.
 37 Sed ordo rerum et conspicuus decor
 38 non sic tuentum lumina detinent,
 39 divina ut arcanis habenis
 40 lex animos ad honesta flectit.
 41 Promissa fraudis nescia lubricae
 42 splendore veri pectora roborant.
 43 Hac plectitur culpa aequitate, ut
 44 poena juvet recreetque damnum.
 45 Puro recludunt lumine lumina
 46 praecepta, puro religio nitet
 47 verenda cultu, quam nec annis
 48 cuncta domans minuit vetustas.
 49 Decreta fas et conscia veritas
 50 astans tabellis servat aheneis,
 51 jucundiora melle, et auro
 52 et nitidis potiora gemmis.
 53 Signata claustris pectoris intimi
 54 servus tuetur jugiter haec tuus,
 55 non inscius custodientem
 56 quam maneat numerosa merces.
 57 Errata mentis quis meminit vagae ?
 58 Quae deprehendet vis sapientiae ?
 59 Ergo repurga quas refudit
 60 clam maculas sinuosus error.
 61 Fac regna cordis ne sibi vendicet
 62 vis impotentis dira superbiae.
 63 Sic me malorum e maximorum
 64 compedibus facile explicabis.
 65 Quae lingua fundit verba, quod in sinu
 66 secum volutat mens tacito, accipe
 67 placatus, o nostrae salutis
 68 arx, Dominus, Deus et redemptor.

PSALMUS XX. EXAUDIAT TE DOMINUS IN DIE TRIBULATIONIS etc.

P_1_20 v.1 Cuncta licet ferro late populetur et igni
 2 insana gentis barbarae crudelitas,
 3 Tu ne cede malis, sed contra audentior ito.
 4 Moderator orbis audiet preces tuas.
 5 Utque bonus dubiis Jacobum ad sidera rebus
 6 cum voce palmas proferentem exaudiit,
 7 annuet oranti, et te majestate verendi
 8 nominis ab hoste sospitem tuebitur.
 9 Ex adyto sacro arcanis tibi viribus artus
 10 firmabit, animum de Sione fulciet,
 11 vota secundabit, memori tua munera mente
 12 servabit. Omnis perlitabit victima,
 13 protinus in cineres depasta holocausta resolvat
 14 in astra volvens flamma lucem splendidem.
 15 Ille aderit coeptis, casusque in prospera vertet,
 16 eventa finget omnia ex sententia.
 17 Jam tibi plaudemus reduci, auctoremque salutis
 18 patrium canemus patrio ritu Deum.

19 Cuncta Deo grates fora, compita, templa sonabunt,
 20 nomenque sanctum prosequentur laudibus.
 21 Annuet ille pio quaecumque rogabitur ore,
 22 laetumque precibus exitum justis dabit.
 23 Quin (scio, nec fallax animum mihi decipit omen)
 24 regem reducet sospitem Dominus suum.
 25 Mittet opem, sancti reserans sacraria caeli,
 26 et praepotenti proteget te dextera.
 27 Gloria sit Syriae turmas numerare curules,
 28 axesque curvis asperare falcibus,
 29 fidat equis, lateque vagis discursset habenis,
 30 sonante Perses arva findens ungula,
 31 hi currus et equos jactent. Nos rebus in artis
 32 Dei potentis nomen invocabimus.
 33 Illis nec currus nec vis praestabit equorum,
 34 ne scindat uncis vultur artus unguibus.
 35 Nos humiles favor aethereus penitusque jacentes
 36 tollet, suoque sustinebit numine.
 37 Tu, servator, opem fer. Tu si respicis, arma
 38 nec socia cupimus, nec timemus hostica.
 39 Respiciet, populique sui rex optimus, omni
 40 vocatus hora, facilis audiet preces.

PSALMUS XXI. DOMINE, IN VIRTUTE TUA LAETABITUR REX etc.

P_1_21 v.1 Quod hoste victo rex triumphat gaudio,
 2 curis solutus anxiiis,
 3 tibi id fatetur, rex beate caelitem,
 4 debere. Tu laboribus
 5 vires ferendis, tu dedisti e proelio
 6 redire duro sospitem.
 7 Nullam repulsam, voce cum te supplice
 8 rogaret, umquam adhuc tulit.
 9 Nil in latebris pectoris reconditis
 10 spe concupivit irrita.
 11 Et vota supra, et ante vota, hunc omnibus
 12 vitae besti commodis.
 13 Gemmis coronam ferre et auro splendidam
 14 sacro dedisti vertici.
 15 Vitam poposcit : mortis illi est addita
 16 immunis immortalitas.
 17 Tu claritatis auctor illi es, inclyta
 18 per te refulget gloria.
 19 Felicitatis ei favor dedit tuus
 20 exemplar ut sit posteris,
 21 mensura voti ut matribus sit, cum bene
 22 blandis precantur liberis.
 23 Tu nempe spes et ancora es fiduciae,
 24 tu portus in rebus malis.
 25 Te fretus uno firmus omnem perferet
 26 sortis procellam turbidae.
 27 Tu perduelles comprehendes, tu manu
 28 poenas reposces vindice.
 29 Ceu flamma clausis aestuans fornacibus
 30 antiqua silvae brachia

31 vorat, furoris sic tui nefarios
 32 afflatus hostes hauriet.
 33 A stirpe totam demetes propaginem
 34 semenque gentis impiae.
 35 Te namque contra moliuntur abditam
 36 fraudem scelusque perfidi,
 37 et mente prava vota versant irrita,
 38 et spes inanes concoquunt.
 39 Te persequente, pallidi in fugam ruent,
 40 inhonesta tergo vulnera
 41 ferent. In ora, fata dum vitant fuga,
 42 rursus sagittas diriges.
 43 O qui potenti frena rerum dextera
 44 versas, perennis arbiter,
 45 exsurge, vires fac tuas ut hostium
 46 agnoscat insolentia.
 47 Tum te piorum turba festis cantibus
 48 orbis parentem concinet,
 49 votis tuorum supplicum placabilem,
 50 malisque formidabilem.

PSALMUS XXII. DEUS DEUS MEUS RESPICE IN ME, QUARE ME DERELIQUISTI etc.

P_1_22 v.1 Cur me relinquis, o Deus ? Deus meus,
 2 cur me relinquis ? Irrita
 3 heu verba fundo. Luce seu terras dies
 4 reteggit, vocantem me dies
 5 frustra intuetur, sive nox silentibus
 6 terram tenebris obruit,
 7 nox me vocantem nulla non audit, meo
 8 nox nulla questu non sonat.
 9 Tu sanctus ille civitatis incola es
 10 sanctae. Isaci nepotibus
 11 tu carmen es. Tu fida spes majoribus
 12 nostris : salutem qui suam
 13 tibi credidere, a te salutis compotes
 14 abiere. Salvi gratias
 15 egere, duris qui tuam in malis opem
 16 petiere. Qui tuam in fidem
 17 se dedidere, non tulere dedecus,
 18 non hostium ludibria.
 19 At vermis ego sum, non homo. Sum fabula
 20 vulgi, infimorum opprobrium.
 21 Nam turba nostris obvia illudit malis,
 22 nutatque, nictatque, ut caput
 23 motat, labella exporrigit. Ludibria
 24 verbis acerbat asperis.
 25 En ille Domino carus, en fiducia
 26 securus ille numinis.
 27 Nunc servet illum, nunc periclis eruat,
 28 quem tanto amore amplectitur.
 29 O Domine, tu me protinus susceperas
 30 alvo parentis editum.
 31 De te pependi spe, parentis pendulus
 32 infans adhuc ad ubera.

33 Abusque partu tu Deus meus, tuus
34 ex matris alvo me favor
35 est prosecutus. Ultimo in discrimine
36 jam ne recede longius.
37 Discrimen instat ultimum, mortis metu
38 cessere amici territi.
39 Tauri efferati, tauri obesi me undique
40 circumdedere. Faucibus
41 hiant leonum more rugientium,
42 quos incitat spes et fames.
43 Rivi cruoris corpus omne perluunt
44 exsanguis, laxat artuum
45 compago nexus, pectus intra liquitur,
46 ut sole cera, cor metu.
47 Exaruere testae adinstar coctilis
48 defecta membra viribus.
49 Rigens adhaesit lingua siccis faucibus,
50 jam sto sepulchri ad aggerem.
51 Me rabidi ab omni parte latratu canes
52 urgent, petuntque dentibus.
53 Mihi pessimorum saeva conspiratio
54 manusque fodit et pedes,
55 et ossa numerant, ossa tralucentia
56 per corporis tensi cutem.
57 Tormenta postquam cuncta consumpsit furor,
58 animus adhuc ira tumens
59 se pascit, oculos satiat, et fruitur meis
60 laeto in malis spectaculo.
61 Partiti amictus sunt meos, tunicae meae
62 fecere sortes arbitras.
63 Tu, Domine, saltem ne recede, ne malis
64 in ultimis me desere.
65 Tu robor unus, tu mea es potentia,
66 accurre, festinus meae
67 succurre vitae, destitutum ab omnibus
68 defende. Saevorum hostium
69 ferrum cruentum pelle, vim rabidam canum
70 inhibe, leonum spumeos
71 compesce rictus, cornua unicornium
72 confringe, serva supplicem.
73 Tum, morte victa, sospes auxilio tuo
74 narrabo fratribus tuum
75 nomen, piorum praedicabor coetibus
76 robor, fidem, constantiam.
77 O mente pura qui Deum colitis, Deum
78 laudate puris cantibus.
79 Semen Jacobi, magnitudinem Dei
80 celebrate festis laudibus.
81 Erga fideles numinis clementiam
82 agnosce, proles Isaci.
83 Non sprevit inopis ille solitudinem,
84 non pauperum fastidio
85 avertit ora. Me vocantem exaudiit,
86 vitaeque dulci reddidit.
87 Ergo per oras ultimas mundi tuas
88 sonabo laudes, gentibus

89 te praedicabo, vota te timentium
 90 praesente solvam ecclesia.
 91 Edet modesta turba fraudis nescia
 92 vocata sacras ad dapes,
 93 epulisque functa ac satura dulci nectare
 94 laudabit auctorem Deum.
 95 Deum sonabit, qui vigore flammeo
 96 in corda se quaerentium
 97 se tantus infert, mortis ut procul metu
 98 perenne viva gaudeant.
 99 Ergo excitata tam novo spectaculo
 100 tellus ab oris ultimis,
 101 quacumque colitur, colla sub Domini jugum
 102 submittet. Illi servient,
 103 pronaequae Domino supplicabunt omnium
 104 omnes familiae gentium.
 105 Nam sempiterno jure Domino competit
 106 regnum triformis machinae.
 107 Ille universis imperabit gentibus.
 108 Rerum potentes illius
 109 mensae accubabunt, et sacri convivii
 110 dapibus referti sub jugum
 111 cedent volentes. Flectet illi poplitem
 112 pauper sepulchri in limine,
 113 qui membra fessis artubus languentia
 114 fugiente vita vix trahit.
 115 Illumque longa posterum propagine
 116 colent, suisque posteris
 117 per longa deinceps nuntiabunt saecula
 118 in me favorem numinis.
 119 Hoc semen illi serviet, gens illius
 120 in posterum haec censebitur.

PSALMUS XXIII. DOMINUS REGIT ME, ET NIHIL etc.

P_1_23 v.1 Quid frustra rabidi me petitis canes ?
 2 Livor propositum cur premis improbum ?
 3 Sicut pastor ovem, me Dominus regit,
 4 nil deerit penitus mihi.
 5 Per campi viridis mitia pabula,
 6 quae veris teneri pingit amoenitas,
 7 nunc pascor placide, nunc saturum latus
 8 fessus molliter explico.
 9 Purae rivus aquae leniter adstrepens
 10 membris restituit robora languidis,
 11 et blando recreat fomite spiritus
 12 solis sub face torrida.
 13 Saltus cum peteret mens vaga devios,
 14 errorum teneras illecebras sequens,
 15 retraxit miserans denuo me bonus
 16 pastor justitiae in viam.
 17 Nec, si per trepidas luctifica manu
 18 intentet tenebras mors mihi vulnera,
 19 formidem, duce te, pergere, me pedo
 20 securum facies tuo.

21 Tu mensas epulis accumulās, merum
 22 tu plenis pateris sufficis, et caput
 23 unguento exhilaras. Conficit aemulos,
 24 dum spectant, dolor anxius.
 25 Me numquam bonitas destituet tua,
 26 profususque bonis perpetuo favor,
 27 et non sollicitae longa domi tuae
 28 vitae tempora transigam.

PSALMUS XXIV. DOMINI EST TERRA, ET PLENITUDO EJUS etc.

P_1_24 v.1 Tota quidem Domini terra est, et quicquid ubique
 2 vel parca celat, vel benigna sufficit,
 3 quique colunt montesque feros, camposque feraces,
 4 urbesque sanctis temperatas legibus.
 5 Ille super pelagus solidum connexuit orbem,
 6 stabilis ut undas inter instabiles foret,
 7 et toties rapidis pulsatus fluctibus, omnes
 8 compage firma sustineret impetus.
 9 Cuncta igitur Domino merito sunt. Sed tamen unam
 10 sedem sibi ille dedicavit propriam.
 11 Ecquis eo scandet ? Cuive haec permissa potestas,
 12 loco ut beatum sistat in sancto gradum ?
 13 Cui manus et mens est insons, nec vana volutat
 14 animo, nec ulli damna perjurus dedit.
 15 Huic Dominus donabit opes, hunc numine dextro
 16 a vi procacique eruet calumnia.
 17 Haec vera est pietas, hac itur ad aethera, veri
 18 sic intueri numinis vultum licet.
 19 Eia aditus reserate, fores age pandite, portae,
 20 portae perennes sempiternae regiae.
 21 Claustra revellite, limine pandite, magnus ut intret
 22 Rex ille, multa clarus ille gloria.
 23 Quis novus hic sanctis succedit sedibus hospes ?
 24 Quis iste multa est inclytus rex gloria ?
 25 Ille potens late Dominus dextraque opibusque,
 26 belloque multa nobilis victoria.
 27 Eia aditus reserate, fores age pandite, portae,
 28 portae perennes sempiternae regiae.
 29 Claustra revellite, limina pandite, magnus ut intret
 30 Rex ille, multa clarus ille gloria.
 31 Quis novus hic sanctis succedit sedibus hospes ?
 32 Quis iste multa est inclytus rex gloria ?
 33 Ille potens armis numerosoque agmine ductor,
 34 hic ille multa est inclytus rex gloria.

PSALMUS XV. AD TE, DOMINE, LEVAVI ANIMAM MEAM.

P_1_25 v.1 Hic fidat armis, plebe se clientium
 2 defendat alter militumque copiis.
 3 A te, creator orbis, uno spes mea
 4 pendet, malisque in rebus unum respicit.
 5 Tu, sancte genitor, effice insolentibus
 6 ne spes inanes risui sint hostibus.

7 Sic me pudore liberabis, nec rubor
8 confundet ora ceteris, in te suae
9 qui collocarunt ancoram fiduciae.
10 Frustretur illos spes, et irritae spei
11 pudor dolorque torqueat, qui sordium
12 amore sese sordibus contaminant,
13 bonosque nulla provocati injuria
14 vexare gaudent. Mihi per anfractus vagos
15 vitae, salebras inter et tenebras, iter
16 ostende rectum, et erutum sequacibus
17 erroris undis praevio lucis tuae
18 splendore deduc veritatis in viam.
19 Te nempe ab uno pendeo spe, te Deum
20 unum et salutis columen agnosco meae.
21 Si torta vitiis forte morum regula
22 deflexit, error si fefellit lubricus,
23 fracta illecebris si voluptatis malis
24 incauta vitiis se juvena polluit,
25 benignitatis tu tuae memor tamen
26 et lenitatis (qui parentes mollibus
27 frenans habenis usque ab incunabulis
28 orbis paterna es usus indulgentia)
29 miserere, nostris quod negares moribus,
30 tuae negare non potes clementiae.
31 Nec denegabis, nec precantes bona bonus
32 vacuos repelles, nec viam poscentibus
33 rectam aberis umquam recti et aequi regula.
34 Tu mitis animi amplecteris modestiam,
35 docesque recti et improbi discrimina.
36 Tu dux comesque tuta per compendia
37 ducis carentem fraude mansuetudinem.
38 Peccata bonus et facilis oblivisceris,
39 promissa solvis liberali dextera,
40 minuitque poenas mitis indulgentia,
41 fidesque dictis stabilis erga omnes adest
42 qui pacta sacri foederis non negligunt.
43 Hanc ut nepotum saecla mansuetudinem
44 noscant, tuique nominis se gloria
45 late per omnes fundat orbis angulos,
46 ignosce nostris mitis erratis, parens,
47 quae multa jussit aegritudo, et impotens
48 amor, regique contumax ira et dolor,
49 errorque veri non acutus arbiter.
50 O ter beatum, mente qui pura Deum
51 veneratur. Illi, quaecumque amplectitur
52 vitae institutum, dux adest semper Deus
53 rectorque, et omnes actiones prosperat.
54 Securus animus anxio procul metu
55 cunctis fruatur affluenter copiis,
56 stirpisque series longa firmabit domum,
57 genusque multa floridum propagine
58 opes paternas ad nepotes transferet.
59 Quin et piorum mentibus mysteria,
60 contempta pravis, impie sapientibus
61 occulta, Dominus luce proferet sua,
62 et sacrosancti foederis scientiam,

63 (quae sola vitae dux beatae et regula est)
 64 docebit. Ergo, rex beate caelitem,
 65 te mente solum quaero, nusquam lumina
 66 abs te reflecto. Tu pedes solus meos
 67 hostis dolosis erues a retibus.
 68 O sancte custos hominum, amico lumine
 69 in me intuere, et destitutum ab omnibus
 70 inopemque sancta me tuere dextera,
 71 curisque, mentem quae perurunt plurimae,
 72 novisque semper differunt doloribus,
 73 exsolve. Poenis usque et usque immanibus
 74 exercitato, et obruto laboribus,
 75 ignosce. Culpas mitis obliviscere.
 76 Heu quanta vis me factionis impiae
 77 persequitur armis ! Quanta me crudelitas
 78 inexpliato quaerit odio perdere !
 79 Tu me periculis libera. Tu protege
 80 ejus salutem ab hostium ludibrio,
 81 omnem salutis qui locavit spem suae
 82 in te, nec aliis fidit opibus quam suae
 83 integritatique et tuae clementiae.
 84 Gens quae tuarum jussa legum amplectitur,
 85 fac undequaque tuta sit te vindice.

PSALMUS XXVI. JUDICA ME, DOMINE, QUONIAM etc.

P_1_26 v.1 Me vi tyrannus persequitur palam,
 2 me clam maligna fraude calumnia.
 3 Te, qui latebras pectoris inspicis,
 4 appello, rerum conditor optime.
 5 Mens fraudis expers, et manus innocens,
 6 a vique pura et flagitio, in Deo
 7 spes fixa, sortis qui violentia
 8 me saevientis non sinet opprimi.
 9 Renesque flammis et penetrabilia
 10 scrutare cordis, caecaque sensuum
 11 arcana, fusum ceu calidis focis
 12 explorat aurum callidus artifex,
 13 mentem videbis munificentiae
 14 quae dona numquam non meminit tuae,
 15 actaeque leges puriter ad tuas
 16 vitae carentem flexibus orbitam.
 17 Procul facessat, nec socium sibi
 18 me vana speret lingua. Procul domo
 19 nostra recedat qui didicit suos
 20 fucare sensus pectore subdolo.
 21 Odi scelestum concilia, impios
 22 coetus veneno pejus abominor,
 23 quorum resultant pectora gaudio
 24 cum perpetrarunt facta nefaria.
 25 Sed mente pravi non sibi conscia,
 26 lotusque puris fontibus, ad tuas
 27 aras adibo, laetus et offeram
 28 laetae choreae dux tibi victimas.
 29 Te nostra pangent tympana, te lyra,

30 te vox canoro consona tympano
 31 lyraeque, coetuque in celebri tua
 32 miranda pandet facta nepotibus.
 33 Tectumque, nomen quo canitur tuum,
 34 aedemque, numen qua colitur tuum,
 35 mens ardet. Absentem retrahunt tuae
 36 quae templa celant pignora gloriae.
 37 Haec ossa tellus ne sine ut obruat
 38 inter cruentos barbara barbaros,
 39 qui fraudulenta mente coquunt scelus,
 40 captant avara munera dextera.
 41 Ego institutum carpere tramitem
 42 pergam innocenter. Tu propius meis
 43 aurem benignus questibus admove,
 44 ac me periculis tristibus assere.
 45 Per plana firmo quod gradior pede,
 46 quod recta sector, muneris est tui.
 47 Ergo salutis te columen meae
 48 coetu in celebri laudibus efferam.

PSALMUS XXVII. DOMINUS ILLUMINATIO MEA etc.

P_1_27 v.1 Deus in tenebris cum mihi praeluceat,
 2 vitamque muniat meam,
 3 quae vis aperta terreat me ? Quae mihi
 4 fraus caeca sit formidini ?
 5 Adversus unum cum scelesta factio
 6 cunctas parasset copias,
 7 dolosa leto quae tetenderant meo
 8 ipsi incidere in retia.
 9 Si comminentur castra, si minacibus
 10 infesta telis agmina,
 11 securus animi specto castra, proelia
 12 timore liber intuo.
 13 Unum expetivi, et usque et usque id expetam,
 14 curis ut exemptus malis
 15 sim sacrosanctae semper aedis incola,
 16 augusta mirer atria,
 17 Deoque laudes personem, artus dum regit
 18 vitalis aurae spiritus.
 19 Tum me sub umbra conditum tentorii
 20 celabit, et periculis
 21 procul remotum, ruptis abruptae velut
 22 in arce positum, muniet.
 23 Ac ne relictum nunc quidem impiae sinet
 24 vi factionis opprimi,
 25 victorque solvam vota, nec victoriae
 26 auctor mihi tacebere.
 27 Audi invocantem supplicem, et fractum malis
 28 bonus favensque subleva.
 29 Te mens anhelat, vultus ad vultum tuum
 30 intentus usque respicit.
 31 Ne conde vultus lumen a me amabilis,
 32 neu me in tenebris desere.
 33 Servum per iram ne sine opprimi tuum,

34 vitamque, quam debet tibi,
 35 tuere ab hoste et e periculis eripe,
 36 o spes salutis unica.
 37 Me cari amici, me propinqui, me pater,
 38 me blanda mater liquerat,
 39 at non reliquit, qui pios in asperis
 40 non deserit rebus, Deus.
 41 Parens benigne, me vias doce tuas,
 42 rectaque deduc semita,
 43 ne vis metusque ab hoste me deterritum
 44 de calle recti detrahat.
 45 Ne me impiorum obnoxium libidini
 46 relinque. Testes impii
 47 fingunt maligne falsa de me crimina,
 48 armantque se mendaciis.
 49 Mens victa tantis jam fatisceret malis,
 50 ni spes foveret me tuae
 51 benignitatis, post labores anxios
 52 mox affuturum gaudium.
 53 Vivusque vivos inter ipse commoda
 54 vitae beatae praestolor.
 55 In rebus ergo turbidis ne concide,
 56 sed fortis usque sustine.
 57 Te roborabit Dominus et cor fulciet,
 58 tu fortis usque sustine.

PSALMUS XXVIII. AD TE, DOMINE, CLAMABO etc.

P_1_28 v.1 Princeps stelliferis altior orbibus,
 2 vitae praesidium et certa salus meae,
 3 aurem suppliciiis da facilem meis,
 4 ne fiam similis busta petentibus.
 5 Audi vota, parens, quae tibi profero
 6 supplex cum gemitu, brachia porrigens
 7 ad caelum tremulis pervigil ignibus,
 8 caelum templa tuae conscia gloriae.
 9 Ne me connumera coetibus impiis,
 10 neu tamquam socium plecte nocentibus,
 11 quorum blanditiis illita mollibus
 12 lingua est, mens gelido livida toxico.
 13 Illis nequitiae praemia sint suae,
 14 et merces studiis aequa nefariis.
 15 Pro semente legant semina, pessimis
 16 dignum consiliis supplicium luant.
 17 Non his consilii provida vis tui
 18 (qui me conspicuis tollis honoribus),
 19 infectasve manus a scelere avocat,
 20 aut infesta odiis pectora mitigat.
 21 Ergo nec series longa propaginis
 22 florebit, patrias nec soboles opes
 23 longaeva accipiet, sed celeri genus
 24 clades exitio proruet ac domum.
 25 Laus rerum Domino, qui precibus meis
 26 se non difficilem praebuit. Hinc meae
 27 vires, hic clypeus rebus in asperis,

28 hinc spes, auxilium hinc non dubium in malis.
 29 Hinc cor gestit ovans. Carminibus tuas
 30 laudes ora sonant, qui populum tuum
 31 in rebus trepidis protegis, et tuum
 32 regem ex insidiis omnibus eripis ;
 33 custodi populum, rex hominum, tuum.
 34 Hebri fac soboles largiter omnibus
 35 vitae continuo fructibus affluat,
 36 donec perpetuum sol referet diem.

PSALMUS XXIX. AFFER TE DOMINO FILII DEI etc.

P_1_29 v.1 Seu dives auro es, sive opibus potens,
 2 seu Marte parta clarus adorea,
 3 agnosce numen gratus, et huc refer
 4 quaecumque laetum ducis ad exitum.
 5 Huic pange laudes et prece supplice
 6 rerum parentem concilia, et Dei
 7 nutu regentis stelliferam domum
 8 dignare justis nomen honoribus.
 9 Cujus liquentes vox gravida pluit
 10 de nube rores, terrificos ciet
 11 caelo tumultus cum tonitru, maris
 12 turbata ventis concitat aequora.
 13 Vox dignitatis plena, nec irritae
 14 umquam ad patrandum jussa potentiae.
 15 Nudare cedris seu Libanum juvat,
 16 celsasque ventis sternere fraxinos,
 17 seu vincta saxis saxa revellere,
 18 notisque montes sedibus erutos
 19 versare, taurum ut verna per avia
 20 vexat juventae laeta protervitas.
 21 Ad vocis ictum nubibus exsilit
 22 elisus ignis, tesqua Arabum tremunt,
 23 ferae pavescunt, ante diem fluunt
 24 partus acerbi, robora concidunt.
 25 Quaecumque templo caelum habet aureo,
 26 quaecumque tellus daedala sustinet,
 27 quae celat undis aequor in abditis,
 28 Dei fatentur cuncta potentiam.
 29 A voce vindex pontus inhorruit,
 30 undisque montes obruit, arbiter
 31 aeterne rerum, cum libuit tibi
 32 delere gentes fluctibus impias.
 33 Te dante vires, non opibus feros
 34 horremus hostes, non numero graves.
 35 Te dante pacem, progeniem Isaci
 36 cornu beabit divite copia.

PSALMUS XXX. EXALTABO TE, DOMINE, QUONIAM... etc.

P_1_30 v.1 Te nostra semper carmina, te lyra
 2 sonabit, orbis conditor optime,
 3 de faucibus leti imminentis

4 incolumis tibi vota reddam.
5 Per te superbus nec lacrimis meis
6 insultat hostis, nec fruitur malis.
7 Te rebus, incertus salutis,
8 auxilium in dubiis poposci.
9 Per te receptis viribus haurio
10 vitalis aerae lumen amabile,
11 nec inferum sub nocte longa
12 et tenebris jaceo sepulchri.
13 O turba puris dedita ritibus
14 sacrisque castis, tollite laudibus
15 placabilem votis parentem,
16 et memori celebrate plectro.
17 Vanescit irae vindicis impetus
18 bullae fugacis more. Dei favor
19 bonis manu vitam benigna
20 tristitiae vacuum rependit.
21 Si forte sero vespere fletibus
22 vultus rigamur, mox redit aurea
23 cum luce risusque, et jacentes
24 exhilarans animos voluptas.
25 Pacis beatae cum fruerer bonis,
26 mecum loquebar, de stabili gradu
27 felicitatis nulla sortis
28 me dubiae quatiet procella.
29 Te dante vires, divitias, decus,
30 te montis instar moenibus aeneis
31 firmate regnum, vanum alebat
32 credulitas mihi blanda fastum.
33 Tu, me relicto, stultitiae meae,
34 dextram retraxti. Retro abiit, domum
35 repente turbatam relinquens,
36 sors levibus malefida pennis.
37 O praeses orbis, pectore supplice
38 mox te vocavi, te lacrimis madens
39 opem poposci. "Quid profusus
40 profuerit tibi sanguis ? " inquam.
41 "Quis mortis usus nostrae erit ? An tuas
42 laudes sonabunt, factaque posteris
43 miranda muti praedicabunt
44 sub gelido cineres sepulchro ?"
45 Placatus aurem da facilem meis
46 votis, severos neu querimoniis
47 averte vultus. Pelle membris
48 pestiferi mala dura morbi.
49 Tu supplicanti protinus admoves
50 aurem benignus. Pro lacrimis mihi
51 risum reducis, pro dolore
52 laetitiamque alacremque plausum.
53 Te semper ergo carmina, te lyrae
54 nostrae sonabunt. Vox tibi serviet
55 dicata, praebebitque nostris
56 materiam tua laus Camenis.

PSALMUS XXXI. IN TE, DOMINE, SPERAUI, NON CONFUNDAR etc.

P_1_31 v.1 In te locavi spem meam,
 2 rerum creator optime,
 3 at tu benignus prospice,
 4 ne spei pudescat irritae.
 5 O juste vindex, fraudibus
 6 ab hostium me vindica.
 7 Audi benignus supplicem.
 8 Da promptus abjecto manum.
 9 Me rupe serva ut in via
 10 clausum, vel arce ahenea.
 11 Tu rupis es mihi in viae
 12 munimen, arx ahenea.
 13 Ergo, ut timori mentibus
 14 nomen tuum sit impiis,
 15 praei viam mihi, abditis
 16 me libera de cassibus.
 17 Tu robur es meum, tuae
 18 commendo vitam dexterarum.
 19 Me libera pacti Deus
 20 tenax, memorque foederum.
 21 Qui vana stulti somnia
 22 sectantur, odi pessime.
 23 Tu certa spes mihi es, meae
 24 tu portus es fiduciae.
 25 Inter labores asperos
 26 lumen tuae clementiae
 27 fulgens repente turbidum
 28 perfudit animum gaudio.
 29 Cum me tyrannis impotens
 30 urgeret hostis impii,
 31 jamjam imminentis pallidis
 32 leti explicasti faucibus.
 33 Miserere fracti tot malis,
 34 tot obruti doloribus.
 35 Caligat oculus, mens stupet,
 36 maerore corpus tabuit.
 37 Caduca vita elabatur
 38 luctus per et suspiria,
 39 interque clades aridis
 40 fluxere vires ossibus.
 41 Me ridet hostis, et meis
 42 insultat insolens malis.
 43 Horrent propinqui, ceteri
 44 vitant metu periculi.
 45 E proximorum mentibus
 46 oblitorum ceu mortuus.
 47 Contemptior sum civibus
 48 quam lamna testae fictilis.
 49 Me multitudo opprobriis
 50 coram lacessit asperis.
 51 Vim machinatur in meam
 52 jurata mortem factio.
 53 Ego interim fiducia
 54 opis tuae dolos, minas,

55 injurias, et hostium
 56 contemno contumelias.
 57 Tu fila vitae temperas
 58 meae, regisque tempora.
 59 Tu me impiorum libera
 60 ab hostium tyrannide.
 61 Ostende vultum amabilem
 62 servo bonus tuo et favens,
 63 et me tuere qua soles
 64 semper tuos clementia.
 65 Ne sit pudori quod tuam
 66 imploro opem. Pudor malos
 67 confundat, et silentium
 68 longum sepulchris sopiat.
 69 Assueta vox mendacio
 70 sit muta, vox procaciter
 71 solita bonos lacescere,
 72 et arroganter spernere.
 73 O quanta te colentibus
 74 et quot redundant commoda !
 75 Quot, teste mundo, prosperis
 76 auge tuos successibus !
 77 Hos protegis reconditos
 78 procul a minis potentium,
 79 tuaque munis in domo
 80 linguae veneno ab impiae.
 81 Tibi perennis gratia
 82 sit, rector orbis, qui velut
 83 munita in arce me procul
 84 periculis submoveras.
 85 Exspes, inops, vitam fuga
 86 cum vix tuerer anxiam,
 87 mecum ipse dixi : "Jam truci
 88 reliquit hosti me Deus."
 89 At tu nec in periculis
 90 oblitus extremis mei,
 91 aurem benignam supplicii
 92 ac invocanti admoveras.
 93 Ergo patrem rerum optimum
 94 amate, candidi et pii,
 95 quo fastuosos deprimit
 96 et obsequentes erigit.
 97 Qui spem locatis in Deo,
 98 constanter illi fidite,
 99 nec robur animi concidat
 100 sortis procella turbidae.

PSALMUS XXXII. BEATI QUORUM REMISSAE SUNT INIQUITATES etc.

P_1_32 v.1 O ter beatum cui patris optimi
 2 noxas remisit letiferas favor,
 3 cui foeda morum flagitia obruit
 4 oblivioso tecta silentio !
 5 O ter beatum cui bonus arbiter
 6 non imputavit lubrica deviae

7 errata vitae, nec reperit dolum
 8 caeco in recessu pectoris abditum !
 9 Donec fovebam sub tacito sinu
 10 morbum, solutis languidus ossibus
 11 artus trahebam, luctificus dolor
 12 questum ciebat non patiens tegi.
 13 Tu me premebas praevalida manu
 14 infestus, atris seu tenebris diem
 15 nox condidisset, seu rosea dies
 16 orbem recurrens luce retexerat.
 17 Sic decolorem tabificus cutem
 18 maeror coquebat. Sic macie dolor
 19 siccabat artus, messis ut Africae
 20 Cancri per aestum mitius areat.
 21 Tum mente versa vulnera protuli,
 22 tibi renudavi vitium meum,
 23 fraudem retexi, ac tu mihi protinus
 24 noxa soluto conciliatus es.
 25 Qui mentis ergo pura sacraria
 26 servare quaerit, te prece supplice
 27 placet, nec, orbem pontus ut obruat,
 28 formidet aestus letiferi minas.
 29 Tu me periculis eripis asperis
 30 tutela praesens. Tu mihi gaudia
 31 toto refundis corpore, ut hostium
 32 qui vincla fracto carcere depulit.
 33 Nec sat : "Tenebras pectoris auferam."
 34 inquis. "Beatae qua ferat orbita
 35 monstrabo vitae, nec procul a tuis
 36 umquam reflectam lumina gressibus,
 37 mulis equisque ne similis modo
 38 sis, bruta quorum pectora gratiam
 39 non mutuam novere, sed asperis
 40 fracti lupatis servitium ferunt."
 41 Multa obstinatam nequitiam manent
 42 tormenta. Pura qui Dominum fide
 43 orabit, huic pacem et veniam dabit,
 44 non durus umquam parcere supplici.
 45 Recti tenaces simplicis, et quibus
 46 est grata fraudum nescia veritas,
 47 favente laeti numine gestibus,
 48 et voce vestrum pandite gaudium.

PSALMUS XXXIII. LAUDATE JUSTI IN DOMINO etc.

P_1_33 v.1 Vos quibus purae est amor aequitatis,
 2 laeti pangite carmine
 3 orbis auctorem Dominum, aequitatis
 4 hoc carmen decet aemulos.
 5 Tinniat blando chelys hunc susurro,
 6 hunc vocalia nablia.
 7 Docta bis quinque resonare nervis
 8 hic artem manus approbet.
 9 Huic novos cantus meditentur, uni
 10 laeti clangite buccina.

11 Nam fides dictis rata veritasque est,
 12 et factis comes aequitas.
 13 Quippe qui justus est et amator aequi,
 14 veri fallere nescii,
 15 perque terrarum sola vasta notae
 16 cunctis munificentiae.
 17 Is suo verbo sinuavit orbem
 18 lucentem nitidi aetheris.
 19 Quicquid et puris radiis renidet
 20 campis aetheris igneis.
 21 Litus artavit maris inquieti,
 22 compressitque licentiam,
 23 et penu clausas sinuavit undas,
 24 unde in tempore promeret.
 25 Hunc et occasus metuant et ortus,
 26 hunc unum Dominum colat
 27 quisquis extremos ubicumque fines
 28 terrae aut aequoris accolit,
 29 cujus a nutu viget interitque
 30 quodcumque interet aut viget,
 31 cujus immotis tremefacta parent
 32 cuncta obnoxia legibus.
 33 Qui malas artes populi profani
 34 ludit callidior suis,
 35 et suo injustae scelerata turbae
 36 fraudat consilia exitu.
 37 At quod arcana sibi mente rerum
 38 auctor proposuit semel,
 39 dum dies et nox referent se in orbem,
 40 usque immobile permanet.
 41 O quater, plusquam quater o beatos,
 42 patronus quibus est Deus !
 43 Quos sibi excepit, propriamque sortem
 44 quos dici voluit suam.
 45 Despicit mundi pater e beata
 46 caeli stelliferi domo,
 47 eque tranquillis adytis labores
 48 et curas hominum videt,
 49 quippe qui caecos animi recessus
 50 humani fabricaverit.
 51 Nec quod arcano latet in recessu
 52 clausum pectoris hunc latet.
 53 Sperat incassum numero tyrannus
 54 se tutum fore militum,
 55 sperat incassum validis lacertis
 56 se miles fore sospitem,
 57 saepe spem fallit praeaeuntis Euros
 58 bellatoris equi fuga.
 59 At Deus justos oculo irretorto
 60 semper respicit et pios,
 61 mortis ut vertat jacula imminentis,
 62 diram et saevitiam famis.
 63 Una spes nobis opis hinc, ab uno
 64 certum praesidium in malis.
 65 Ille perfundet sibi dedicata
 66 dulci pectora gaudio,

67 ille fidentum sibi spes precesque
68 laetum ducet ad exitum.

PSALMUS XXXIV. BENEDICAM DOMINUM.

P_1_34 v.1 Seu laeta sors me foverit, seu tristior
2 vexarit, omni tempore
3 laudabo Dominum, semper illius meum
4 os personabit laudibus.
5 Mihi haec voluptas, hoc erit solacium,
6 mihi hoc levamen in malis,
7 meoque turba tristis exemplo suas
8 solabitur molestias.
9 Una agite cuncti prosequamur laudibus
10 nomenque numenque illius.
11 Ille in periculis me vocantem exaudiit,
12 statimque reppulit metum.
13 Qui cuncta ad illum consilia referunt sua,
14 laeto his nitentes gaudio
15 vultus renident, nec repulsae infamia
16 rubore confundet genas.
17 En pauper iste cum vocaret, omnibus
18 hunc eruit periculis.
19 Dominum timentum castra munit angelus
20 demissus ad custodiam,
21 et imminentes arcet hostes, et pios
22 a vi tuetur impia.
23 Facite periculum, jam scietis quam Dei
24 immensa sit benignitas,
25 quam sint beati spes in illo qui suas
26 omnes opesque collocant.
27 Gens sancta Dominum colite : nil deerit Deum
28 fideliter colentibus.
29 Violenta feritas sentiet famam, bonis
30 cuncta affluenter suppetent.
31 Adeste, fili, audite, vobis numinis
32 verum timorem ut indicem.
33 Quicumque curis liberam et longam cupis
34 vitam beatus ducere,
35 linguae refrena virus, os nefaria
36 a fraude purum contine,
37 capesse recta, curva vita, dilige
38 tranquilla pacis otia.
39 Deus innocentes adspicitque et commodat
40 intentus aures ad preces,
41 torvo scelestos intuetur lumine,
42 et nomen etiam obliterat.
43 Justum invocantem Dominus audit, omnibus
44 eum expedit periculis.
45 Cum spes labores deserit mortalium,
46 afflicta cum molestiis
47 succumbit oneri mens, Deus praesens adest,
48 malasque curas diluit.
49 Justis labores suggerit semper piis
50 iniqua sors conatibus,

51 sed qui bonorum semper est custos Deus
 52 sortis retundet spicula,
 53 et ossa servat ne terantur, impios
 54 ulciscitur scelus suum.
 55 Et quisquis hostis est piorum, cum domo
 56 a stirpe caesus interit.
 57 Animas tuetur se colentium Deus,
 58 nec rem domumque deserit.

PSALMUS XXXV. JUDICA, DOMINE, NOCENTES ME etc.

P_1_35 v.1 Rerum sancte opifex, ades,
 2 et patrocínio protege me tuo,
 3 et retro refer in meos
 4 hostes perniciem quam mihi comparant.
 5 Scutum cum jaculis cape,
 6 ensem stringe, meis hostibus obviam
 7 prodi. Dic animae meae
 8 "Secura auxilio nil metuas meo."
 9 In vultus pudor hostium
 10 et turpis subeat dedecoris rubor.
 11 Foedam corripiant fugam,
 12 caecas insidias qui mihi praeparant.
 13 Ut saevus Boreas levem
 14 raptat praecipiti turbine pulverem,
 15 sic illos trepida fuga
 16 vindex praecipites urgeat angelus.
 17 Sit caeno via lubrica,
 18 et caelum tenebris lurida nox tegat,
 19 et formidine pallida
 20 vindex praecipites comprimat angelus.
 21 Nam me fraude mala suis
 22 conati immeritum prendere cassibus,
 23 et caecam innocuo scrobem
 24 effodere. Suis cassibus haereant,
 25 et factam exitium in meum
 26 caeci et praecipites in foveam ruant.
 27 Perfusa interea mihi
 28 dulci laetitia pectora gestient,
 29 mens segura periculi
 30 auctorem Dominum laetitiae colet
 31 et sensus animi indices
 32 clamabunt : "Domino quis similis Deo,
 33 qui fastus gravis improba
 34 defendit tenues a violentia,
 35 vexantemque opis indigos
 36 frangit saevitiam vindice dextera ?"
 37 Conjurata calumnia
 38 in me criminibus saevit atrocibus,
 39 ignotum scelus in meam
 40 fingunt perniciem. Quae bene feceram,
 41 compensant odiis malis,
 42 et vitae invigilant exitio meae.
 43 Illos tabificae luis
 44 aegris visceribus cum dolor ureret,

45 squallens veste ego lugubri,
 46 jejunaque fame pallidus et siti,
 47 et prostratus humi, Deum
 48 lenibam lacrimis et prece supplice.
 49 Sic sincerus amici amor
 50 sub cari interitum luget amiculi.
 51 Sic fratrem gemit unicum
 52 frater. Sic pietas anxia filii
 53 maternum ad tumulum dolet.
 54 Me fortuna gravi si tetigit manu,
 55 concursant, mala gaudia
 56 inter se celebrant. Faex populi coit,
 57 incauto invidiam creant,
 58 proscinduntque avida me petulantia
 59 scurrae cum balatronibus :
 60 dentem dente acuunt, et rabiem vomunt.
 61 Quem finem patientiae
 62 tam lentae statues, o pater optime ?
 63 Arce hoc ludibrium, neque
 64 desertum rabidis trade leonibus,
 65 acceptum ut referam tibi
 66 quod vivo, et video lumen amabile,
 67 et coetu in celebri canam
 68 te, pronum auxilium ferre vocantibus.
 69 Fac ne spes alat improbas
 70 semper turba meis laeta molestiis,
 71 neu nutu ac oculis notet,
 72 exsultetque meis hostis atrox malis,
 73 qui sermonibus asperis
 74 insultat, trucibusque insidiis petit
 75 pacatum male callidus,
 76 incautum ut tacitis illaqueet dolis.
 77 Non diducere desinunt
 78 rictum risu. "Oculis (euge) oculis diem
 79 laetum vidimus," inquit.
 80 O qui luminibus cuncta tuentibus
 81 terras respicis, haec vides ?
 82 Ergo seposita protege me mora.
 83 Jam tandem evigila, et manu
 84 ultrice indomitam frange superbiam.
 85 Justo et supplicio preme
 86 vindex juste malos, neu sine de meo
 87 luctu laetitiam ferant,
 88 neu secum tacito pectora murmurent,
 89 "Evax, recte habet, omnia
 90 supra vota cadunt. Vicimus, en jacet."
 91 Foeda ignominia luant
 92 stultam laetitiam. Dedecoris comes
 93 infamis pudor eluat
 94 importuna meis gaudia de malis.
 95 At cordi quibus aequitas
 96 est nostra, ac animus nil sibi conscius,
 97 vitam tristitia procul
 98 laetam semper agant, ac Dominum ferant
 99 caeli ad sidera laudibus,
 100 qui curis famulos liberat anxiiis.

101 Semper justitiam mea,
 102 custos sancte hominum, lingua canet tuam
 103 et praeconia, dum mihi
 104 impellet calidus pectora spiritus.

PSALMUS XXXVI. DIXIT INJUSTUS UT DELINQUAT etc.

P_1_36 v.1 Ut exta flammis mille sacrificis cremes,
 2 oscula des saxis, ingeminesque preces,
 3 arasque donis largus accumules tuis,
 4 non facies tamen ut te rear esse pium.
 5 Scelera reclamant, et negant te credere,
 6 consilio mundum qui regat esse Deum.
 7 Utcumque coram blandiare, non tamen
 8 impietas tacito pectore clausa latet.
 9 Erumpit ignis instar, ac tui trahit
 10 secum odium, atque odii perniciem comitem.
 11 Quodcumque loqueris fraude tinctum est. Respuis
 12 auribus ingratis qui potiora monent.
 13 Scelus nefandum nocte tota cogitas,
 14 recta fugis, semper deteriora foves.
 15 O magne rector orbis, indulgentiae
 16 munera terra, fretum sentit, et astra, tuae.
 17 Quaecumque caelum amplectitur, parentia
 18 legibus orta vigent, lapsa caduntque tuis.
 19 Modus aequitatis et tuae sapientiae,
 20 cunctaque quae fecit, cunctaque facta regit,
 21 longe nivosis montium fastigiis
 22 altior est, vasti gurgitibusque freti.
 23 Humana gens hinc haurit auram et spiritum,
 24 nec pecudes curam praeteriere tuam.
 25 Hinc cuncta vitae suppetunt nobis bona,
 26 dum mens corporeo carcere vincta latet.
 27 Fetus sub alis volucris ut tegit suis,
 28 praesidii fugimus spe mala cuncta tui.
 29 At exsul animus, morte liber, patrium
 30 cum repetet limen sidereamque domum,
 31 illinc egestas et dolores exsulant,
 32 nemo feret votis non potiora suis.
 33 Passim voluptas, pura passim gaudia,
 34 delicias largo flumine rivus agit.
 35 Illinc perenni vita fonte profluit,
 36 vita gravis fati non resecanda manu.
 37 Illinc fatiscent mentium caligines,
 38 quae modo sub tenebris pectora nostra premunt,
 39 vultuque radius purus effusus tuo,
 40 lumine nos purae cognitionis alet.
 41 Benignitatis interim tuae bonis,
 42 qui te cognoscunt et tua facta, fove.
 43 Qui mente pura veritatem diligunt,
 44 justitiae facias commoda ferre tuae.
 45 Me nec feroci calcet arrogans pede,
 46 exigat aut tectis impia turba meis.
 47 Qui scelere gaudent, scelere sic ruant suo,
 48 perpetuo ut lapsos justa ruina premat.

PSALMUS XXXVII. NOLI AMULARI IN MALIGNANTIBUS NEQUE etc.

P_1_37 v.1 Ne livor urat aemulus
 2 te, si beatos videris
 3 pravos, nec Euris iis opes
 4 fugaciores invade.
 5 Nam sic facessit illico
 6 umbratilis felicitas,
 7 marcent comis arentibus
 8 ut falce secta gramina.
 9 At tu Dei fiducia
 10 incumbe rectis artibus,
 11 diuque terram ut incolas
 12 donabit, ac te nutriet.
 13 In hoc sit oblectatio,
 14 in hoc voluptas unica.
 15 Is te fovebit jugiter,
 16 votique reddet compotem.
 17 Committe vitam, rem, decus,
 18 illius uni arbitrio.
 19 Animi tibi ex sententia
 20 confecta reddet omnia.
 21 Illustris aurorae ut jubar
 22 tua faciet ut sit aequitas,
 23 ut luce virtus sit tua
 24 meridiana clarior.
 25 Perfer modeste quod tulit
 26 fortuna laeva, neu tumens
 27 ira impiorum prosperas
 28 res cerne torvo lumine.
 29 Compesce bilem, noxia
 30 facessat indignatio,
 31 ne fors nefarium ad scelus
 32 impellat aemulatio.
 33 Eliminantur impii
 34 fumo levi velocius.
 35 Terras modestus incolet
 36 serisque linquet posteris.
 37 Morare paulum, et impium
 38 nusquam videbis. Aspice
 39 aedes, superbi vix heri
 40 agnoveris vestigium.
 41 Modesta bonitas otio
 42 laetam senectam transiget,
 43 et incolenda haeredibus
 44 paterna linquet praedia.
 45 Clam rete nectit impius,
 46 bonisque concinnat dolos,
 47 et dente frendens livido
 48 dolore et ira ringitur.
 49 Haec cernit ex alto Deus,
 50 minasque ridet irritas,
 51 quippe imminentem vertici
 52 cladem scelesto prospicit.

53 Ensemque stringet improbus,
54 arcumque tendet, pauperes
55 ut perdat, ac innoxios
56 figat sagittis impiis.
57 Districtus ensis in sui
58 domini redibit viscera,
59 frangetur arcus letifer,
60 et frustra acuta spicula.
61 Praestat supellex sobria,
62 recteque parta recula,
63 quam rapta per vim divitum
64 fastidiosa copia.
65 Male parta justus arbiter
66 disperget, et potentiam
67 franget scelesti, dextera
68 justum sua tuebitur.
69 Innoxios foveat Deus,
70 ac rem tuetur. Providet
71 longaeva ut usque in saecula
72 sit sempiterna hereditas.
73 Seu pestis atra, seu furor
74 turbabit orbem bellicus,
75 nil deerit usque innoxio,
76 famam nec aegram sentiet.
77 Sic hostis impius Dei
78 perit repente funditus,
79 adeps opimae ut victimae
80 vanescit in fumos leves.
81 Nil donat, usque et fenerat
82 injustus, at justo sua
83 de sorte superat paupere
84 quod donet indigentibus.
85 Justorum amici praedia
86 linquent suae propagini,
87 at hostium radicibus
88 semen peribit erutum.
89 Amatque justum et dirigit
90 ejus Deus vestigia,
91 dextra ruentem sustinet
92 lapsumque dextra sublevat.
93 Puer fui, nunc sum senex,
94 ope destitutum, nec pium
95 videre memini, nec stipem
96 ejus petentes liberos.
97 Justus misertus pauperum
98 dat usque et uqsue mutuum,
99 serae tamen propagini
100 non larga deest opulentia.
101 Vita scelus nefarium,
102 sectare recta. Dum diem
103 sol fundet aureum, tui
104 terras nepotes incolent.
105 Deus aequitatem diligit,
106 bonos nec umquam deserit,
107 at interibit funditus
108 a stirpe semen impii.

109 Justus beata jugera
 110 agri tenebit et colet
 111 cum prole, donec ultimus
 112 instabit orbi terminus.
 113 Sermo sapiens et aequitas
 114 in ore semper est bonis,
 115 in corde scripta lex Dei,
 116 ne pes labet, gressum regit.
 117 Observat impius pium
 118 ut perdat, ast illum Deus
 119 custodit, ante judicem
 120 tuetur a calumnia.
 121 Spem colloca in Deo, Dei
 122 sectare leges, et dabit
 123 dives potensque ut hostium
 124 cernas superstes exitum.
 125 Vidi potentes impios,
 126 gravique fastu turgidos
 127 virescere instar laureae
 128 amoena propter flumina.
 129 Specto repente, en lubricae
 130 imago nusquam gloriae,
 131 nusquam manent vestigia
 132 cunctis gravis potentiae.
 133 Justi intuere et integri
 134 vitae statumque et ordinem,
 135 videbis alto in otio
 136 laetam senectam degere.
 137 At prompta semper laedere
 138 prorsum interibit factio,
 139 vitamque claudet terminus
 140 dignus patratis nequiter.
 141 Justus salutis collocat
 142 omnem in Deo fiduciam,
 143 qui fulcit aequos robore
 144 adversa cum sors intonat.
 145 Dominus petenti fert opem,
 146 et in periculis liberat
 147 ab impiis, qui se et suam
 148 illi salutem credidit.

PSALMUS XXXVIII. DOMINE, NE IN FURORE TUO ARGUAS ME etc.

P_1_38 v.1 Ne me furoris aestuante incendio,
 2 servator orbis, argue,
 3 neu promerentem quamlibet poenas graves
 4 pergas per iram plectere.
 5 Haerent medullis penitus infixae meis
 6 tuae sagittae dexterarum.
 7 Irae tuae hinc me et inde mentis consciae
 8 sic vis paventem perculit,
 9 ut nulla plagis saucii pars corporis
 10 non langueat letalibus,
 11 ossa ut solutis artuum compagibus
 12 sceleris venenum attraxerint,

13 sceleris, profundo quod meum ceu gurgite
14 caput resorbens obruit,
15 quod in alta rursus me renitentem velut
16 immane saxum degravat.
17 Veteris cicatrix vulneris recruduit,
18 vomitque tabem luridam.
19 Afflictus, humilis, ultimis premor malis,
20 luctu situque squalidus,
21 clausumque caecis fervet in praecordiis
22 ulcus, nec nulla corporis
23 expers doloris pars vacat. Sic debilis
24 et fractus usque et usque sum,
25 malis ut impar voce lamentabili
26 cor ejuletque et rugiat.
27 Dominator orbis, vota nec animi mei,
28 nec te latent suspiria.
29 Pavens tremensque turbidum cor palpitat,
30 defecta membra viribus
31 torpore marcent languido, noctem trahens
32 caligat acies luminum.
33 Vicini, amici, et sanguinis communio
34 quos propior admorat mihi,
35 procul abstitero, foeditatem vulnerum
36 vix sustinentes cernere.
37 At prompta semper in meum exitium manus,
38 molita vim nefariam,
39 dolosa tendit continenter retia,
40 fraudesque versat impias.
41 Ceu mutus ore, surdus aure, ego interim
42 obtorpui silentio,
43 elinguis instar et stupentis, crimina
44 qui nesciat refellere.
45 In te reposta est spes mea, o rerum potens
46 Rector, benignus annue,
47 ne risus hosti sim superbo, qui meis
48 insultat insolens malis,
49 qui, si vacillent lubrico lapsu pedes,
50 laeto triumphat gaudio.
51 Ad perferenda sum paratus verbera,
52 vibice semper area
53 cruenta turget exarati corporis
54 sulcis flagrorum grandibus.
55 Merui scelestus, fateor, heu merui. Nocens
56 do jure poenas debitas,
57 sed invalescit hostis atrox interim,
58 viresque sumit factio.
59 Vivunt vigentque, et immerentem injuria
60 me prosequuntur, pro bono
61 malum rependunt ; jugiter calumnias,
62 quia recta sector, ingerunt.
63 Tu ne recede longius, neu deseras
64 periculis in ultimis
65 accurre, dextram da salutarem, meae
66 salutis auctor unice.

PSALMUS XXXIX. DIXI CUSTODIAM VIAS etc.

P_1_39 v.1 Cum saevus hostes me meo laetus malo
 2 lacesseret conviciis,
 3 mecum ipse verbis abstinere ab asperis
 4 et jurgiis decreveram.
 5 Linguae obseravi claustra freno, pertinax
 6 obmutui silentio,
 7 ac, temere ne quid os mali profunderet,
 8 verbis bonis clausi exitum.
 9 At, ignis instar, vetitus egredi dolor
 10 exarsit intus acrius.
 11 Tandem obstinatae frena pertinaciae
 12 perfregit ira, ac talibus
 13 Dominum rogavi. "Mihi meae vitae modum
 14 qui sit futurus indica :
 15 quando evolabo liber hoc molestiae
 16 fastidioso e carcere.
 17 Tu clausa nullo saecula degis termino,
 18 in te beatus ac potens.
 19 At nos quod aevi vivimus paene est nihil,
 20 ac paene brevius quam nihil,
 21 umbrae fugacis instar, atque imaginis
 22 quam reddit aequor vitrium.
 23 Idque ipsum inani in vanitate atque ansiis
 24 aegrescit in laboribus.
 25 Animum libido torquet, inflat gaudium,
 26 spes tollit, ac timor premit.
 27 Tumultuamur temere. Congerimus bona
 28 incognitis haeredibus.
 29 Quo me ergo vertam ? Quis laboranti feret
 30 opem ? Quis eximet malis ?
 31 Spes omnis in te : miseriae fontem meae,
 32 peccata tolle noxia,
 33 neve esse stultus me sinas et improbis
 34 despectui et ludibrio.
 35 Hostis protervi linguae me cum turpibus
 36 proscinderent conviciis,
 37 obmutui, irae vindices poenae tuae
 38 has esse gnarus scilicet.
 39 Rector parensque gentis humanae, tua
 40 paulisper aufer verbera,
 41 viresque linqunt, vita nec semper novis
 42 plagis ferendis sufficit.
 43 Te persequente scelera poenis, illico
 44 vigor decorque defluit,
 45 tineis peresae more vestis. O homo
 46 caduca res et futilis !
 47 Parens, benigne precibus aurem da meis,
 48 neu verba sperne supplicis,
 49 neu lacrimanti averte vultus hospiti,
 50 namque hospes hanc terram colo.
 51 Nec ego, parentes nec mei certum locum
 52 habemus hic, sed in diem
 53 solliciti et horas, turbidas molestias
 54 vitae brevis transegimus.

55 Igitur severam paululum abstine manum,
 56 fessum ut resumam spiritum
 57 mortis priusquam, reditus unde non patet,
 58 transmiserit me janua.

PSALMUS XL. EXPECTANS EXPECTAVI DOMINUM etc.

P_1_40 v.1 Cum circumfremere me timor et minae,
 2 intentansque avidam mors fera dexteram,
 3 spes caelestis opis, sera licet, tamen
 4 lenibat trepidam sollicitudinem.
 5 Advertit Dominus, meque voragine
 6 caenosi implicitum gurgitis extulit,
 7 ac, saxi solidis imposito jugis,
 8 monstravi facilem qua graderer viam.
 9 Afflavitque novo pectora spiritu,
 10 suffecitque suae materiam novam
 11 laudis, quam canerem dulce loquacibus
 12 nervis, ac numeris lene sonantibus.
 13 Haec cernant rapidae qui violentiae
 14 fati vel dubiis casibus imputant
 15 eventa, ac trepidi se Domini in fidem
 16 dent, qui stellifero regnat in aethere.
 17 Felix qui stabili spe Dominum ac fide
 18 spectat, quem tumidae pompa superbia
 19 non ad se illecebris ducit inanibus,
 20 fallacique boni ludit imagine.
 21 In nos, sancte parens, quot vigilantiae
 22 et quam mira tuae pignora suppetunt,
 23 quae nec mens acie cernere languida
 24 possit, nec numero lingua retexere !
 25 Aurem mi tacite vellis, et admones
 26 quod labem sceleris nec pretium levet,
 27 nec sanguis pecudis nil merita eluat,
 28 nec consumpta focus expiet hostia.
 29 Tum dixi, "Venio, quod libet impera.
 30 Adsum, sancte parens, jussa capessere
 31 promptus, ceu tabulis scripta fidelibus
 32 edunt perpetui fata voluminis.
 33 Huc mens, huc studium tendit, uti tuis
 34 conformem monitis quae gero, quae loquor,
 35 quae mecum tacitus cogito. Nam tua
 36 incisa est animo lex penitus meo.
 37 Famam justitiae per populos tuae
 38 late praeco fero, nec labiis meis
 39 nec linguae requies, omnibus ut tua
 40 terris (ipse vides) nota sit aequitas.
 41 Nec justum tacui te mala plectere,
 42 promissique tenacem, et miseris opis
 43 largum. Me bonitas indice gentibus
 44 cunctis facta palam est, et tua veritas.
 45 Defendant igitur me bonitas tua,
 46 promissaque fides fallere nescia,
 47 obsessumque malis innumeris tua
 48 me, rerum genitor, protege dextera.

49 Me poenae, capitis quae superent pilos,
 50 omni ex parte premunt, quas neque luminis
 51 in promptu est acie nosse. Animus stupet,
 52 curarum innumeris obrutus aestibus.
 53 At tu, mundi opifex sancte, salutifer
 54 adsis. Auxilium fer cito, et ultimis
 55 oppressum penitus subtrahe me malis,
 56 ut pravi pudeat consilii improbos.
 57 Turpem ignominiae tristitiam ferant,
 58 tendunt exitio qui laqueos meo,
 59 infamem referant consilii exitum,
 60 nostris qui capiunt laetitiam e malis.
 61 Hunc fructum sceleris percipiant sui,
 62 in fraudem ut recidant quam mihi struxerant.
 63 Frustratus doleatque et rubeat, meas
 64 qui ridet lacrimas et fruitur malis.
 65 Qui credunt fidei se penitus tuae,
 66 illos auxilii spes recreet tui,
 67 ac semper Domini nomen amabile
 68 certent tergeminis tollere honoribus.
 69 Exspes, pauper, inops sim licet, at mihi
 70 custos rerum opifex pervigil excubat.
 71 Vitae o praesidium et certa salus meae,
 72 adsis, neu trepida me crucia mora."

PSALMUS XLI. BEATUS VIR QUI INTELLIGIT SUPER EGENUM etc.

P_1_41 v.1 Beatus ille qui misertus pauperis
 2 fert rebus in duris opem,
 3 nec arroganti despicit fastidio
 4 prostratum et oppressum malis.
 5 Quem rere fractum, et penitus abjectum, Deus
 6 attollet et solabitur.
 7 Cura fideli Dominus illum muniet,
 8 et e periculis eruet,
 9 interque vivos sospiti dabit frui
 10 vitae beatae commodos,
 11 artus cubili cum dolor prostraverit,
 12 opem feretque, et lectulum
 13 versabit. Omnem prorsus aegritudinem
 14 in dulce vertet gaudium.
 15 Cum me doloris vis acerbi affligeret,
 16 opem poposci te, Deus,
 17 animae medere sauciae (dixi) sui
 18 sceleris pudendo vulnere.
 19 Dira imprecatur hostis ac me devovet,
 20 laetus meis incommodis.
 21 "Quando interibit," inquit, "et cum corpore
 22 nox una nomen obruet?"
 23 Si forte quis me visit horum, corporis
 24 animique morbis anxium,
 25 vultu dolorem fingit, ac suspiria
 26 laeto trahit de pectore.
 27 Foras profectus conditum in praecordiis
 28 repente virus evomit.

29 In me susurrat clanculum atque obmurmurat
 30 scelesta conspiratio.
 31 Clam machinantur saeva, in exitium meum
 32 consilia cuncta conferunt,
 33 Secumque jactant : "Missa certe caelitus
 34 nunc dira vis mali hunc ligat,
 35 prostratus haeret, lectulo affixus jacet,
 36 noctem trahens novissimam."
 37 Quin et sodalis, et mihi mensa et domo
 38 conjunctus, et cui maxime
 39 fidebam, ad hostes conferens sese meos,
 40 in me ferox recalcitrat.
 41 At tu, salutis auctor et custos meae,
 42 benignus in me respice.
 43 Manum jacenti da salutarem, hostibus
 44 parem ut rependam gratiam.
 45 Tui favoris pignus id certissimum
 46 erit mihi, et constantiae
 47 in me tuendo, quod malis laetus meis
 48 hostis ferox non gestiat.
 49 Vires recepit corpus, innocentiam
 50 servavit animus, dexteram
 51 te porrigente, qui receperas tuam
 52 semper tuendum me in fidem.
 53 Agnoscat orbis unicum et colat Deum,
 54 quem gens honorat Isaci,
 55 unumque laudet, temporum donec vices
 56 luces et umbrae dividunt.

ooo

GEORGII BUCHANANI PARAPHRASIS IN SECUNDUM LIBRUM PSALMORUM.

PSALMUS XLII. QUEMADMODUM DESIDERAT CERVUS etc.

P_2_1 v.1 Non cervus fluvios sic avet algidos
 2 (cervus turba canum quem premit) ut tui
 3 cor desiderio carpiter anxio,
 4 rerum conditor optime.
 5 Huc me raptat amor dulcis, et impotens
 6 ardor ferre moras. O niveum diem
 7 qui templo reducem me statuet tuo !
 8 O lucis jubar aureum !
 9 Jejunos lacrimis pro dape se dolor
 10 pascit, turba meis obvia dum malis
 11 illudens rogat : "Heus iste tuus Deus
 12 cur nunc deserit exsulem ? "
 13 At rursus bonitas cum subiit tua
 14 et menti auxilii certa fides tui

15 illuxit trepidae, temporis illius
 16 me consolator imagine,
 17 festis cum populus me reducem choris
 18 faustisque excipiet vocibus, et Dei,
 19 pompa cum celebri, me comitabitur
 20 augusta ad penetralia.
 21 Cur me sollicitis teque doloribus,
 22 mens aegra, exanimas ? Pone metum, ac Deo
 23 te da, quo patriae vindice redditus,
 24 grates sospes adhuc agam.
 25 Haec mentem recreat spes, licet aviis
 26 Jordanis lateam saltibus, Hermoni
 27 esxul dura licet saxa perambulem,
 28 solis hospita belluis.
 29 Quamvis agminibus me mala densius
 30 omni ex parte premant, quam super horridos
 31 montes grando sonat, quam mare verberat
 32 raucis litora fluctibus,
 33 tu si me placido lumine videris,
 34 cedent tristitiae nubila. Tetricas
 35 maeroris tenebras discutiet mihi
 36 lucis dulce jubar tuae.
 37 Laudes interea non mihi nox tuas,
 38 non curae impediunt. "O columen meum
 39 (dicam) et certa salus, ludibrium feris
 40 cur me deseris hostibus ?"
 41 Dirumpor, tacitis aestuat ignibus
 42 pectus, turba meis impia dum malis
 43 insultans rogat : "Heus, iste tuus Deus
 44 cur nunc deserit exsulem ? "
 45 Cur me sollicitis teque doloribus,
 46 mens aegra, exanimas ? Pone metum, ac Deo
 47 te da, quo patriae vindice redditus
 48 grates laetus adhuc agam.

PSALMUS XLIIII. JUDICA ME, DEUS, ET DISCERNE CAUSAM MEAM etc.

P_2_2 v.1 Vindex esto mihi, Deus,
 2 et patrocinioprotege me tuo,
 3 oppressum scelere impio,
 4 et fraudum laqueos frange nefarios.
 5 Vitae o praesidium meae,
 6 cur me praesidio destituis tuo ?
 7 Cur luctu vagor obsitus,
 8 dum saevae furias vito tyrannidis ?
 9 Profer lumen opis tuae.
 10 Montem pande viam quae ferat ad tuum,
 11 montem quam proprie domum
 12 majestate tui numinis incolis.
 13 Atque aram adveniam ad tuam,
 14 ac te, laetitiae materiam meae,
 15 et grata cithara tibi
 16 grates laetus agam, conditor optime.
 17 Cur maeres, anime anxie,
 18 ac me sollicito pectore maceras ?

19 Omnem pone metum, ac Deo
20 curam crede tui, quem super aethera
21 cantu sospes adhuc feram,
22 cum salvus patriae reddar amabili.

PSALMUS XLIV. DEUS, AURIBUS NOSTRIS AUDIVIMUS etc.

P_2_3 v.1 Vestusta ad aures fama nostras attulit,
 2 serisque patres posteris
 3 stupenda facta tradidere a te, Deus,
 4 patrata priscis saeculis,
 5 eliminatis cum profanis gentibus
 6 et incolis prioribus
 7 horum labore fructibusque perfrui
 8 nostris dedisti patribus.
 9 Certe nec armis lucidis, nec viribus
 10 debemus has victorias,
 11 sed nos favoris aura mollis, et tua
 12 protexit indulgentia.
 13 Ergo, salutis auctor unice, o Deus,
 14 ades piis salutifer.
 15 Te dante vires, hostium ferociam
 16 tam facile profligabimus,
 17 taurus minaci quam jacit cornu pilas,
 18 stipulaeve fasces aridae,
 19 superba regum colla crasso in pulvere
 20 prostrata conculcabitur.
 21 Non arcus istam letifer fiduciam,
 22 non mucro saevus ingerit.
 23 Tu nos ab hoste subtrahes, sternes solo
 24 infensa nobis agmina.
 25 Non ergo semper jure te cantabimus
 26 nostrae salutis vindicem,
 27 ac donec orbis astra volvet ignea,
 28 te prosequemur laudibus ?
 29 At nunc relictos objicis ferocium
 30 injuriae nos hostium,
 31 nec prodis ante nostra ductor agmina,
 32 qualis solebas antea.
 33 Hosti imminente terga cogis vertere,
 34 praedaeque das prementibus.
 35 Pecus ut macello destinata exponimur
 36 caedentium libidini,
 37 omnesque terras barbararum gentium
 38 errore complemus vago.
 39 Venum dedisti nos palam, nec auctio
 40 te ditiozem reddidit.
 41 Vicina nostris oppida insultant malis,
 42 cladesque rident ; fabula
 43 sumus profanis nationibus, caput
 44 motant, labella exporrigunt.
 45 Oculis oberrat usque contumelia,
 46 pudorque vultus inficit,
 47 dum voce acerba injurias exasperat,
 48 minasque torvas adjicit

49 hostis protervus. Obruti tot cladibus,
 50 tot undequaque instantibus,
 51 tamen nec umquam est animus oblitus tui,
 52 tecumque pacti foederis,
 53 sese nec ullis territus periculis
 54 avertit aut recta via
 55 pes flexit, etsi penitus abjecti interim
 56 abs te, licet draconibus
 57 immitioris gentis addicti jugo
 58 feramus umbram ergastuli,
 59 et servitutem lugeamus, et necem
 60 vitae precemur taedio.
 61 Iniqua meritis si tuis oblivia
 62 offuderint se mentibus
 63 nostris, manusve supplices protendimus
 64 diis impiarum gentium.
 65 Id te lateret, abditas qui pectoris
 66 prorsus latebras inspicis ?
 67 Te propter, odio ceteris populis sumus,
 68 et instar ovium caedimur.
 69 In te favoris pendimus poenas, tui
 70 amoris odia nos premunt.
 71 Exsurge, similem somnolentiae moram,
 72 salutis auctor, corripe.
 73 Cur ora condis, immemorque negligis
 74 tuos malis in ultimis ?
 75 Afflictus animus, et malis praesentibus
 76 lassus, futuris anxius,
 77 succumbit oneri. Strata tabescunt humi
 78 defecta membra viribus.
 79 Exsurge, genitor, et vigore corporis
 80 animique cassos subleva,
 81 clemens bonusque nos ab hostis impii
 82 immanitate libera.

PSALMUS XLV. ERUCTAVIT COR MEUM VERBUM BONUM etc.

P_2_4 v.1 Cor micat, exsultant trepidis praecordia fibris,
 2 eructantque novum gravido de pectore carmen.
 3 Certat lingua animum fando, manus aemula linguam
 4 scribendo exaequare, me nova carmina regi
 5 dum cano, regi, hominum cui nemo e semine cretus
 6 audeat eximiae contendere munere formae,
 7 quem decorat lepor, et roseis affusa labellis,
 8 gratia, cui rerum caeli indulgentia spondet
 9 hunc fore perpetuum longaeva in saecula tenorem.
 10 Ergo armis, invicte heros, age, fortibus apta
 11 ensem humeris, ensem per quem te gloria caelo
 12 aequat, et adversum fidens fer pectus in hostem.
 13 Frena tibi currus verum moderetur et aequum,
 14 et quae praecipitem clementia temperat iram.
 15 His ducibus tibi surget honos, tua dextera factis
 16 clara per ignotas fundet miracula terras,
 17 cordaque vulnificis figens inimica sagittis,
 18 sponte tibi coges validas procumbere gentes.

19 Nec maris aut terrae spatium, nec terminus aevi
 20 finiet imperium, sceptri moderamine justī
 21 quod regis, et leges mollis clementer acerbās.
 22 Te super aequaevos omnes regnator Olympi
 23 diliget, et laeto vultum exhilaravit olivo
 24 unde tui mulcent populi nova gaudia mentes,
 25 pallia cum oculis tibi depromuntur eburnis,
 26 et myrrhae passim lacrimae, stactaeque suavis
 27 halitus, et molles casiae funduntur odores.
 28 Ancillae apparent genus alto e sanguine regum
 29 inter honoratas promptae ad tua jussa ministras.
 30 At regina tori consors tibi dextera adhaeret,
 31 auro picta sinus, auro radiata capillos,
 32 misit ab Eois Ophire quod flava caminis.
 33 Tuque adeo, regina, audi, et rem pectore conde,
 34 nec mea dicta nega placidas demittere in aures.
 35 Jam nunc et patriam et patrem obliviscere, jam nunc
 36 ex animo caros penitus depone propinquos.
 37 Unum oculis specta, unum animo complectere regem.
 38 Regem oculis animoque, tuo qui pendet ab ore,
 39 unius et pulchris defixus vultibus haeret.
 40 Hunc dominum agnosce, et supplex venerare, nec illo
 41 officio studioque tibi concedet, et illa
 42 undarum regina Tyros te murice et auro
 43 accumulans colet, et vicina per oppida late
 44 procumbent tibi suppliciter gaxisque potentes,
 45 aut opibus clari, meritumque feretis honorem
 46 hunc populi. Pharii proles generosa tyranni
 47 tota decens, tota est gemmisque insignis et auro,
 48 et facies cultum illustrat, facieque decora
 49 pulchrior est animus. Tibi, rex, en ducitur uxor,
 50 dives opum, divis pictai vestis et auri,
 51 virginibus comitata suis de stirpe propinqua,
 52 virginibus quas pompa frequens clamore secundo
 53 insequitur, plausuque fremens laetaeque choreae
 54 cantibus augustam laetas deducet ad aulam.
 55 Neu desiderio nimium tangare tuorum,
 56 quod patres tenuere tui, tibi cara tenebit
 57 imperium adnascens sobolis numerosa propago,
 58 quos regere aspicies terras, totumque per orbem
 59 legitimis populos sceptris frenare potentes.
 60 Nec tu carminibus, rex magne, tacebere nostris.
 61 Quaque patet tellus liquido circumsona ponto,
 62 posteritas te sera canet, dumque aurea volvet
 63 astra polus, memori semper celebrabere fama.

PSALMUS XLVI. DEUS NOSTER REFUGIUM ET VIRTUS etc.

P_2_5 v.1 Cum muniat nos praesidio suo,
 2 virtute firmet, cum gravis intonat
 3 procella, fortunae periculis
 4 eripiat dominator orbis,
 5 nullam expavemus vim, quatiat licet
 6 orbem tumultus, terraque sedibus
 7 convulsa montium ruinis

8 artet aquas pelagi frementis,
 9 insana quamvis aequora saeviant,
 10 et vorticoso gurgite torqueant
 11 spumamque limumque, et procellis
 12 terrificis scopulos flagellent.
 13 Nam civitatem, cui Deus unice
 14 indulget, aris et propriam suis
 15 dicavit, argenti pererrans
 16 lymphæ fugax hilarat liquore.
 17 Occulta ne vis aut timor hosticus
 18 urbis quietem sollicitet, Deus,
 19 gentis suae intentus saluti,
 20 praevenit auxiliis pericla.
 21 Gentes tumultus concitet impias,
 22 et regna belli concutiat furor,
 23 flammis fremat caelum coruscis,
 24 terrificet labefacta tellus.
 25 Hac et duelli pacis et arbiter
 26 stat, proeliorum qui regit exitus,
 27 munimen, et nostrae salutis
 28 praesidium, Deus Abrahami.
 29 Venite, adeste, et cernite non prius
 30 audita, mira, incognita, quae Deus
 31 patravit in terris ab ortu
 32 solis ad Hesperium cubile.
 33 Funesta belli incendia sustulit,
 34 fregit cruentae spicula lanceae,
 35 contrivit arcus, et volucres
 36 in cinerem minuit quadrigas.
 37 "Sedate motus mentis", ait Deus,
 38 "measque vires noscite, quem colet
 39 quocumque sub caelo repostas
 40 gens hominum colit orbis oras."
 41 Hac et duelli pacis et arbiter
 42 stat, proeliorum qui regit exitus,
 43 munimen, et nostrae salutis
 44 praesidium, Deus Abrahami.

PSALMUS XLVII. OMNES GENTES PLAUDITE etc.

P_2_6 v.1 Telluris omnes incolae
 2 Deo canoros edite
 3 plausus, canoris pangite
 4 laeti Deum praeconiis.
 5 Deum verendum et arduum,
 6 malisque formidabilem,
 7 qui regna fastu turgida
 8 frenat potenti dextera,
 9 qui bellicosa compulit
 10 parere nobis oppida,
 11 nostrumque gentes inclytas
 12 armis coegit sub jugum,
 13 hereditatem qui suam
 14 nobis colendam credidit,
 15 unde Isaci nepotibus

16 aeterna fulget gloria.
 17 En templa scandit praevio
 18 laetum canente classico.
 19 En scandit auctor omnium
 20 vulgi secundis plaudibus.
 21 Cantate laeta carmina
 22 Deo, canora carmina
 23 cantate. Regi psallite
 24 jucunda vestro carmina,
 25 qui sceptrum rerum temperat,
 26 ac regna terrae dividit.
 27 Docti modorum dulcibus
 28 hunc ferte in astra cantibus,
 29 qui dirigit mortalium
 30 res, et salubri vinculo
 31 legum coercet, lucido
 32 e siderum praetorio.
 33 Ad hunc potentes gentium
 34 se contulere principes,
 35 ultroque colla sub jugum
 36 rerum dedere praesides.
 37 Nostrum Deum diis ceteris
 38 sublimiorem agnoscite,
 39 caelum, solumque, et sidera
 40 suo regentem numine.

PSALMUS XLVIII. MAGNUS DOMINUS ET LAUDABILIS etc,

P_2_7 v.1 Rector beate caelitem, cui nil viget
 2 simile aut secundum, caelitem
 3 beate rector, sancta jure te Sion
 4 in astra tollit laudibus,
 5 Sion opacam versa ad Arcton, regia
 6 formosa regis optimi,
 7 Sion voluptas gentium, uberis soli
 8 arvis beatis accubans.
 9 Sensere Domini vindicis potentiam
 10 Solymae superba moenia,
 11 sensere numen, cum feroces viribus
 12 colere reges, copiis
 13 castrisque junctis, servitutum civibus
 14 tuis minati et vincula.
 15 Perstrinxit oculos intuentium stupor,
 16 et horror artus perculit,
 17 quales tremores querulus excitat dolor
 18 vexante partu feminas,
 19 pavorque trepida sparsit attonitos fuga,
 20 Euri procella ut aequoris
 21 undas ab imis penitus attollens vadis,
 22 trepidas carinas dissipat.
 23 Haec facta priscis rettulere saeculis
 24 parvis parentes liberis,
 25 haec nos in urbe vidimus Dei, ratis
 26 qui frenat orbem legibus,
 27 haec urbe in illa vidimus, cui pervigil

28 Deus ipse custos excubat.
 29 O sancte rerum genitor, in rebus malis
 30 tuam advocamus dexteram,
 31 tuas ad aras supplices advolvimur.
 32 O rector orbis optime,
 33 tua laus per oras ultimas mundi, et tuae
 34 imago fulget gloriae
 35 et aequitatis. Te scelestos verbere
 36 plectente justo, gestient
 37 colles Sionis, nec feret tacitum suum
 38 Judae propago gaudium.
 39 Ite, et Sionem obambulate, moenia
 40 spectate, turrets arduas
 41 numerate, fossam et aggerem intuemini,
 42 molesque celsas aedium.
 43 Narrate natis, posterorum ut audiant
 44 et obstupescant saecula,
 45 solumque noscant et colant nostrum Deum,
 46 ortusque finisque inscium,
 47 qui sempiternus sempiterna nos ope
 48 a fraude vique proteget.

PSALMUS XLIX. AUDITE HAEC OMNES GENTES etc.

P_2_8 v.1 Audite, gentes, ortus et occidens,
 2 advertite aures, et medio dies
 3 quos torret axe, et qui vitreum solum
 4 ponti nivali finditis orbita.
 5 Audite, sive ignotus, et infima
 6 de plebe pauper, sive opibus potens,
 7 multaque fulges plebe clientium,
 8 aurique gazis ditibus incubas.
 9 Fontes recludam jam sapientiae,
 10 plenoque promam pectoris e penu
 11 prudentiam ; jam lingua recondita
 12 oracla gestit carmine pandere.
 13 Cur congerendis me cruciem bonis,
 14 famemque et acrem pauperiem timens,
 15 ut vita curis anxia tristibus
 16 me tristiolem trumat ad exitum ?
 17 Gemmis et auro et murice divites
 18 superbientes adspice, qui sibi
 19 gaudent beato plaudere somnio,
 20 tutosque fluxis credere se bonis.
 21 Germanus auro non redimet suum
 22 de morte fratrem, nec pretio Deum
 23 donisve flectet fata retexere,
 24 ut membra liquit frigida spiritus.
 25 Sed nec perennes interitus moras
 26 dives pacisci, nec potis est putres
 27 ne solvat artus tempus edax : vetat
 28 id lege dura fixa necessitas.
 29 Mors aequa stultis et sapientibus
 30 intentat arcum, par manet exitus
 31 vitae hos et illos, occupat improbis

32 ignotus haeres parta laboribus.
 33 Villae superbae delicias breves,
 34 luxuque structas regifico domos
 35 relinquunt, sepulchrique irremeabilis
 36 tenebricosis sub latebris jacent.
 37 Quid fama duris parta laboribus
 38 prodest ? Inanis quid tituli decus ?
 39 Quid aura blandae laudis, et ambitus
 40 nomen futuris prodere saeculis ?
 41 Cum vani honoris ver breve floruit,
 42 letale spirans mortis hiems, viros
 43 et bruta raptans interitu pari,
 44 oblivionis nube pari premit.
 45 Hac stulti ierunt, hanc male providos
 46 ducet nepotes error in orbitam,
 47 quos mors sepulchri sub scrobe conditos
 48 depascet, imbelles ut oves lupus.
 49 Aeterna caeli temperies pios
 50 manes fovebit lucis in aureae
 51 splendore, qualis mane fluit nitor
 52 per prata vernis picta coloribus.
 53 Stultis senectus robora deteret,
 54 pro sumptuosis bustum erit aedibus,
 55 at me benignus de barathri cavo
 56 specu remissum suscipiet Deus.
 57 Nec te cupido sauciet aemula
 58 stuporve, si quem videris impia
 59 de plebe fluxis conspicuum bonis,
 60 clarumve multa fulgere gloria,
 61 cum dexteram mors illacrimabilis
 62 iniecit, et tam divite copia
 63 secum sub umbras nil feret, et comes
 64 infida bustum gloria deseret.
 65 Dum commeantis pectora spiritus
 66 haustu calescunt, perfruitur bonis,
 67 seseque curat molliter, et monet
 68 omnes eundem pergere tramitem.
 69 At cum parentes cesserit ad suos,
 70 longum dolebit stultitiam brevem,
 71 ad regna tractus lucis egentia,
 72 quae semper horror nubilis obsidet.
 73 Rectrix honoris ni sapientia
 74 accesserit, brutis homo bestiis
 75 nil interest. Quos vita facit pares,
 76 exspectat aequae inglorius exitus.

PSALMUS L. DEUS DEORUM DOMINUS LOQUUTUS EST etc.

P_2_9 v.1 Qui frenat aequis legibus arbiter
 2 superba regum colla minacium,
 3 vocabit in jus orbem ab ortu
 4 solis ad Hesperium cubile.
 5 Vultu verendo tum sacer, ardua
 6 pulchrae Sionis de specula loquens,
 7 ad gentis humanae coactum

8 concilium Deus ora solvet.
 9 Non facta semper, non sinet impia
 10 impune grassari. Veniet Deus,
 11 flammae vorax illum antecedit
 12 vis rapidis agitata ventis.
 13 Testes vocabit, cum populo suo
 14 acturus, ignes, lumine conscio
 15 qui cuncta despectant ab alto, et
 16 omniparae sola vasta terrae.
 17 "Adeste primum gens mihi propria,
 18 gens sancta," dicet, "cui super hostiis
 19 legem dedi rite offerendis,
 20 perpetuum pepigique foedus."
 21 Hic aequitatem iudicis igneus
 22 miratus aether, justitiam Dei
 23 annuntiabit. Nam sedebit,
 24 (ne dubita) Deus ipse iudex.
 25 "Audi, Abrahami progenies boni,
 26 peculiaris gens mihi. Te voco,
 27 testem benignitatis in te
 28 perpetuae, et solidi favoris.
 29 Non arguam te, quod mihi victimae
 30 cruore raro altaria sparseris,
 31 aut parcus armenti cremaris
 32 rara sacris holocausta flammis.
 33 "Non taurum egens te de stabulis peto,
 34 hircumve caulis. Omne pecus meum est,
 35 quod montium anfractus pererrat,
 36 quod nemorum tegitur latebris.
 37 Nec me volucris rupis in edito
 38 usquam recessu nidificans latet.
 39 Non ulla picturato amictu
 40 ruris avis genialis hospes.
 41 Quod si esurirem, scilicet ut petam
 42 a te necesse est, arbiter aetheris,
 43 terrae, fretique, et quicquid ingens
 44 orbis habet gremio capaci ?
 45 Taurine vescor carnibus, aut bibo
 46 hirci cruorem ? Pectore candido
 47 grates age, et quovis litabis
 48 rite Deo sine caede voto.
 49 Tum deprehensus rebus in asperis
 50 securus implora, auxilium feram,
 51 grates ut accepta salute
 52 laetus agas, Dominumque laudes."
 53 At impium sic alloquitur Deus :
 54 "Qua fronte leges tu recitas meas,
 55 et ore sanctum impurus audes
 56 sacrilego memorare foedus ?
 57 Tu legum habenis impatiens regi,
 58 et institutis, moribus et bonis
 59 juratus hostis, voce laudas,
 60 tecum animo mea verba rides.
 61 Cum fure furti consilium cois,
 62 moechis adulter te socium applicas.
 63 Ad probra projectus, dolosa

64 perniciem meditare lingua.
 65 Cum fratre juncti vincula sanguinis
 66 oris procacis non rabiem premunt.
 67 Infamia germanum eodem
 68 dedecoras utero creatum.
 69 Et arbitraris me similem tui,
 70 quod perpetrata haec dissimulaverim ?
 71 Ne crede. Tecum expostulabo,
 72 ante oculos tua facta ponam.
 73 Considerate haec vos, quibus excidit
 74 de mente caeca mentio numinis,
 75 ne, cumprehendam, nemo sit qui
 76 de manibus mihi presa tollat.
 77 Si victimam vis magnificam mihi
 78 mactare, laudes canta, age gratias.
 79 Hac itur ad certam salutem,
 80 haec superos via pandit axes."

PSALMUS LI. MISERERE MEI DEUS SECUNDUM MAGNAM MISERICORDIAM TUAM etc.

P_2_10 v.1 O salus rerum, lacrimis precantum
 2 mollibus flecti facilis, rogantem
 3 levis exaudi, scelerumque tetras
 4 abluere sordes.
 5 Usque peccati lave et usque labem,
 6 dum repurgatam maculis pudendis
 7 purius corpus niteat recocto
 8 ignibus auro.
 9 Nam meam agnosco (pudet heu pigetque),
 10 ah miser, labem, vitiique foeda
 11 mentis obversans oculis imago
 12 semper oberrat.
 13 Unus arcani es mihi testis, unus
 14 arbiter verax, temerario ausu,
 15 improbas linguas tua judicantum
 16 facta refutas.
 17 Quippe jam primo scelus usque ab ortu
 18 haeret, infectas vitians medullas,
 19 deque conceptu genetricis hausit
 20 semina labis.
 21 At tibi cordi est sine fraude veri
 22 simplicis candor, fideique certae
 23 puritas, nullo labefacta duri
 24 turbinis ictu.
 25 Hanc facis tanti, vitiis ut atris
 26 oblito, legum sapientiaeque
 27 tu mihi arcanae facilis beatum in-
 28 dulseris haustum.
 29 Ergo me hyssopi, sator alme, lustra
 30 frondis adpersu, maculaeque cedent,
 31 membra candorem tibi lota vincent
 32 pura nivalem.
 33 Si bonus laetum placidusque mittas
 34 nuntium, tristem mihi recreabis
 35 gaudio mentem, stupidos recurret

36 robur in artus.
 37 Ne meos lapsus oculis acutis
 38 semper observa, numerave labes,
 39 sed malae culpa nimium tenaces
 40 ablue sordes.
 41 Cor mihi rectum, scelerisque purum,
 42 o potens rerum genitor, refinge,
 43 spiritum firmum renova novata
 44 cordis in aula.
 45 Neu mihi avertas faciem, tuoque
 46 arceas vultu procul, auferasque
 47 spiritum sanctum, calida incitatus
 48 rursus ab ira.
 49 Redde, speratae solido ut salutis
 50 gaudio per te fruar, inquieti
 51 spiritu motus animi rebelles
 52 principe firma.
 53 Tum meo exemplo moniti scelesti,
 54 quos via flexit malesuadus error,
 55 denuo legum, duce me, tuarum,
 56 jussa capessent.
 57 Expia noxa mihi, sospitator,
 58 caedis infandae caput obligatum, ut
 59 te canam justum, pariterque lapsis
 60 parcere largum.
 61 Tu viam vocis mihi pande, mutum
 62 tu, Deus, linguae moderare plectum.
 63 Tum feram late tua magna gentes
 64 facta per omnes.
 65 Victimae si te caperent, dedissem
 66 victimam. Sed te neque sanguis hirci
 67 fusus aut sacris holocausta placant
 68 addita flammis.
 69 Paenitens fraudum scelerumque pectus,
 70 spiritus fracti, mala cor perosum,
 71 haec Deum placant. Adhibe haec, et usque
 72 ture litabis.
 73 Gentis humanae bone dux, Sionem
 74 quo soles vultu facilis tuere,
 75 pace florentes Solymae beatae
 76 protege turre.
 77 Tum tibi votis bona mens pudicis
 78 sacra persolvit. Sacer hircus ignes
 79 pascet, et sanguis vituli calentem
 80 imbuet aram.

PSALMUS LII. QUID GLORIARIS IN MALITIA, QUI etc..

P_2_11 v.1 Quid gloriaris, impie
 2 tyranne, pravis artibus ?
 3 Innoxiiis clementia
 4 Divina semper excubat.
 5 Tua lingua semper fraudibus
 6 intenta comminiscitur
 7 nefas, nitente cotibus

8 acutior novacula.
 9 Te prava rectis plus juvant,
 10 plus falsa veris recreant,
 11 dolisque pestilentibus
 12 libenter aurem commodas.
 13 Ergo Deus te conteret,
 14 hominumque contubernio
 15 eliminabit, ac domum
 16 evertet omnem funditus.
 17 Justus videbit, et gravem
 18 Dei pavebit dexteram,
 19 vanaque dignos exitus
 20 ridebit impotentia.
 21 "En ille gazis," inquiet,
 22 "malisque fidens artibus,
 23 securus ille numinis
 24 divinae opis nil indigens."
 25 Ego, ceu virens olivula,
 26 Domini in agello consita,
 27 florebo, spe fretus bona
 28 caelestis indulgentiae.
 29 Te semper in coetu pio
 30 fraudis celestae vindicem
 31 canam, et tuae clementiae
 32 spe dura cuncta perferam.

PSALMUS LIIII. DIXIT INSIPIENS IN CORDE SUO etc.

P_2_12 v.1 Opinionum foeda mentem toxico
 2 corpusque scelerum sordibus
 3 contaminata turba, vela dum cupit
 4 suo furori obtendere,
 5 ferri ac referri sortis arbitrio omnia
 6 humana comminiscitur.
 7 Ergo, exsoluta numinis formidine,
 8 dat frena turpitudini.
 9 Scelesta, foeda, abominanda excogitat,
 10 excogitata perpetrat.
 11 Ex arce celsa siderum deflexerat
 12 Dominus in orbem lumina,
 13 si quem videret forte non penitus malis
 14 corruptum opinionibus,
 15 qui mentis oculis omnium fideliter
 16 rerum parentem quaereret.
 17 Erroris omnes nubili fallacibus
 18 fraus illigarat cassibus,
 19 se cuncti eisdem polluere sordibus,
 20 nec recta cuiquam curae erant.
 21 Ergo ille mitis, ille munificus parens,
 22 ira incitatus aspera :
 23 "Gens," inquit, "ista plena scelerum ac sordium,
 24 crudelis animo et impia,
 25 quae panis instar devorat plebem meam,
 26 ecquando cognoscet Deum ?
 27 Ecquando mentis lumine in periculis

28 agnoscet orbis arbitrum ?"
 29 Certe timebit non timenda, et conscius
 30 vexabit horror pectora.
 31 Nam Dominus ossa conteretque, et hostium
 32 ausus retundet impios.
 33 Vultum pudoris turpibus sparget notis,
 34 turbabit animum infamia.
 35 En umquam Eoo lucifer salutifer
 36 ab axe promet hunc diem ?
 37 Ab arce Dominus cum Dionis ardua
 38 speratam opem feret suis,
 39 patriaeque vinclis liberos hostilibus
 40 reddet nepotes Isacii,
 41 electa laudes illius gens ut canat,
 42 perfusa vero gaudio ?

PSALMUS LIV. DEUS IN NOMINE TUO SALVUM ME FAC etc.

P_2_13 v.1 Rerum parens, me protege,
 2 et saevo ab hoste libera,
 3 nomen boni ut colant tuum,
 4 et vim pavescant impii.
 5 Audi benignus supplicem,
 6 nec durus aurem questibus
 7 occlude. Vitae nam meae
 8 crudelis hostis imminet.
 9 Infestus hostis imminet
 10 vitae meae, nec vindicem
 11 Dei potentis dexteram
 12 sibi imminentem respicit.
 13 Rerum sed aequus arbiter
 14 opem feret. Periculis
 15 me liberatum fulciet,
 16 et sospitem tuebitur.
 17 Suis peribit artibus
 18 scelesta fraus, et incident
 19 in ipsa caeci retia,
 20 quae clam mihi tetenderant.
 21 Liber periculo, victimis
 22 te munerabor. Te canam
 23 Patrem, bonis placabilem,
 24 malisque formidabilem,
 25 qui libero molestiis
 26 mihi dedisti gaudia
 27 haurire laeto lumine
 28 de clade gentis perfidae.

PSALMUS LV. EXAUDI, DEUS, ORATIONEM MEAM etc.

P_2_14 v.1 Caelitum rector bone, mitis aurem
 2 admove in rebus trepidis vocanti,
 3 neu meos vultu tetrico severus
 4 despice questus.
 5 Adspice attentus mihi quo tumultu

6 aestuet pectus, gemitu dolores
 7 quo fremant, dum vis mihi frausque saevi
 8 imminet hostis.
 9 Imminet saevus capiti tyrannus,
 10 et meae famae meditatur atrox
 11 crimen, et secum furit impotenti
 12 turbidus ira.
 13 Cor micat, nervis trepidant solutis
 14 ossium nexus, animus labascit,
 15 semper et pallens oculis oberrat
 16 mortis imago.
 17 Ergo sic mecum loquor : "O quis altos
 18 nubium in tractus celeri columbae
 19 me levet penna, nemorum et remotis
 20 sistat in antris,
 21 ut procul cura trepida metuque
 22 montium solos habitem recessus,
 23 ocior ventis ferar et corusci
 24 fulminis alis !"
 25 O Deus, linguas male perde pravas,
 26 illitas linguas gelido veneno,
 27 quae dolis, probris, rabidisque vexant
 28 litibus urbem.
 29 Sive lux fundat radios micantes,
 30 sive nox fundat tenebras opacas,
 31 excubant muris maledicta, vicis
 32 omnibus errant.
 33 Vis, furor, fraudes, scelerum libido
 34 obsidet cunctos aditus viarum,
 35 et fames auri miseram trucidans
 36 fenore plebem.
 37 Si palam saevos inimicus enses
 38 stringeret, si clam laqueos pararet,
 39 dente si famam peteret maligno,
 40 aequior essem.
 41 Tu mihi insultas comes et sodalis,
 42 testis arcani taciturni et auctor
 43 consilii, sacra totiesque junctus
 44 foedere mensae.
 45 Gentis humanae moderator, orbem
 46 qui salutari regis aequitate,
 47 fraudis auctores scelerumque vivos
 48 obrue terra.
 49 At mihi attentam dabis aequus aurem,
 50 sive lux promat radios ab undis,
 51 sive lux condat radios sub undis
 52 vespere sero.
 53 Inter hostiles dabis ut tumultus
 54 tutus evadam. Mihi nam superbis
 55 viribus fretus numeroque saevus
 56 imminet hostis.
 57 O potens rerum, sine fine poenis
 58 tu premes justis scelus impiorum,
 59 arrogans pectus quibus obstinata
 60 intumet ira.
 61 Pace qui ficta simulant amicae

62 mentis affectus, animoque virus
 63 occulunt, prisco neque facta curant
 64 foedere ritu.
 65 Lacteus blando fluit ore rivus,
 66 bella cor spirat fera, suaviorque
 67 balsamo sermo secat instar ensis
 68 vulnere caeco.
 69 Tu tui curam Domino relinque,
 70 is tuos gressus reget, is dolores
 71 leniet, justumque ope sublevabit
 72 rebus in artis.
 73 Impio, fallaci, avidoque caedis
 74 fila mors rumpet viridi in juventa.
 75 Me tui, rector bone, spes favoris
 76 certa fovebit.

PSALMUS LVI. MISERERE MEI, DEUS, QUONIAM etc.

P_2_15 v.1 Orbis creator, me bonus adspice,
 2 injurioso quem pede prorutum
 3 hostisque conculcat, premitque
 4 assiduis agitans periculis.
 5 Conculcat hostis me numero ferox,
 6 et insolenti saevitia premit,
 7 nec liberas lucas laborum,
 8 nec vacuas sinit ire noctes.
 9 Seu luce terror sollicitus mihi,
 10 seu nocte circumstat, pater optime,
 11 spes rebus in duris mihi una,
 12 et columen superas salutis.
 13 Te fretus uno, pollicitis tuis
 14 innixus unis, nec metuam dolos
 15 mortalium caecos, minasque
 16 terrificas, et aperta bella.
 17 Calumniantur quae loquor omnia,
 18 pravaque carpunt facta libidine.
 19 Huc conferunt omnem laborem, ut
 20 exitium mihi moliantur,
 21 coetusque cogunt, et capiti meo,
 22 qua fraude, qua vi, jugiter imminent.
 23 Vestigia observant, nec horam
 24 insidiis vacuam relinquunt.
 25 Impune tantam nequitiam ferent ?
 26 Pravique fructum consilii legent ?
 27 O arbiter mundi, nec illos
 28 praecipites agis in ruinam ?
 29 Meae labores tu numeras fugae,
 30 urna repostas tu lacrimas meas
 31 servas, apud te certa constat
 32 usque mei ratio doloris.
 33 Aurem vocanti tu facilem mihi
 34 das, atque inanes spes facis hostium,
 35 et signa non obscura amici
 36 das animi, et stabilis favoris.
 37 Te fretus uno, pollicitis tuis

38 innixus unis, nil metuam dolos
 39 mortalium caecos, minasque
 40 terrificas, et aperta bella.
 41 Te semper ergo carmine patrio
 42 laudabo, vitae praesidium meae
 43 ex hostium ferro dolisque
 44 incolumis tibi vota reddam.
 45 Te liberatus vindice, te meum
 46 firmante gressum, ne titubent pedes,
 47 dum spiritus fovebit artus,
 48 jussa sequar tua, rector orbis.

PSALMUS LVII. MISERERE MEI, DEUS, MISERERE MEI etc.

P_2_16 v.1 Sancte parens, miserere animae pereuntis, et omnem
 2 in te salutis quae locavit spem suae,
 3 meque tuis alis tectum defende, procellae
 4 dum saevientis impetus deferveat.
 5 Te voco, te (solum in rebus quod restat egenis)
 6 appello, supplex et tuam imploro fidem.
 7 Te voco, qui cumulata mihi promissa refundes,
 8 et coepta duces prosperos ad exitus,
 9 qui mihi subsidium e caelo praebebis, et hostis
 10 jamjam imminentis liberabis faucibus,
 11 qui dabis auxilium ex adyto sublimis Olympi,
 12 memorque fidei et pristinae clementiae.
 13 Inter enim saevos habito feritate leones,
 14 flammam vomentes versor inter belluas,
 15 lingua quibus saevo proscindit acutius ense,
 16 dentes sagittis lanceaeque cuspide.
 17 O Deus, augustum celso caput exere caelo,
 18 ostende terris gloriae jubar tuae.
 19 Explicuere meis pedibus sua retia, terrae
 20 mihi saevus hostis penitus afflictum premit,
 21 et scrobibus fossis iter obsedere. Sed ipsi
 22 mihi paratas in scrobes caeci ruent.
 23 Mens invicta malis, animi vigor integer, orbis
 24 te voce rector, te celebrabit lyra.
 25 Eia age depositis, mens, expergiscere curis,
 26 et tu, canora barbitos cum nabliis,
 27 ocus aurorae quam lucifer excitet ignes,
 28 aurora cantus quam volucrum exsuscitet.
 29 Te, pater alme, canam, populos tua facta per omnes,
 30 quacumque tellus panditur vates feram.
 31 Nam tua siderei bonitas fastigia caeli,
 32 fidesque tractus nubium supervolat.
 33 O Deus, augustum nitido caput exere caelo,
 34 ostende terris gloriae jubar tuae.

PSALMUS LVIII. SI VERE UTIQUE JUSTITIAM LOQUIMINI etc.

P_2_17 v.1 Qui jura celso de solio datis,
 2 qui frena legum flectitis, en erit
 3 de plebis ut causis egenae

4 iudicio statuatis aequo ?
 5 Quin mente prava nequitiam et dolos
 6 versant, sub umbra justitiae tegunt
 7 injuriam. Factis honesti
 8 objiciunt speciem pudendis.
 9 Materna ab alvo flagitii viam
 10 sensim sequuntur, perque suos gradus
 11 obliqua sectandi libido
 12 cum teneris adolescit annis.
 13 Lingua venenum pestifera gerunt,
 14 auresque claudunt consiliis, velut
 15 obturat aures callida aspis,
 16 quae magicos metuit susurros.
 17 Confinge malas, o Deus, impudens
 18 os comminutis contere dentibus,
 19 et rictibus saevis hiantes
 20 hos inhibe catulos leonum.
 21 Emissa fracta cuspage spicula
 22 intercidant, nec vulnera perferant,
 23 ipsique vanescant repente,
 24 per bibulas velut unda arenas.
 25 Sensim liquescant, tardigradus velut
 26 limax, acerbo funere deserant
 27 vitale lumen, more foetus
 28 ante suum pereuntis ortum.
 29 Florentis aevi in limine, turbinis
 30 vis atra tollat progeniem, prius
 31 quam surculus spinas tenellus
 32 exserat, et stimulis acutis
 33 fecunda late brachia porrigat.
 34 Justique poenae vindicis exitum
 35 laeti videbunt, impiique
 36 sub pedibus fluvium cruoris.
 37 Vitae bene actae gens hominum sciet
 38 manere justos praemia, at impios
 39 manere poenas, arbitrumque
 40 esse Deum sciet orbis aequum

PSALMUS LIX. ERIPE ME DE INIMICIS MEIS etc.

P_2_18 v.1 Ab hostis inclementia
 2 me, rector orbis, assere,
 3 defende vim crudeliter
 4 me semper oppugnantium.
 5 Ab improbis me protege
 6 laetis cruore innoxio,
 7 meae salute per dolum
 8 qui caeca tendunt retia.
 9 Ultro immerentis in caput
 10 consilia cuncta conferunt.
 11 Exsurge, teque pessimis
 12 fer obviam conatibus.
 13 O arbiter mortalium,
 14 ex agminum caelestium,
 15 favore semper qui pios

16 peculiari amplecteris,
17 exsurge, poenis impias
18 compesce gentes, perfidis
19 neu parce, qui sibi favent
20 nefanda cum patrauerint.
21 A sole Eoo ad Hesperum
22 perambulabunt compita,
23 et instar oblatrantium
24 canum feroces obstrepent.
25 Nihil nisi merum crepant
26 ferrum, cruorem, vulnera,
27 et quae loquuntur propalam
28 clam posse rentur obrui.
29 Meae salutis tu, Deus,
30 tutela praesens, irritas
31 ridebis iras, et tua
32 me dextera tueberis.
33 Tu robur es meum, meae
34 vires et arx fiduciae,
35 ergo quieto pectore
36 exspecto spe tui auxilii.
37 Discrimina imminetia
38 ope antevertes, et malis
39 fracta hostium superbia,
40 laeto fruar spectaculo.
41 Ne prorsus impios tamen
42 una ruina elimina,
43 oblivioso ne pii
44 torpore recta negligant,
45 sed error illos dissipet
46 vagos per orbis ultimas
47 oras, tuaque dextera
48 semen piorum protege.
49 Ob oris arrogantiam,
50 virusque linguae noxium,
51 mendacia et perjuriam,
52 consume semen impium.
53 Evelle stirpe ab ultima
54 justi furoris impetu,
55 ut norit orbis ultimus
56 Deum bonorum vindicem.
57 A sole Eoo ad Hesperum
58 perambulabunt compita,
59 et instar oblatrantium
60 canum procaces obstrepent.
61 Passim vagati, pauperem
62 victum ut parent, sub vesperum
63 serum petant cubilia,
64 victus egentis pauperis.
65 Ego interim Deum canam,
66 fortem bonumque, in asperis
67 rebus suorum vindicem,
68 fidumque propugnaculum.
69 Deum canam, qui robore
70 me fulcit, auget viribus,
71 benignitate sublevat,

72 tuetur arx ut aenea.

PSALMUS LX. DEUS REPULISTI NOS etc.

P_2_19 v.1 Sancte parens, nostris vitiis offensus, abactos
 2 pressosque duris dissipasti nos malis,
 3 placatus mitisque veni, jamque immemor irae
 4 salutis auctor ad tuos revertere.
 5 Omnis ager rimis, te concutiente, dehiscit.
 6 Committe rimas, refice quassatum solum.
 7 Dura tuae genti spectacula ferre dedisti
 8 inebriatae poculo formidinis.
 9 At trepidos laudemque animi miseratus egenos,
 10 signum salutis efferes, qui te colunt,
 11 veridicis freti oraclis, formidine mersum
 12 erigere rursus audeant ut verticem,
 13 eripiasque tuos gelidi formidine leti
 14 praesens, et opifer invocantes audias.
 15 Audiit, ex adytoque Deus flammantis Olympi
 16 vocem rependit gaudii praenuntiam.
 17 En tibi frugiferos Sichimae dispertiar agros,
 18 vallem Suchoti metiar decempeda.
 19 Nonne mihi parent Jacobi pignora, quisquis
 20 vel pecore tondet arva, vel vomere secat ?
 21 Oppida sub pedibus Syriae calcabo superbae,
 22 Moabum, Idumen, et Palaestinas domos.
 23 Quis mihi pandet iter munitas ductor ad arces ?
 24 Muros Idumes divitis quis diruet ?
 25 Quis nisi tu nostrae gentis, Deus, unice tutor,
 26 qui nos premendos hostibus reliqueras,
 27 offensus vitiis pravis, nec in arma ruentes
 28 nostros praeibas dux, ut ante, exercitus.
 29 Nunc, pater, auxilium rebus bonus adfer in artis,
 30 humana fallax credulos spes decipit.
 31 Te duce, victrici decorati tempora lauro,
 32 pedibus prememus hostis arrogantiam.

PSALMUS LXI. EXAUDI, DEUS, DEPRECATIONEM MEAM etc.

P_2_20 v.1 Audi vocantem me bonus, et meis
 2 intentus aurem da precibus, Deus.
 3 Projectus oris orbis in ultimis
 4 ad te recurram rebus in asperis.
 5 Me siste rupis culmine in arduo
 6 procul periclis. Semper enim tui
 7 spe fretus, hostis tutus ab impetu,
 8 munitae ut arcis praesidio fui.
 9 Tentorio fac semper ut in tuo
 10 degam, sub alis protegar et tuis,
 11 qui lenis aurem das precibus meis,
 12 qui vota laetum ducis ad exitum.
 13 Frenare sceptris te metuentium
 14 hereditatem das mihi. Regiae
 15 tu longa vitae tempora porrigens

16 nectes peractis saecula saeculis.
 17 Securus ut te perpetuo colat
 18 rex, liberalem porrige dexteram
 19 fortuna in omni, quaque soles fide
 20 fac ut fruatur pollicitus tuis.
 21 Ac tum periculis liber ab asperis,
 22 te voce, dulci te cithara canam,
 23 pacti tenacem, et munificum tuis,
 24 et vota ad aras perpetuo feram.

PSALMUS LXII. NONNE DEO SUBIECTA ERIT ANIMA MEA ? etc.

P_2_21 v.1 Mens acquiescit unice mea in Deo,
 2 hinc spes salutis, arduis
 3 in rebus arx haec. Tutus hoc munimine
 4 nullum tremiscam ad impetum.
 5 Quousque tectis fraudibus subvertere
 6 innoxium tentabitis ?
 7 Poenas daturi mox et ipsi, improvidi
 8 jamjam imminentis exitus,
 9 proni in ruinam incumbitis, ceu moenia
 10 saxi solutis putria,
 11 et interim omnes corporisque et ingenii
 12 vires eo contenditis.
 13 Vobis placetis fabulis vanis, gradu
 14 turbetis impii ut pium.
 15 Clam devovetis corde tacito, propalam
 16 laudatis ore subdolo.
 17 At tu acquiesce, mens mea, in Deo tamen,
 18 hinc spes salutis, arduis
 19 in rebus arx haec. Tutus hoc munimine
 20 nullum tremiscam ad impetum.
 21 Spes inde vitae et gloriae pendet meae,
 22 et roboris fiducia.
 23 Quocumque caeli gens colis sub sidere,
 24 huic crede rem, sobolem, domum.
 25 Omnes ad illum mentis aegritudines
 26 et laeta defer et refer,
 27 semperque praesens numen ejus omnibus
 28 adesse coeptis senties.
 29 Ventosa regum et principum potentia
 30 est vanitate vanior,
 31 adeoque fumo levior, ut si principum
 32 hac lance vires omnium,
 33 inanitatem hac colloques, cunctis simul
 34 inanitas praeponderet.
 35 Ne firma spera parta per vim, ne nimis
 36 confide stultis viribus.
 37 Opes abundant affluenter ? Ne bonis
 38 da rebus animum credulum.
 39 Semel est professus, nec semel tantum Deum
 40 id profitentem audivimus,
 41 se posse solum cuncta, se solum bonum,
 42 et arbitrum rerum unicum,
 43 bonis benignum semper et placabilem,

44 malisque formidabilem.

PSALMUS LXIII. DEUS, DEUS MEUS, AD TE DE LUCE VIGILO etc.

P_2_22 v.1 Deus, salutis auctor et custos meae,
 2 te veneror roseus cum fugat astra dies.
 3 Te mens anhelat, membra sitiunt languida,
 4 terra velut pluvias arida quaerit aquas.
 5 Quamvis arenas aridas aestu colam,
 6 praesentem Dominum mens videt usque meum.
 7 Non aliter adyta arcana quam si conspicer,
 8 numinis adservant quae monumenta tui.
 9 Nec dulcis aequae est vita quam benignitas,
 10 qua vitam munis prosequerisque meam.
 11 Ergo remotis dissitus quamvis locis,
 12 praesidio tutus te celebrabo tuo.
 13 Tui sonabunt nominis praeconia,
 14 quae dederis vitae tempora cumque meae.
 15 Nec victus aequae recreat corpus, tua
 16 excitat ut mentem laus celebrata meam.
 17 Tu nocte carmen, mane tu carmen mihi es,
 18 tu trepido praesens fers mihi semper opem.
 19 Securus alis conquiesco sub tuis,
 20 teque procul curis et tua facta canam.
 21 Te quaerit animus, te colit, te deperit,
 22 tu valida fulcis me, pater alme, manu.
 23 At qui laborant per nefas me perdere,
 24 consiliis pravis digna ruina premet,
 25 ferro profundent spiritum nefarium,
 26 membra dabunt avidis dilanianda lupis.
 27 Rex laetus autem vindicem agnoscet Deum,
 28 et quicumque Dei numina rite colunt,
 29 metu stupentes conticescunt impii,
 30 spe stolidi fluxis qui tumuere bonis.

PSALMUS LXIV. EXAUDI, DEUS, ORATIONEM MEAM etc.

P_2_23 v.1 Audi, sancte parens, non tetricus preces
 2 te poscentis opem rebus in asperis,
 3 et fallacis ab hostis
 4 vitam fraudibus eripe.
 5 Pravorum tacitis factio me dolis
 6 oppugnat, trucibus consiliis fremunt,
 7 conspirantque scelesti.
 8 Tu me, dux bonus, eripe.
 9 Linguas ceu gladios exacuunt suas,
 10 oris pestiferi verba nefaria
 11 intentant, medicata
 12 tamquam spicula toxico,
 13 ut rectos animi ex insidiis petant,
 14 et securi avida mente coquunt nefas,
 15 nec quemquam malefacti
 16 formidant fore vindicem.
 17 Designant animis horrificum scelus,

18 et saevo laqueos consilio parant.
 19 Inter seque loquuntur,
 20 nemo conscius haec sciet.
 21 Cor, mens, ingenium, consilium, labor,
 22 huc tendunt, facies ut scelerum novas
 23 et fraudum meditentur,
 24 hoc unum studium fuit.
 25 Ast illos subiti cuspide spiculi
 26 incautos feriet magna Dei manus,
 27 et letalia certa
 28 figet vulnera dextera.
 29 Spectantes gelidus corripit timor,
 30 auctori exitium cum videant suae
 31 dirum immittere linguae
 32 virosae mala toxica.
 33 Gens humana tuae robora dexteræ
 34 agnoscet, meritis laudibus efferet,
 35 et mirabitur altae
 36 lumen perspicientiae.
 37 Iusti spes animos eriget, et Dei
 38 tutus praesidio laetitia fremet,
 39 et gaudentia corda
 40 vero simplice gestient.

PSALMUS LXV. TE DECET HYMNUS, DEUS, IN SION etc.

P_2_24 v.1 Te manent laudes, Deus, in Sione,
 2 hic tibi castis operata sacris
 3 vota gens solvet tua, victimisque
 4 imbuet aras.
 5 Quique tam praesens tibi supplicantium
 6 exitus votis tribuas secundos,
 7 te petent gentes sub utroque mundi
 8 axe jacentes.
 9 Nostra nunc justis scelerata facta
 10 nos premunt poenis, facilis querelis
 11 tu tamen flecti, mala servitutis
 12 vincula franges.
 13 O quater, plusquam quater o beatos,
 14 quos leges, lectos facies amico,
 15 ut colant puri tibi dedicati
 16 atria templi.
 17 Illa lux felix, cumulata cunctis
 18 lux bonis, pectus satiabit aegrum
 19 gaudio, quae nos reduces sacrata
 20 sistet in aede.
 21 Annues nostris facilis querelis,
 22 finium terrae, Deus, ultimorum
 23 spes, et extremas maris ambientis
 24 gurgite terras.
 25 Tum stupor mentes quatiet tuentum,
 26 o Deus, nostrae columen salutis,
 27 te malis durum, miseris benignum,
 28 omnibus aequum.
 29 Tu potens rerum, validisque pollens

30 viribus, firmas stabili catena
 31 montium tractus, jugaque inquietis
 32 tunsa procellis.
 33 Tu maris nigris agitata ventis
 34 terga componis, cohibes rebelles
 35 gentium motus, placidaque mutas
 36 pace tumultus.
 37 Ultimi rerum tua signa norunt
 38 et pavent fines, quoties coruscis
 39 turgidum flammis fremuit sonoro
 40 murmure caelum.
 41 Quique Phoebaeos habitant ad ortus,
 42 et quibus sera face Phoebus undas
 43 tingit, auctorem te hilares fatentur
 44 lucis et umbrae.
 45 Tu solum terrae sitientis imbrem
 46 laetus invisis, gravidaeque nubis
 47 de sinu fundis genitale pigros
 48 semen in agros.
 49 Alveus pleno tibi semper amne
 50 turgidus laeta novat arva fruge,
 51 floribus campos, nemorum virentes
 52 fronde recessus.
 53 Rore tu leni sola contumacis
 54 maceras terrae, subigisque glebas,
 55 ebrios sulcos viridante amictu
 56 messis inumbras.
 57 Qua feres gressus, renovabis annum
 58 fertilem frugum, vegetansque fetus
 59 per cavas valles riguosque saltus
 60 impluet humor.
 61 Gestiet pauper tuguri colonus,
 62 lacte distentas comitans capellas.
 63 Mugient colles, et amica fessis
 64 silva juvencis.
 65 Spes aratoris cupidas fovebat
 66 fluctuans latis seges alma campis,
 67 ut canat festa tibi feriatas
 68 carmen in umbra.

PSALMUS LXVI. JUBILATE DEO OMNIS TERRA etc.

P_2_25 v.1 Incolae terrarum, ab ortu
 2 solis ultimum ad cubile
 3 eia Domno psallite.
 4 Eia Domno jubilate.
 5 Nomen ejus, numen ejus
 6 ferte in astra laudibus.
 7 Dicite illi : "Rector orbis
 8 sancte, quam stupenda rerum
 9 est tuarum gloria !
 10 Quanta virtus, qua protervos,
 11 mente fracta, cogis hostes
 12 supplices procumbere !
 13 Te parentem laeta honoret,

14 te potentem prona adoret
 15 tota rerum machina.
 16 Voce blanda te canamus,
 17 barbito dulci sonemus,
 18 carminumque cantibus."
 19 Eia adeste, facta cunctis
 20 cernite admiranda saeclis,
 21 acriterque expendite
 22 facta providi parentis,
 23 facta Domni consulentis
 24 arte mira servulis.
 25 Vertit aequor aestuosum
 26 aridae in campos arenae.
 27 Fluminis per alveum
 28 agmen ire gratulantum,
 29 ceu per arva sicca, fecit
 30 stante fluctu languido.
 31 Frenat unus orbem habenis
 32 sempiternis. Intuetur
 33 et pios et impios,
 34 nec sinit sibi rebelles
 35 viribus fretos superbis
 36 improbis votis frui.
 37 Laus Deo nostro per omnes
 38 orbis oras, omnis unum
 39 laudet illum natio.
 40 Morte liberavit unus
 41 nos propinqua, fulcit unus
 42 liberos firmo gradu.
 43 Igne ut aurum, examinasti
 44 nos periclis, illigasti
 45 hostium nos cassibus.
 46 Vincla lumbis, frena malis
 47 sub tyrannis induisti
 48 impotentis imperi,
 49 sed per ignes, sed per undas,
 50 divitis tamen dedisti
 51 uber agri exercitis.
 52 Ergo supplex introibo
 53 templa, victimasque caedam,
 54 vota supplex offeram,
 55 vota duris in periclis
 56 nuncupata. Pinguis agnus,
 57 cornigerque agni parens,
 58 bos et hircus sanguine aras
 59 imbuent, nec tura deerunt
 60 de Sabaeo stipite.
 61 Dum Dei benignitatem
 62 explico in me, cuncti adeste
 63 qui Deum veremini.
 64 Audiit statim vocantem,
 65 nos vocantes audientem
 66 prosequemur laudibus.
 67 Conscios sceleris nefandi
 68 supplicantes rector orbis
 69 aure surda respuit.

70 At mihi lenis bonusque
 71 supplicanti semper aurem
 72 non severam commodat.
 73 Gratias ago parenti
 74 optimo, qui se roganti
 75 asperum non praebuit,
 76 qui sua benignitate
 77 destitutum non reliquit
 78 rebus umquam in asperis.

PSALMUS LXVII. DEUS MISEREATUR NOSTRI etc.

P_2_26 v.1 Arbiter mundi, placidus bonusque
 2 parce delictis, solito et favore
 3 terra fac laetis segetem, pecusque
 4 nutriat arvis,
 5 nota per terras bonitas ut omnes
 6 sit tua, et nostrae studium salutis,
 7 mente quos curas patria, tegisque
 8 rebus in artis.
 9 Ut tuas laudes populi per omnes,
 10 praedicent terras, bonitatis usque ad
 11 terminos rerum celebretur omnes
 12 fama per urbes.
 13 Omnis exsultet locus, omnis aetas
 14 gestiat plausu et fremitu secundo,
 15 res quod humanas modereris aequi
 16 juris habenis.
 17 Ut tuas laudes populi per omnes
 18 praedicent terras, bonitatis usque ad
 19 terminos rerum celebretur omnes
 20 fama per urbes.
 21 Si tuae genti faveas benignus,
 22 conditor mundi bone, messis agros
 23 vestiet, vites oleaeque colles,
 24 gramine colles.
 25 Si tuae genti faveas benignus,
 26 conditor mundi bone, te pavebunt
 27 et colent gentes sub utroque mundi
 28 axe jacentes.

PSALMUS LXVIII. EXSURGAT DEUS ET DISSIPET INIMICOS etc.

P_2_27 v.1 O qui perpetuis orbem moderaris habenis,
 2 placidos bonus exere vultus,
 3 impietasque exosa tuas, pater optime, leges,
 4 tremefacta repente facesset,
 5 ut levis in tenues fumi vapor effugit auras,
 6 ut cera liquescit ab igni.
 7 At laetis pia turba animis sua gaudia plausu
 8 testabitur, et tibi, rerum
 9 sancte parens, paeana canet, qui lucida caeli
 10 veheris supera astra, nec aevi
 11 inclusus spatiis, aeternis legibus orbem

12 aeternus et ipse gubernas.
 13 Te canimus laeti, et laetos renovamus honores,
 14 qui celsi e vertice mundi
 15 respicis humanas curas, et patribus orbos
 16 pueros, viduasque maritis
 17 prosequeris patrio affectu, qui prole beata
 18 steriles solare hymenaeos.
 19 Compedibus vinctos solvis, populi arva rebellis
 20 bibulis obducis arenis.
 21 Isacidae Nilo cum, te ductore, relicto
 22 Arabum per inhospita saxa
 23 errarent, tremuere soli penetralia, caelum
 24 maduit sudoris anhelii
 25 imbribus, a vultu Domini conterrita durae
 26 tremuere cacumina Sinae.
 27 Arva sibi selecta bonus rigat imbri benigno,
 28 et cum labefacta fatiscunt,
 29 confirmat recreatque afflicta, suoque fruenda
 30 dat habere gregi, nec egenam
 31 temporibus duris virtutem deserit. Arma
 32 trepida formidine belli
 33 cum quatit animos, laetum celebrare triumphum
 34 teneris dabit ille puellis,
 35 sufficietque suas in laudes carmina. Reges
 36 numeroso milite freti
 37 terga dabunt latebrasque petent, spoliisque fruatur
 38 imbellis turba relictis.
 39 Vestra licet somno sternantur corpora nigrae
 40 inter fuliginis ollas,
 41 illa tamen vincent nitidam candore columbam
 42 rutilae cervicis honore,
 43 quae nunc argentum nitidum, nunc lumina blandum
 44 radiantis provocat auri.
 45 Cum Deus omnipotens traduceret agmina regum
 46 longo spectanda triumpho,
 47 squalida quae luctu et tenebris Solyma ante jacebat,
 48 nivea tum luce refulsit,
 49 ceu nive vicinos inter candentia colles
 50 Salmonis culmina fulgent.
 51 Usque sibi Basan placeat, jactetque superbus
 52 fastigia proxima caelo,
 53 ne tamen herbiferos saltus, ne pascua sacro
 54 ausit conferre Sioni.
 55 quam propriam pater omnipotens in saecula sedem
 56 legit, lectamque tuetur,
 57 ille pater quem caelituum tot millia currum,
 58 equitum tot millia stipant.
 59 Sive ille excelsae vehitur per culmina Sinae,
 60 sua seu sacraria visit,
 61 seu scelerum vindex celebri petit astra triumpho,
 62 captivaque colla catenis
 63 vincta trahit, victae passim donaria gentes
 64 cumulant. Paulo ante rebelles,
 65 poplite nunc flexo venerantur templa Sionis.
 66 Igitur celebramus honores
 67 jure tuos, nullum nobis qui munere lucem

68 vacuam sinis ire, salutis
69 unica spes nostrae. Nempe unus frena gubernas
70 vitae, irremeabilis Orci
71 unus claustra tenes, et nutum fata sequuntur.
72 Inimicos vulnere certo
73 tu figis, longa scelerum tu sorde sepultis
74 letali tempora plaga
75 dividis. At caros sic consolaris amicos,
76 extremo a littore ponti
77 vos ego crudeli incolumes ex hoste reducam,
78 rubri ceu trans freta ductos
79 aequoris a saevo incolumes servavimus Ogo.
80 Caesorum in sanguine regum
81 tingent crura, canes hostilia vulnera lambent.
82 Laetae spectacula pompae
83 adspicient, pater alme. Tuo, pater alme, triumpho
84 plaudent tua templa petentes.
85 Anteibunt qui voce canant, qui cymbala pulsant,
86 citharae tuba juncta, tubaeque
87 tibia, quaeque tuas celebrant, fortissime, laudes,
88 doctae pulsare puellae
89 tympana. Te populi coetu fremituque secundo
90 et plausu ad sidera tollent,
91 Isacidaeque tuas in laudes ora resolvent.
92 Juvenis de stirpe creatus
93 Benjamini, Judaeque aderit generosa propago.
94 Neque clarus Zabulo deerit,
95 Nepthalidaeque duces. Nam tu tua jussa secutis
96 viresque animosque ministras,
97 Claraque victrici das tempora cingere lauro.
98 Solymae victoria praepes
99 ex adytis volat. Ergo ferent tibi munera reges,
100 atque ad tua templa ferentes
101 munera te super astra ferent. Tu freta sagittis
102 letalibus agmina fundis,
103 tu fortesque domas dextras, animosque rebelles,
104 humiles tibi pendere cogis
105 vectigal fractosque duces, avidique cruoris
106 vindex populi agmina perdis.
107 Quique bibunt Nilum, qua mergitur aequoris undis,
108 quique ipso fontis in ortu,
109 accurrent, pacemque petent opulenta ferentes
110 tibi munera supplice dextra.
111 Regna hominum celebrate Deum, date carmina regi
112 qui templa gubernat Olympi
113 aeterna aeternus, cujus mortalia cuncta
114 vocem tremefacta pavescunt.
115 Hunc fortem celebrate, unique accepta referte
116 bene gesti prospera belli,
117 cujus in Isacidis resplendet gloria, cujus
118 testantur robora nubes,
119 cujus ab arcano templo venerabilis horror
120 stupefacta in pectora manat.
121 Isacidum Deus ille, Deus qui robore nervos,
122 animosque vigore suorum
123 implet : ei laudes Jacobi dicite proles,

PSALMUS LXIX. SALVUM ME FAC, DEUS etc.

P_2_28 v.1 Sancte parens, fer opem lasso. Torrentibus undis
 2 paene obruerunt me malorum flumina.
 3 Pes nequit in molli vestigia figere limo,
 4 pronumque inundans vertici fluctus rapit.
 5 Dum clamo, arentes urit sitis arida fauces,
 6 spectando lassa torpuere lumina.
 7 Me vexant odiisque premunt immanibus hostes,
 8 plures inumbrant quam capilli tempora.
 9 Inque dies crescunt numero et, ceu rapta rependam,
 10 bene parta per vim cogor illis reddere.
 11 Simplicitas tibi nota mea est, bone conditor orbis,
 12 meaeque testis semper innocentiae es.
 13 Fac, pater alme, bonis ne sint mea damna pudori,
 14 dum te colentes clade cernunt opprimi.
 15 Te propter maledicta tuli et ludibria vulgi,
 16 te propter ora turpis infecit pudor.
 17 Me vitant fratres, et eadem e matre creati
 18 me ceu scelestum abominantur filii.
 19 Uror, et ira coquit penitus praecordia, leges
 20 tuosque ritus impii cum negligunt.
 21 In tua quae jactant probra et convicia sacra,
 22 in me recurrunt, corque vulnerant meum.
 23 Si fleo jejunos, si macero pectora curis,
 24 rident, probrisque prosequantur lacrimas.
 25 Si tegor incultos saccis squalentibus artus,
 26 fio repente fabula et ludibrium.
 27 Me salibus petit e portae statione senectus,
 28 et ebriosae sum tabernae cantio.
 29 Interea curis, genitor, confectus acerbis
 30 ad te recurro. Tu benignus respice.
 31 O genitor, sine fine bonus, sine fraude fidelis,
 32 in rebus artis da salutarem manum.
 33 Erige paene luto absorptum, da figere gressum,
 34 crudelis hostis me eripe impotentiae.
 35 Neu rapiat torrentis aquae violentia, neu me
 36 mergatve gurgis, aut vorago absorbeat.
 37 Sancte parens, nullos cujus clementia fines
 38 novit, vocantem et destitutum respice.
 39 Ne faciem servo avertas, qui rebus egenis
 40 supplex opem orat : subito miserum subleva.
 41 Mitis ades, serva hanc animam, ut pudor obruat hostes,
 42 qui ceu relictum me enecant conviciis.
 43 Tu testis mihi probri ignominiaeque superbae,
 44 tu testis hostes quam proterve illuserint.
 45 Cor dolor urebat : socius mihi nemo doloris,
 46 nemo dolorem qui levaret anxium.
 47 Dulcia felle mihi tingebant fercula amaro,
 48 pro vino aceti porrigebant pocula.
 49 Ergo victum illis vitient aconita vicissim,
 50 maerorque laeta obnubilet convivium.
 51 Unde sibi placidae promittunt otia pacis,

52 hinc semen illis pullulet discordiae.
 53 Caligent oculi et nutent vestigia, vires
 54 elumbe corpus deserant. Iram tuam
 55 sic meritos effunde super, tuus hauriat illos
 56 furor, colonis tecta vidua maereant.
 57 Qui deserta habitet tentoria nemo supersit,
 58 quia persecuntur dextera afflictos tua,
 59 afflictos miserosque procaciter insultantes,
 60 verbis acerbant vulnera atque injuriis.
 61 Tu sine peccatis cumulent peccata, nec umquam
 62 dulcem aequitatis sentiant fructum tuae.
 63 Impia de tabulis viventum nomina dele,
 64 tuos nec inter hos recense filios.
 65 Me tenuem afflictumque tua, pater optime, dextra
 66 erige, locoque siste tutum in arduo.
 67 Hic ego carminibus rerum super astra parentem
 68 tollam, et celebri gratias in coetu agam.
 69 Gratius hoc illi est quam si cadat hostis ad aram
 70 vitulus tenellus jam coniscans cornibus.
 71 Adspicient mites, et pectore gaudia volvent,
 72 Deum colentum laeta corda gestient.
 73 Audit enim Dominus tenues, nec despicit aegros
 74 ob nomen ejus vinculis coercitos.
 75 Unum igitur tellus colat hunc, et pontus, et aether,
 76 et quicquid aether, terra, pontus continet,
 77 qui facit incolumem pulchram florere Sionem,
 78 urbesque Judae moenibus cingit novis,
 79 metiturque suis rura ante inculta colonis,
 80 tenenda blandis quae relinquunt liberis,
 81 quae placida teneat series in pace nepotum,
 82 quicumque Domini nomen et numen colunt.

PSALMUS LXX. DEUS IN ADIUTORIUM MEUM INTENDE etc.

P_2_29 v.1 O Deus, praesens ades, et periculis
 2 me praesentibus eripe.
 3 O Deus, duros propera labores
 4 confestim auxilio ut leves.
 5 Qui meam quaerunt animam erubescant,
 6 foedam ignominiam ferant,
 7 et fuga turpi doleant malignis
 8 qui me consiliis petunt.
 9 Terga dent, fusos pudor ut perurat
 10 qui rident gemitus meos,
 11 teque clementi et placido fruuntur
 12 qui gaudent placitis tuis.
 13 Qui salutis spem posuere in uno
 14 te certam penitus Deo,
 15 gaudeant, semperque canant : "Perennis
 16 majestas et honor Deo."
 17 Sunt meae vires et opes pusillae,
 18 sed tu me, Deus, adjuva.
 19 Tu meae vires, mea spes opesque,
 20 festinus fer opem mihi.

PSALMUS LXXI. IN TE, DOMINE, SPERAVI, NON CONFUNDAR etc.

P_2_30 v.1 In te salutis spem posui meae,
 2 fac me perennis ne pudor obruat.
 3 Audi vocantem lenis, et eripe
 4 hostis cruenti me violentiae.
 5 Vitaeque custos et columen meae,
 6 turrisque rebus semper in asperis,
 7 nunc turris esto et perfugium mihi,
 8 et saevientum subtrahe dexteræ.
 9 A vi scelestæ subtrahe dexteræ
 10 pendentem ab uno subsidio tuo,
 11 et qui juventæ tutor eras meae,
 12 orbam senectam viribus assere.
 13 Tu me tuendum matris ab ubere
 14 duxti, pependit matris ab ubere
 15 spes nostra de te. Materies meis
 16 una est perennis laus tua cantibus.
 17 Ceu continenter prodigium malis
 18 natum ferendis, rideor impiis,
 19 sed me malorum fluctibus obrutum
 20 spes una fulcit praesidii tui.
 21 Me lux videbit, me tenebrae tuas
 22 laudes canentem. Jam senio gravem,
 23 fractisque lasso corpore viribus,
 24 ne me impiorum trade libidini.
 25 Et clam susurrant, et caput in meum
 26 occulta tendunt retia per scelus,
 27 et dum scelestum propositum premunt,
 28 aiunt : "Ope illum destituit Deus.
 29 Instate fracto, prendite perditæ
 30 nudum salutis vindice." Tu, Deus,
 31 ne linque fretum praesidio tuo,
 32 praesensque saevis hostibus eripe.
 33 Pudore vultus inficiat rubor
 34 hosti doloso, fraude nefaria
 35 qui me aucupatur. Maereat irrita
 36 conata, vanum lugeat exitum.
 37 Liber periculis, carmine te novo
 38 pangam tenacem polliciti, et tuis
 39 promptum juvandis, et numeris meis
 40 aptabo laudes innumeras tuas.
 41 Canam potentem te dare prospera
 42 eventa, belli cum fremuit timor.
 43 Canam fidelem reddere foederum
 44 promissa, largo non sine fenore.
 45 Abusque primo flore puertiae
 46 laudum tuarum tu mihi carmina
 47 semper praeisti. Ne senio gravem
 48 canumque nunc me, spes mea, desere,
 49 donec nepotum saecula noverint,
 50 me vate, quanto robore, qua fide
 51 me liberaris. Justitiae tuae
 52 convexa mundi gloria transvolat.
 53 Rerum creator, quis similis tui ?

54 Qui me malorum gurgite merseras,
 55 mitisque vita rursus amabili
 56 tracto e profundo gurgite das frui,
 57 opesque honoresque accumulās bonus,
 58 ira remissa, et pectora turbida
 59 solaris. Ergo te cithara canam
 60 nabloque, certa conspicuum fide.
 61 O sancte, nostrae gentis ab ultimo
 62 protector ortu, vox mea te canet.
 63 Te spiritus, te vita laboribus
 64 exempta duris, laudibus efferet.
 65 Lux nulla solem proferet aureum,
 66 quae praedicantem justitiam tuam
 67 non audiet me, rex bone, qui meis
 68 rubore vultum offuderis hostibus.

PSALMUS LXXII. DEUS, JUDICIUM TUUM REGI DA etc.

P_2_31 v.1 Da tuae regi, Deus, aequitatis
 2 jus ad exemplum dare, filioque
 3 regis, ut legum patriae ad salutem
 4 flectat habenas.
 5 Ut regat justis populum institutis,
 6 pauperum questus facili tuorum
 7 aure cognoscat, dirimatque lites
 8 legibus aequis.
 9 Pace laetentur juga montiumque
 10 horridi saltus. Genetrix quietis
 11 aequitas colles amet, asperosque
 12 ruris alumnos.
 13 Jus suum det pauperibus, potentum
 14 curet ut ne vi tenues premantur,
 15 destruat quisquis miseros dolosis
 16 litibus urget.
 17 Ut reformidet venientis aevi
 18 gens tuum nomen, sua sol diei
 19 donec effundet, sua luna donec
 20 lumina nocti.
 21 Aequitas et jus veniens Olympo
 22 recreet terras, veluti sub aestu
 23 imber, et rores pluvii beatos
 24 ruris honores.
 25 Floreat, rerum hoc moderante habenas,
 26 jus, bonae paces vigeant, perenni
 27 Luna dum cursu rediens novabit
 28 menstrua vultus.
 29 Imperi fines maris unda fluctu
 30 hinc et hinc claudat, spatiumque latis
 31 quod modum regnis faciat, sit idem
 32 terminus orbis.
 33 Ad pedes illi cadat advolutus
 34 Aethiops, hostes veniam precati
 35 supplices, vultus humiles comamque in
 36 pulvere verrant.
 37 Qui tenent pontum refluique ponti

38 insulas, regesque Arabum beati,
 39 turis et dites venient Sabaei,
 40 dona ferentes.
 41 Illum adorabunt, mare qua remotis
 42 obstrepit terris, metuentque reges.
 43 Servient gentes sub utroque mundi
 44 axe jacentes.
 45 Ille desertos ope sublevabit,
 46 eximet curis querulos, egeno et
 47 pauperi dextram dabit, obrutosque
 48 fenore solvit.
 49 Nec velut vilem tenuis cruorem
 50 plebis effundi sinet. Ergo vivat,
 51 deque thesauris Arabum beatis
 52 munera sumat.
 53 Ac suo regi bene comprecatus
 54 illius laudes canat, illum honoret,
 55 largam opum dextram celebret, patremque
 56 vulgus adoret.
 57 Per feros montes segetem refundat
 58 terra, tam densis crepitans aristis,
 59 quam gravi cedros Libani flagellent
 60 murmure venti.
 61 Augeat prolem numero carentem
 62 per vias urbis bona pax beatae,
 63 laeta ceu campis riguis per imbrem
 64 gramina surgunt.
 65 Nomen aeterno juvenescat aevo,
 66 filii nomen, jubar usque solis
 67 dum vagae fundet radiata terris
 68 lumina flammae.
 69 Ille rex gentes faciet beatas
 70 quas sinu claudit refugo Amphitrite,
 71 omnis hunc tellus canet Amphitrite
 72 cincta beatum.
 73 Isaci gentis Domino Deoque
 74 laus, honor virtus. Opis haud egenus
 75 illa quae cuncti attonit intuentur
 76 perficit unus.
 77 Nomen augustum canat omnis aetas,
 78 ulla quod numquam taceat vetustas.
 79 Nominis sancti penetret per omnes
 80 gloria terras.

ooo

GEORGII BUCHANANI PARAPHRASIS IN TERTIUM LIBRUM PSALMORUM.

PSALMUS LXXIII. QUAM BONUS ISRAEL DEUS IIS QUI etc.

P_3_1 v.1 Tellus ut undis hospitium neget,

2 undaeque terras fluctibus obruant,
 3 aer coruscis fulminet ignibus,
 4 ruina mundi sidera misceat.
 5 Dei potentis non bonitas tamen
 6 in rebus artis destituet pios,
 7 purasve mentes nequitia sinet
 8 maeroris aestu funditus opprimi.
 9 Quam paene lapsu pes mihi lubrico
 10 gressum fefellit, dum pede metior
 11 immense parvo, dum trutina mea
 12 expendo stultus iudicium Dei !
 13 Fervebat ira pectus et aemulo
 14 livoris aestu, cum scelerum omnium
 15 contaminatos sordibus impios
 16 florere cunctis conspicerem bonis.
 17 Sors illa cunctis invida, mobilis,
 18 infida, servat perpetua fide
 19 istis tenorem, et robore vivido
 20 firmos senectam ducit ad ultimam.
 21 Exempta duris vita molestiis
 22 curisque (pectus quae reliquis coquunt
 23 mortalibus) per laetitiam fluit
 24 luxumque, et aegris pura laboribus.
 25 Ergo insolenti feta superbia
 26 corda intumescunt, pectora spiritus
 27 ventosa tendunt, caecus amor sui
 28 frena impotenti dat violentiae.
 29 Tecta invidendas non capiunt opes,
 30 felicitatem non animus suam,
 31 et vota vincens spemque superfluis
 32 luxus fatigat, nec satiat tamen.
 33 Verbis minores terrificant feris,
 34 et fastuosae mole potentiae.
 35 Vultu procaci et vocibus improbis
 36 adblandiuntur nequitiae suae.
 37 Nec impudentis garrula vanitas,
 38 contenta linguae fundere toxica
 39 terras per omnes, astra lacescere
 40 audet, Deumque insana superbia.
 41 Haec mente spectant attonita pii,
 42 et aestuanti pectore fluctuant.
 43 Secumque mussant : "Scilicet haec Deus
 44 cum cernat, atris abstinet ignibus ?"
 45 Opes abunde suppeditant malis,
 46 crescitque nullo fine pecunia,
 47 segura pacis molliter otia,
 48 quassante nullo turbine, transigunt.
 49 Frustra ergo puro pectore vivitur ;
 50 frustra innocentem contineo manum ;
 51 frustra labores perfero, torqueor
 52 dolore, nullis non crucior malis.
 53 Rursus verebar ne temerario
 54 ausu improbarem consilium Dei,
 55 ac arbitrarer forte miserrimos
 56 selecta quos in pignora nuncupat.
 57 Causas latentes dum sequor anxius,

58 et pertinacis viribus ingeni
 59 pugno, profundum se Chaos ingerit,
 60 et nocte mentis lumen adobruit.
 61 Labore tandem fessus inutili
 62 ad te recurro, rex bone caelitem.
 63 Quietus exspecto ex adytis tuis
 64 quis hos et illos separet exitus.
 65 Vidi repente quam pede lubrico
 66 starent superbi, quam stabiles parum
 67 opes tenerent, quam fragili loco
 68 fultos ruina praecipiti trahas.
 69 Procella vindex ut sonuit tuae
 70 irae, fugaces cum domino suo
 71 evanuerunt divitiae. Manet
 72 umbra invidendae nulla potentiae.
 73 Sic nocte mentes ludificans fugit
 74 imago somni, et quae modo pectora
 75 sopita vano terruerat metu,
 76 risus per urbem mox ciet omnibus.
 77 Donec viderem haec, maeror et anxiae
 78 mentem obruebant sollicitudines,
 79 aut haesitantem, ceu stupidum pecus,
 80 torpor ligabat pectore marcido.
 81 Arcana sed vis interea tui
 82 me fulciebat numinis, ac manum
 83 dextram regebas. Auspicio tuo
 84 ductuque clarus fulgeo gloria.
 85 Quid terra, praeter te, mihi, quid polus
 86 offert colendum? Cor mihi tabuit,
 87 infracta mens desiderio tui
 88 languebat, aegrum corpus inaruit.
 89 Tu rursus artus robore vivido
 90 firmasti, opimas suppeditasti opes.
 91 Qui, te relicto, spe stolidi deos
 92 vanos adorant, cladibus obruis.
 93 Te sector unum, te superas meis
 94 spes una rebus. Praesidio tuo
 95 liber periculis, auctus honoribus,
 96 te sempiternis laudibus efferam.

PSALMUS LXXIV. UT QUID, DEUS, REPULISTI etc.

P_3_2 v.1 Cur nos relinquis penitus, o rerum parens
 2 hostisque dedis impio?
 3 Lupis vorandum cur gregem, pastor, tuum
 4 ira obstinata deseris?
 5 Memento coetus servitute ab aspera
 6 quem vindicasti, quem tibi
 7 peculiari sorte, patrimonium
 8 ceu proprium, receperas.
 9 Colles Sionis, numinis sedem tui,
 10 bonus favensque respice.
 11 Tandem resurge, et hostium superbiam
 12 compesce. Perde funditus
 13 hostes protervos, qui tuum sacrarium

14 manu nefanda polluunt.
 15 Clangunt sonora buccina, non quae tuas
 16 laudes canat, ludibrio
 17 sed festa acerbo quae profanet. In tuis
 18 vexilla figunt turribus.
 19 Bacchatur audax ira frenis libera,
 20 aedis ruentis it fragor,
 21 quales sub altis murmurant quercus jugis,
 22 caesae bipenni cum ruunt.
 23 Demoliuntur malleis et vectibus
 24 caelata templi limina.
 25 Populatur ignis adyta, nominis tui
 26 contaminant sacrarium,
 27 secumque tacito comminantur pectore
 28 se diruturos omnia.
 29 Nec temere : flammis strata fumant omnia
 30 tuo dicata cultui
 31 loca. Signa nusquam, nulla jam miracula,
 32 propheta nullus perditos
 33 solatur et, spe quamlibet lenta, tamen
 34 spondet malorum terminum.
 35 Quousque tandem nomini sines tuo
 36 hostem protervum illudere ?
 37 Quousque acerbis facta dira et impia
 38 exasperabit jurgiis ?
 39 Cur otiosus retrahis manum ? Exere
 40 tandem potentem dexteram.
 41 Tu noster olim rector et custos, Deus,
 42 priscis abusque saeculis.
 43 Te vidit orbis vindicantem ab omnibus
 44 semper tuos periculis.
 45 Secessit unda te jubente, et vitreo
 46 muro liquor coercuit
 47 cursum, feroces viribus suis duces
 48 ponti recursus obruit.
 49 Ipsum marinis vastiorem belluis
 50 hausit tyrannum, et asperis
 51 afflicta saxis, fluctibus cadavera
 52 ejecta vultur Aethiops
 53 voravit. Inter aestu arenas torridas
 54 de cotedura limpidi
 55 fluxere rivi. Te imperante substitit
 56 arente flumen alveo.
 57 Tuus dies est, nox tua est, solis jubar
 58 radiis adornas aureis,
 59 aequorque claudis litorum repagulis,
 60 terrasque cingis fluctibus.
 61 Aestate lenis frigus acre, frigoris
 62 aestum rigore temperas.
 63 Domine, intuere probra, contumelias,
 64 et hostium ludibria,
 65 Qui te laccessunt impiis conviciis,
 66 molestiis nos opprimunt.
 67 Ne trade vitam turturis tuae feris,
 68 turbam tuorum pauperum
 69 ne sempiterna oblivione desere,

70 memor tui sis foederis.
 71 Nam nec tenebrae nos tegunt, nec pellimus
 72 obscuritate injurias.
 73 Ope destituti et omnibus fracti malis
 74 populi pudori consule,
 75 ut te merentem prosequantur laudibus
 76 miseri levati luctibus.
 77 Exsurge, rector orbis optime, et tuam
 78 causam tuere. Sis memor
 79 quae probra passim nomini semper tuo
 80 stulta ingerat procacitas.
 81 Voces superbas et tumultus improbos
 82 silentio ne supprime,
 83 curamque rerum gerere te mortalium,
 84 qui negligunt te, sentiant.

PSALMUS LXXV. CONFITEBIMUR TIBI, DEUS etc.

P_3_3 v.1 Te nos carminibus, rex bone, patriis
 2 dicemus merito. Te celebrabimus
 3 praesentem miseris, et memorabimus
 4 facta illustria posteris.
 5 "Cum plenis venient tempora saeculis,
 6 cogam," inquit Dominus, "concilium meum.
 7 Justis suppliciis prosequar impios,
 8 justis muneribus pios.
 9 Fundamenta soli dissiliant licet,
 10 turbetur trepidis gens hominum minis,
 11 fundamenta soli fluxa adamantinis
 12 nectam rursus ego vinculis.
 13 O stultos quoties admonui modum
 14 vesanae ut facerent nequitiae suae !
 15 In caelum quoties admonui impios
 16 ne stulte arma capesserent !"
 17 Quid caelum stolidi voce laccessitis ?
 18 Qua spe sic furitis ? Spiritus arrogans
 19 cujus praesidio fretus in aethera
 20 cristas erigit impias ?
 21 Eois coeat viribus occidens,
 22 conjurent calidae cum Borea plagae,
 23 frustra divitias, sceptrum, potentiam
 24 cuiquam conciliaverint.
 25 Unus rex hominum, res hominum suo
 26 versans arbitrio, praecipitem trahit
 27 illum de solio, plebis ab infimae
 28 hunc faece ad solium erigit.
 29 Nam cratera meri purpurei Deus
 30 jam dextra tenet, et vindice pharmaco
 31 undantem pateram temperat, et malis
 32 justum supplicium parat.
 33 Illinc impietas undique ab ultimis
 34 terrarum spatiis hauriet et, mero
 35 consumpto, cupido gutture turbida
 36 de faece exitium bibet.
 37 At me vate, Dei, quem genus Isaci

38 et ture et precibus placat et hostiis,
 39 omnis posteritas munificentiam
 40 et vim numinis audiet.
 41 Confringam tumidae tela superbiae
 42 formidata bonis. Cladibus obruta
 43 emerget pietas, et super aethera
 44 tollet conspicuum caput.

PSALMUS LXXVI. NOTUS IN IUDAEA DEUS etc.

P_3_4 v.1 Gentes profanae numinis loco colunt
 2 sibi quisque quem finxit deum,
 3 Judaea verum novit et colit Deum,
 4 laudatque festis cantibus.
 5 Deum Sionis incolam, Solymae sacris
 6 cui templa fumant ignibus.
 7 Illic minaces fregit arcus, lucida
 8 fregit sagittae spicula.
 9 Clypea sinistris rapuit, enses dexteris,
 10 funesta bella sustulit.
 11 Tu praepotentes fortior tyrannidas
 12 virtute frangis, tu feram
 13 compescuisti fortium superbiam
 14 regum potenti dextera.
 15 Fracta minacis spiritus ferocia,
 16 praedae fuere, aut ferreo
 17 somno gravati condidere lumina.
 18 Obtorpuere dexterarum
 19 fortes virorum, vis equorum, et curruum
 20 elanguerunt impetus.
 21 Tuum verendum nomen et numen. Tuae
 22 quando aestus irae incanduit,
 23 quis obviam ausit ire? Quis miserum caput
 24 tuo furori objecerit?
 25 Cum templa mundi fulminum quateret fragor
 26 ut, impia tyrannide
 27 poenis repressa, supplicem modestiam
 28 e servitute abduceres,
 29 attonita tellus siluit, imbellis pavor
 30 mentes superbas perculit.
 31 Ultricis irae scelera poenis obruta
 32 humana gens cum cerneret,
 33 boni efferebant laudibus te, conscius
 34 premebat horror impios.
 35 Vos erga Domino nuncupate et reddite.
 36 Domino verendo munera
 37 ferte universi civitatis incolae
 38 sanctae, Deumque agnoscite,
 39 reges superbi quem pavent, qui spiritus
 40 feros retundit impiis.

PSALMUS LXXVII. VOCE MEA AD DOMINUM CLAMAVI etc.

P_3_5 v.1 Te voce semper, te prece supplice

2 rerum invocabo, conditor optime,
 3 nam lenis ac placatus aurem
 4 das facilem miseris querelis.
 5 Ad te refugi cum premerer malis,
 6 ad te tetendi sollicitus manus
 7 sub nocte sola, donec atras
 8 lux tenebras rediens fugaret.
 9 Mens inquietis fracta doloribus,
 10 surda abnuebat aure fidelium
 11 voces amicorum, medelae
 12 impatiens, animusque solum
 13 intentus in te, cum lacrimis preces
 14 miscens fremebat, pectora flebili
 15 concussa singultu sonabant.
 16 Cura animi cruciabat artus,
 17 aestus vetabat sollicitudinum
 18 dulcem soporem carpere lumina.
 19 Segnis ligabat membra torpor,
 20 vocis iter dolor obstruebat.
 21 Tum mente versa volvere saecula
 22 coepi anteacti temporis, ac Dei
 23 numen bonis praesens, nec umquam
 24 auxilii miseris avarum.
 25 Laudum subibat quas tibi carmine
 26 lyrae canebam suaviloquae ad modos,
 27 secumque vestigabat aegra
 28 mens vario labefacta motu.
 29 "Num, me relicto in perpetuum Deus
 30 opis benignam jam retrahit manum,
 31 nec amplius suum tenebit
 32 larga Dei bonitas tenorem ?
 33 Nec ore vatium leniet anxias
 34 curas suorum, nec miseris erit
 35 placabilis, nec sistet irae
 36 praecipitem bonitate cursum ?
 37 Tandem remisso pectore, quo dolor
 38 impellis ?" inquam. Stant adamantinis
 39 decreta caeli fixa vinculis,
 40 nec dubio labefacta casu,
 41 nec fracta vi, nec temporis invidis
 42 obliviosi obnoxia dentibus.
 43 Rursus tuae mentem subibant,
 44 sancte parens, monumenta dextrae,
 45 qui templa picti sideribus poli
 46 frugumque campos germine fertiles,
 47 et saecula tot nostros ad usus
 48 condideris pecudum et ferarum.
 49 Quam saepe, poenis dum premis improbos
 50 tutoque fulcis praesidio probos,
 51 mortalibus clementiaeque et
 52 justitiae specimen dedisti,
 53 aeterne rerum conditor ! Omnia
 54 consulta cujus factaque sanctitas
 55 illustrat, haud quidquam tibi ingens
 56 orbis habet simile aut secundum.
 57 Mirante mundo tu, Deus unice,

58 mirae dedisti signa potentiae,
 59 ergastulis cum liberasti
 60 Abramidas Pharii tyranni.
 61 Videre fluctus te tumidi, Deus,
 62 videre fluctus, et trepido gradu
 63 fugere. Turbavit profundas
 64 horror aquae vitreae lacunas.
 65 Fudere aquosas imperio tuo
 66 nubes procellas de gravido sinu,
 67 sonore rauco, grandinisque
 68 infremuit lapidosus imber.
 69 Caeli tonantis vastificus fragor
 70 implebat aures, lumina fulgurum
 71 terrebat ardor, et pavore
 72 attonitae tremuere terrae.
 73 Sali rubentis pervia vastitas,
 74 ductore te, tot millibus obruit
 75 vestigia, et fluctu refuso
 76 clausit iter Phariis quadrigis.
 77 Moses et Aron (ceu pecudum greges
 78 pastor reducit) praesidio tuo
 79 duxere tranquillas per undas
 80 incolumes populi catervas.

PSALMUS LXXVIII. ATTENDITE, POPULE MEUS, LEGEM etc.

P_3_6 v.1 Audite, Isacidae, et rerum pietate parentem
 2 qui colitis pura, huc animos advertite vestros.
 3 Mira canam, sed vera canam : quae longa vetustas
 4 occulit arcanis oracula mersa tenebris
 5 evolvam. Priscis accepta parentibus olim
 6 veriloquis dictis in saecula sera nepotum
 7 transmittam, laudesque Dei, mirandaque facta
 8 cognita de proavis discent me vate minores.
 9 Namque parens mundi, sancto cum foedere gentem
 10 jungeret Isacidum sibi, patres prodere natis
 11 per seriem, et seris venientia saecula saeculis,
 12 et legum monitus et facta ingentia jussit.
 13 Scilicet ut memori benefacta priora tenentes
 14 pectore consilium vitae auxiliumque regendae
 15 a Domino exspectent, trepido turbante tumultu,
 16 ne tam caeca animos condant obliviam, legum
 17 irrita ventosis ut dent praescripta procellis,
 18 neu similes patrum, male grata mente rebelles,
 19 deficient animi instabiles, dubioque labantes
 20 pectore. Cur soboles Ephraemi, docta sagittis
 21 figere vel jaculo quamvis distantia certo,
 22 terga dedit paene ante tubas, latebrisque salutem
 23 (o pudor !) abjectis quaesivit turpiter armis ?
 24 Nempe quod aversos flexere per avia gressus,
 25 oblitum legum et monitorum et foederis ictum,
 26 oblitum tantorum operum, quae, testibus olim
 27 patribus, in Phariis Dominus patraverat oris.
 28 Cum mare divisit sese cumulate profundo,
 29 inter et aggestos undae stagnantis acervos

30 incolumem eduxit populum, duce nube, serena
31 luce, per obscuras flamma praeunte tenebras.
32 Flumina de solidi patefecit vulnere saxi,
33 damnatisque siti rivos donavit arenis.
34 Nec satiati undis linguas tenuere procaces,
35 ausi immane scelus, deserta per avia rursus
36 tentavere Deum, et ventris stimulante voracis
37 ingluvie, petiere cibos, ac talibus ora
38 solverunt : "Silicis durae qui flumina venis
39 elicuit, subitoque sitim torrente levavit,
40 non potis est panem, non lautae fercula mensae
41 addere, non epulis convivium larga profusis ?"
42 Audiit omnipotens, calidaque accensus ab ira est,
43 in Judamque hausit flammato corde furorem,
44 et populo tamen ingrato, totiesque salutis
45 immemori acceptae, victum dedit esse petitem.
46 Castra super late aetherei patefecit Olympi
47 horrea, dein gravidas caelesti semine nubes
48 ambrosiae largos super agmina solvit in imbres,
49 caelestisque cibi indulisit mortalibus usum.
50 Cedere tum jusso campis ex aeris Euro,
51 mox trepidis volucrum pluvias Notus attulit alis,
52 non secus ac siccae cumulos cum verrit arenae,
53 pulvereamque trahit deserta per arida pallam.
54 Castra super, tensisque super tentoria velis,
55 alitum tremulis resonabant agmina pennis,
56 et circum affusis cumulabant stragibus agros.
57 Jamque epulis exempta fames, sed prava libido
58 non exempta tamen, sed adhuc sine fine petitae
59 faucibus haerebant epulae. Deus ecce repente
60 ultor adest. Late subito grassante ruina,
61 robora selectae passim cecidere juventae.
62 Sed neque tot poenae, neque tot benefacta rebelles
63 continuere animos, nec tot miracula, rerum
64 natura monstrante Deum. Pater ergo procaces
65 casibus assiduis fregitque et, robore fracto,
66 ante diem tremulae succidit fila senectae.
67 Vix tandem morbis vexati, erroribus acti,
68 omnibus exhausti prope cladibus, omnium egeni,
69 agnovere Deum. Per tot discrimina tecti
70 ereptique malis, saevoque ex hoste recepti,
71 verba tamen blandes fundebant subdola linguis,
72 ore pii, mendace animo, neque foederis icti
73 servavere fidem. Verum clementior ille
74 sontibus ignovit, patria pietate remisit
75 offensas, meritamque ultro compescuit iram,
76 quippe homines memor esse animae modo flabra fugacis,
77 quae fragiles agitent morituri corporis artus.
78 O quoties inter viduas cultoris arenas,
79 inter saxa siti squalentia, numinis iram
80 languentem insanis irritavere querelis,
81 et sua divinas dimensi ad robora vires,
82 virtutem brevibus voluere includere metis,
83 quae mare, quae terras, quae caeli continet orbes !
84 Scilicet obliti benefacta priora, salutem
85 acceptam, et duri nuper juga dempta tyranni,

86 et quae per Pharias miracula plurima gentes
 87 edidit, in vitreos suffuso sanguine rivos,
 88 damnatisque siti laticum sine munere mensis.
 89 Et modo pestiferae per celsa palatia muscae
 90 spicula figebant liventi tincta veneno,
 91 et modo flumineis squalebant atria ranis,
 92 et nunc bruchus edax hominumque boumque labores,
 93 agmine nunc denso dirae exedere locustae.
 94 Grandinis imbre hortos, lapidosa grandine vites,
 95 grandine silvarum Dominus decussit honorem,
 96 grandine prostrati fortes jacuere juvenci,
 97 et segetum gravidos ruit igneus imber in agros.
 98 Ira Dei, laxisque furor bacchatus habenis,
 99 Eumenidumque faces, et conscius horror oberrans
 100 pectora turbabat stimulis praecordia caecis.
 101 Tum leto patefacta via est, mors saeva per omne
 102 passim hominum pecudumque caput nulli aequa cucurrit.
 103 Primitias sobolis, carissima pignora, florem
 104 roboris et serae spem praesidiumque senectae
 105 prostravit, qua Nilus aqua se divite volvit,
 106 et septemgeminis refluxum mare submovet undis.
 107 Interea, ceu pastor oves in pascua ducit,
 108 ipse suum Dominus populum deduxit ab omni
 109 vi procul et trepida formidine. Fluctibus aequor
 110 obruit infestos in se redeuntibus hostes.
 111 At sancti tenuere patres loca sancta, Deique
 112 parta manu, exclusit gentes prius unde profanas,
 113 aut prostravit humi victas, et jugera mensus
 114 Abramidis habitare dedit. Nec segnius illi
 115 irritare Deum et rerum tentare parentem,
 116 foedera negligere, et patrum de more rebelles,
 117 avertere suos recto de tramite gressus.
 118 Non secus ac arcus curvat se in cornua nervo
 119 adducto, dextraque iterum nervoque remisso
 120 in faciem subito flectit se sponte priorem,
 121 libera sic iterum gens, impia vindice poena
 122 ad sese rediit, cunctisque in collibus aras
 123 erexit, finxitque sibi simulacra deorum,
 124 ac Dominum rerum meritas accendit in iras.
 125 Audiit omnipotens pater impia vota precesque,
 126 et sibi dilectam gentem contempsit, et aras
 127 ipse suas ac Silonis tentoria liquit,
 128 sola sibi e cunctis electa habitacula terras.
 129 Deseruitque sui monimentum foederis arcam
 130 hostibus in praedam, monimentum roboris, unde
 131 clara Dei in cunctas splendebat gloria terras.
 132 Hos ferro, terrae iratus sibi nuper amatae,
 133 objecit, flammis alios. Cecidere cruento
 134 ense sacerdotes. Non connubialia festis
 135 carmina sunt cantata toris, carique mariti
 136 indeploratis viduae jacuere sepulchris.
 137 Ast ubi jam poenis meritam satiaverat iram,
 138 ceu crapula excussa miles, lentoque sopore
 139 excitus, arma iterum fugientes vertit in hostes,
 140 tergaque vulneribus figens imbellia caecis,
 141 perpetuam adpersit ventura in saecula labem.

142 Non tamen Ephraemum praestantem fortibus armis
 143 elegit cui sceptrum daret, non ille Manassae
 144 pignora, sed Judam, sed celsae tecta Sionis,
 145 templa sibi et solido fundata sacraria saxo,
 146 cumque polo et stellis mansuram in saecula sedem.
 147 Quique sequebatur pecudes in pascua David,
 148 sustulit e caulis, caram et sibi pascere gentem,
 149 impositum solio, et sanctae jus dicere terrae
 150 jussit, et ille gregem studio curaque fideli
 151 rexit, et infestis defendit ab hostibus armis.

PSALMUS LXXIX. DEUS, VENERUNT GENTES IN HAEREDITATEM TUAM etc.

P_3_7 v.1 Hereditatem, rector orbis, cur tuam
 2 invadit hostis impius ?
 3 Ritu profano polluit sacraria
 4 tuo dicata nomini,
 5 soloque stratam funditus Solymam suae
 6 tegit ruinae molibus.
 7 Truncata ferro membra te colentium
 8 passim per agros objacent,
 9 lanianda rostris vulturum, crudelibus
 10 aut belluarum dentibus.
 11 Rivi cruoris perluunt vias, velut
 12 torrens adauctus imbribus,
 13 nec usquam amicus ossa sparsa qui legat,
 14 aut lecta tumulis obruat.
 15 Functique fato pariter et superstites
 16 ludibrio accolis sumus.
 17 Parens benigne, quem modum tandem tuae
 18 speremus iracundiae ?
 19 An continenter instar ignis omnia
 20 vorantis in nos saeviet ?
 21 Tui furoris verte potius impetum
 22 in impiarum gentium
 23 tot regna, nomen quae tuum vel nesciunt
 24 vel, si sciant, non invocant,
 25 semen piorum quae laborant perdere
 26 armis, et urbes ignibus.
 27 Revocando vetera, parce, genitor, crimina,
 28 faces furori subdere.
 29 Sed paene cunctis obrutos malis, tua
 30 nos praeveni clementia.
 31 Offensionum mitis obliviscere,
 32 nostrae salutis ancora.
 33 Placatus adsis, splendor ut cunctis tuae
 34 clarescat oris gloriae.
 35 Os obstruatur impiis quaerentibus
 36 num noster hic cesset Deus.
 37 O juste vindex, impios exercitus
 38 poenis vicissim cernere
 39 fac nos, cruore qui piorum sordidi
 40 nunc insolenter gestiunt.
 41 Audi gementes carcerum qui vinculis
 42 marcent, potente dextera

43 de fauce mortis libera quos caedibus
 44 jamjam tyranni destinant.
 45 Et quam intulerunt contumeliam tibi,
 46 et quam tuis injuriam,
 47 multiplicatam redde nostris accolis,
 48 rerum perennis arbiter.
 49 Et nos, ovis grex tui, quem pabulo
 50 alis, tueris numine,
 51 et posteriorum posteri laudes tuas
 52 cunctis canemus saeculis.

PSALMUS LXXX. QUI REGIS ISRAEL, INTENDE, etc.

P_3_8 v.1 Hebraei generis pastor, uti gregem,
 2 blande progeniem qui regis Isaci,
 3 inter qui geminos aligeros tuo
 4 praescribis populo jura salubria,
 5 selectae soboli da bonus ac favens
 6 lumen posse tuae cernere gloriae,
 7 da vim posse tuae nosse potentiae,
 8 ac fessis propere porrige dexteram.
 9 Tu nos si placido lumine videris,
 10 cedent continuo cetera prospere.
 11 O rex armipotens, quem statues modum
 12 irae ? Quando humiles suscipies preces ?
 13 Irroras lacrimas fercula, lacrimis
 14 misces continuis pocula. Jurgia
 15 nostris finitimi de spoliis serunt,
 16 et nostra exagitant ludibrio mala.
 17 O rex armipotens, agmina caelitem
 18 cui parent, faciem cernere da tuam.
 19 Tu nos si placido lumine videris,
 20 cedent continuo cetera prospere.
 21 Traduxti Pharia de scrobe vineam,
 22 pravaram expuleras semina gentium,
 23 ut puro sereres purius hanc solo.
 24 Jam radix teneras fuderat undique
 25 fibras. Jam tremulo frigore texerat
 26 montes, aequa cedris brachia sparserat,
 27 tangebant teretes aequora palmites,
 28 Euphratem teneri germina surculi.
 29 Nudatam solitis cur modo saepibus
 30 in praedam hospitibus deseris hanc vagis ?
 31 Cur hanc saevus aper proterit, alites
 32 carpunt, omnigenae depopulant ferae ?
 33 O rex armipotens, obsecro jam redi
 34 tandem, et sidereo prospice de throno,
 35 placatusque tuam respice vineam,
 36 plantaras propria quam tibi dextera.
 37 Hunc saltem placidus respice ramulum,
 38 cui cultu assiduo conciliaveras
 39 robur, clara tui gloria nominis
 40 terrarum ut populis nota sit omnium.
 41 Illic flamma vorat brachia vitium,
 42 hic convulsa gemunt, caesa bipennibus

43 hic duris resonant, omnia pessum eunt.
 44 Irae justa tuae nos premit ultio.
 45 Indulgens genitor, nunc ope subleva.
 46 Firma praesidio nunc propius tuo
 47 hunc, vires et opes et decus antea
 48 affectu patrio cui cumulaveras.
 49 Vitam redde tuis, sancte parens, quibus
 50 semper mors avidis faucibus imminet.
 51 At nos usque ducem te comitabimur,
 52 praesentem miseris te celebrabimus.
 53 O rex armipotens, agmina caelitum
 54 cui parent, faciem cernere da tuam.
 55 Tu nos si placido lumine videris,
 56 cedent continuo cetera prospere.

PSALMUS LXXXI. EXULTATE DEO ADIUTORIO NOSTRO etc.

P_3_9 v.1 Exsultate Deo nostro, bona dicite verba
 2 nostrae salutis vindici.
 3 Isacidum laudate Deum, paeana canentes
 4 ad tympani dulces modos.
 5 Nec lyra, nec cessent genialia nablia, festis
 6 tuba calendis clangite.
 7 Hunc laeti celebrate diem, stata sacra ferentes.
 8 Nam sic statutum est patribus,
 9 sic lex sancta jubet, sic sacri foedera pacti
 10 percussa cum majoribus.
 11 Haec est illa dies ventura in saecula testis
 12 Memphiticae tyrannidis,
 13 cum Pelusiaticis Hebri gens hospes in oris
 14 erraret, et linguae sonum
 15 attonita ignotum audiret, nec nota vicissim
 16 in verba frustra os solveret,
 17 cumque humeros curvaret onus servile, manusque
 18 lassaret olla fictilis.
 19 "Excussi manibusque ollas, humerosque levavi
 20 luto," inquit optimus parens,
 21 "auxiliumque tuli poscenti in rebus egenis
 22 et nube densa conditus
 23 intonui. Meribam propter, tua jurgia passus,
 24 feci tui periculum.
 25 Nunc etiam selecta mihi gens auribus hauri
 26 et quae paciscor accipe :
 27 si mea dicta vagis non tradas irrita ventis,
 28 nec alterum colas deum,
 29 nec prostratus humi supplex nova numina adores,
 30 sed unicum tibi me Deum
 31 esse velis, domini qui rupto compede Nili,
 32 juris tui te reddidi.
 33 Posce modo, spe plura feres, potiora petitis
 34 majora votis auferes.
 35 Haec neque dicta suas populus demisit in aures,
 36 bene nec monenti paruit.
 37 Ergo ipsos sibi permisi, frenoque remisso
 38 solvi vagam libidinem.

39 O potius monita audissent mea, me duce rectum
 40 utinam institissent tramitem !
 41 Namque humiles illis subito fractosque dedissem
 42 hostes, meamque dexteram
 43 vertissem in gentes, quae recta odere, profanas,
 44 et supplices mendacibus
 45 vultibus Isacidum ambissent verbisque favorem,
 46 felicium omne in saeculum
 47 Isacidum, quibus almus ager fudisset abunde
 48 frugum benignam copiam,
 49 mellaque de duri fluxissent viscere saxi
 50 per arva cultus inscia."

PSALMUS LXXXII. DEUS STETIT IN SYNAGOGA DEORUM etc.

P_3_10 v.1 Regum timendorum in proprios greges,
 2 reges in ipsos imperium est Jovae,
 3 qui judicantur examinabit
 4 nequitiam trutina severa.
 5 "Num fraudulentos semper et impios,"
 6 inquit, "dolosa lance fovebitis ?
 7 Pauperque pupillusque vestrum
 8 ceu scopulum metuet tribunal ?
 9 Quin orbitatem cernitis anxiam ?
 10 Aurem querelis quin inopum datis ?
 11 Cur pauperes non a superbo
 12 ludibrio asseritis potentum ?
 13 Frustra monemus. Lumina caecitas,
 14 errorque mentes obsidet, ut neque
 15 compaginem rerum solutam
 16 justitia pereunte cernant.
 17 Deos vocavi vos, dominos necis
 18 vitaeque feci. Sceptraferam manu
 19 pacem dedi tueri, et armis
 20 letiferum cohibere bellum.
 21 At mors iniquae justa superbiae
 22 ultrix honores detrahet, et pari
 23 ignobili cum plebe fato
 24 purpureos rapiet tyrannos."
 25 Exsurge, legum frena manu Deus,
 26 capesse, cunctis arbitrio tuo
 27 qui regna dispensas, ut orbi
 28 imperio dominaris aequo.

PSALMUS LXXXIII. DEUS, QUIS SIMILIS ERIT TIBI ?

P_3_11 v.1 Ne taceas, ne cuncteris, pater optime, neve
 2 preces tuorum sperne duris auribus.
 3 Ecce fremunt hostes circum, et miscere tumultu
 4 saevo parati cuncta, cristas erigunt.
 5 Concilia occulte coeunt, populoque minantur,
 6 tu quem tuendum proprie susceperas.
 7 "Eia," aiunt, "properate, omnem succidite silvam,
 8 a stirpe sobolem deleamus Isaci."

9 En sceleri jurata manus coit omnis in unum,
 10 tua instituta ut deleant et foedera.
 11 En cum palifera junctus Nabathaeus Idume,
 12 soboles Moabi, et Agareni, et Gabala,
 13 cumque Palaestinis Tyriisque Amalecus et Ammon,
 14 Syrusque jungit castra Loti posteris.
 15 At tu sterne solo victos, Madiana juvenus,
 16 ut caesa texit semitas te vindice.
 17 Sisara ceu tumidus cecidit milesque Jabini,
 18 Cissontis undas turbidas cum sanguine
 19 tinxere. Inflatae passim jacuere catervae,
 20 laetamen agris, nec fuga eripuit duces
 21 Orebum et Zebum, nec subtraxere latebrae
 22 a falce mortis Zebeamque et Salmanam,
 23 dicere non veritos animo votoque superbo
 24 dominos futuros se tui sacrarii.
 25 At tu, sancte parens, sic hos vertigine torque
 26 ut rotula clivo, stipula vento volvitur.
 27 Flamma velut siccae populatur brachia silvae.
 28 Per alta stridens montium cacumina,
 29 sic urge attonitos consternatosque procella,
 30 tui furoris dissipa sic turbine,
 31 sic animos dolor exurat, pudor ora coloret,
 32 suis miseris numen ut probent tuum.
 33 Sic ignominia fastum preme, damna timorque
 34 sic continentur territotos exerceant,
 35 te solum ut noscant Dominum rerumque potentem,
 36 quacumque terras ambit axis ignifer.

PSALMUS LXXXIV. QUAM DILECTA TABERNACULA etc.

P_3_12 v.1 O rex armipotens, qui creperos tuo
 2 bellorum arbitrio dividis exitus,
 3 ergo limina templi
 4 laetus conspiciam tui.
 5 Hic cor laetitia palpitat, hic bonis
 6 languet mens nimis ebria, gestiunt
 7 artus, atria vivi
 8 visuri propius Dei.
 9 Hic passer latebras invenit, hic locat
 10 nidum veris avis nuntia. O atria o
 11 regis bellipotentis,
 12 ut vos adspiciam libens !
 13 Felix qui domui perpetuo tuae
 14 haerens te celebrat, qui penitus suam
 15 in te spem posuerunt,
 16 felices ter et amplius.
 17 Felices studio qui properant pio
 18 templo sacra tuo ferre. Per aridas
 19 valles fontis amoeni
 20 de rivis liquidis bibent.
 21 Nec deerit pluviae quae repleat cavas
 22 fossas agmen aquae, dum properat premens
 23 turmam turma parentum
 24 ritu caedere victimas.

25 O rex armipotens, da placidum tuo
 26 te regi, capitis cui decus inclytum
 27 indulsti, bonus aurem
 28 ne duram abnue supplici.
 29 Tu noster clypeus, rebus in asperis
 30 spes et praesidium. Juxta adytum tuum
 31 unius mora lucis
 32 pro mille est mihi saeculis.
 33 Sim custos potius liminis in tuo
 34 templo, sancte parens, quam Solyma procul
 35 degam inter sceleratos
 36 multis clarus honoribus.
 37 Tu sol, tu clypeus, tu Dominus. Tuis
 38 tu das conspicua fulgere gloria,
 39 nec puro scelerum umquam
 40 claudis munificam manum.
 41 O rex armipotens, quem penes exitus
 42 bellorum et positus ensibus otia,
 43 o bis terque beatos
 44 qui te spe solida colunt !

PSALMUS LXXXV. BENEDIXISTI, DOMINE, TERRAM TUAM etc.

P_3_13 v.1 Non semper tumidis fervent vexata procellis
 2 aequora, nec gelida riget horrida terra pruina.
 3 Inque vicem ponunt venti, mare sternitur, aura
 4 mitior in florem torpentes evocat herbas.
 5 Nec semper, Deus, avertis maerentibus aurem
 6 durus et indulgens irae. Quondamque favore
 7 sponte tuum amplexus populum es : vincisque solutis
 8 servitii, patrias duce te remeavit ad aras.
 9 Oblitus scelerum et violati foederis, iram
 10 lenisti, et patria texisti crimina cura.
 11 Et nos ergo, parens, nostrae et spes una salutis,
 12 respice placatus facilisque, animumque benignum
 13 accipe, perpetuae neve implacabilis irae
 14 saeviat in seros etiam vindicta nepotes.
 15 Respice nos melior tantum, quodcumque misellae
 16 spirat adhuc animae, te respiciente, vigorem
 17 accipiet, populoque tuo, jam nube repulsa
 18 tristitiae, laetos hilarabunt gaudia vultus.
 19 Alme parens, bonitate tua complectere fessos,
 20 sperataeque diu jam fructum ostende salutis.
 21 Jamdudum exspecto Dominus dum laeta futuri
 22 signa det, arcano pulsans praecordia motu.
 23 Et dabit haud dubie, posita placabilis ira,
 24 signa secunda. Piis dabit omnia prospera, leges
 25 qui patrias et sacra colent, errore relicto.
 26 Ecce salus, ecce incultas bona copia terras
 27 incolet, et laeti renovatrix gloria saeculi.
 28 En bonitas, en alma fides feret obvia gressus.
 29 Terra fidem, caelo terras Astraera relicto
 30 sancta colet. Comes Astraerae bona copia caelo
 31 appluet, et laetos decorabit frugibus agros.
 32 Et quacumque feret Dominus vestigia, gressus

33 ante ferent jus fasque suos. Lis, visque dolusque
 34 deseret afflictas per tot jam saecula terras.

PSALMUS LXXXVI. INCLINA, DOMINE, AUREM TUAM etc.

P_3_14 v.1 Da mitis aurem supplici,
 2 Deus, saluti consule
 3 ope destituti et pauperis,
 4 nec semper irae vindicis.
 5 Servum tuum conserva, Deus,
 6 cui spes salutis unica es.
 7 Serva invocantem jugiter
 8 a solis ortu ad vesperum.
 9 Depelle mentis nubila
 10 pendentis a te servuli.
 11 Blandae parens clementiae,
 12 promptus vocanti parcere.
 13 Intentus audi supplicem.
 14 Nam te vocamus arduis
 15 in rebus, invocantibus
 16 opem benignus quod feras.
 17 Nullus deorum par tibi,
 18 nullus secundus. Exerit
 19 nullus suam potentiam
 20 tam splendidis miraculis.
 21 Rerum creator, ultimis
 22 ab orbis oris affluent,
 23 flexoque gentes poplite
 24 te prosequuntur laudibus.
 25 Solus nec aevi termino
 26 inclusus aut potentiae,
 27 Deus deorum, gentibus
 28 miranda cunctis perpetras.
 29 Legum tuarum semitam
 30 fac ingredi me. Pectoris
 31 compone fluctus turbidos,
 32 tranquilla mens ut te colat.
 33 Ut spiritus, contagio
 34 emancipatus corporis,
 35 tuam celebret gloriam,
 36 dum vita voxque suppetet.
 37 Vivo tua clementia,
 38 de fauce mortis erutus,
 39 cum virium fiducia
 40 saeviret hostis insolens.
 41 Secura cum vis numinis
 42 mihi immineret, tu, Deus,
 43 es lenis et placabilis,
 44 et pacta fidus reddere.
 45 Mitis bonusque respice
 46 qui pendet ex te servulum.
 47 Opem fer, et vernaculum
 48 tuum periculis exime.
 49 In me favorem sentiant
 50 hostes tuum. Ora decolor

51 mutet pudor, cum viderint
52 mihi te salutis vindicem.

PSALMUS LXXXVII. FUNDAMENUM EJUS IN MONTIBUS SANCTIS etc.

P_3_15 v.1 Abramidarum ceteras urbes supra
2 Dominus Sionis diligit
3 portas, Sionis, imminet quae montium
4 fundata sanctis collibus.
5 O praedicanda posteris saeculis Sion,
6 beata mater urbium !
7 Tecumne Babylon se audeat componere,
8 tecumne Memphis insolens ?
9 Ventura Babylon sub jugum Dei, Deo
10 flexura Memphis poplitem.
11 Praeclara quamvis et Palaestina et Tyros
12 jactet virorum robora,
13 nihil ad Sionem fortibus fetam viris,
14 favore tutam numinis.
15 Censore Domino humana gens cum nomina
16 ad profitenda confluet,
17 quis non Sionis se feret civem ? Ineri
18 quis non colonus ambiet ?
19 Tum vox Sionem carminum, tum vox lyrae
20 canent Sionem et tibiae,
21 et nostra si quid audiendum vox sonet,
22 laudem Sionis vox canet,
23 et si quid animus voce dignum excogitet,
24 animus Sioni serviet.

PSALMUS LXXXVIII. DOMINE DEUS, SALUTIS MEAE etc.

P_3_16 v.1 Luce voco te, nocte voco te, sola salutis
2 spes, columen, vitae praesidiumque meae.
3 Alme parens, facilem ne vultum averte precanti,
4 neve humiles dura respue mente preces.
5 Mens hebetata malis torpet, confecta dolore
6 funereas spectat languida vita faces.
7 Membra vigor liquit, mors unguibus imminet atris,
8 de tumulo tantum jam mihi cura meo est.
9 Corpora non aliter pallent sub mole sepulchri,
10 vulnere quae subito mors inopina tulit.
11 Perpetuis quae sub tenebris oblivia condunt
12 alta, salutiferam te retrahente manum.
13 Carcere ceu clausum, et caeca sub nocte sepultum
14 me prope lethaeae gurgite mergis aquae.
15 Usque premis, stratumque urges, supraque jacentem
16 accumulas irae flumina cuncta tuae.
17 Me veluti scopulum fugiunt horrentque sodales,
18 quos portum afflictatae spes erat esse rati.
19 Affixusque toro jaceo, ceu compede victus,
20 languida cesserunt lumina victa malis.
21 Interea lassas tendens ad sidera palmas
22 te, veniente die, te fugiente voco.

23 Scilicet exspectas ut acerba morte perempto
 24 ostentes vires me revocando tuas ?
 25 An rediviva tuas in laudes ora resolvent
 26 quos gelido tellus claudit avara sinu ?
 27 An tua sub tumuli bonitas cantabitur antro,
 28 vulgabuntve tuam muta sepulchra fidem ?
 29 Justitiamne tuam taciturna silentia pandent,
 30 an referent vires nox tenebraeque tuas ?
 31 Ast ego, sancte parens, supplex tua numina clamo,
 32 nec precibus vacua est hora locusve meis.
 33 Sancte parens, animae auxilium cur subtrahis aegrae ?
 34 Cur surda miseras respuis aure preces ?
 35 Me dolor et primis labor anxius urit ab annis,
 36 me trepidi exanimant corde micante meus.
 37 Me furor exagitat tuus, opprimit undique terror,
 38 agmen ut hibernae, quod sata mergit, aquae.
 39 Aeger, inops, caris jaceo desertus amicis,
 40 nec noti aerumnis ingemuere meis.

PSALMUS LXXXIX. MISERICORDIAS DOMINI IN AETERNUM CANTABO etc.

P_3_17 v.1 Tu mihi carmen eris, rerum pater optime, semper,
 2 notaque erit populis bonitas, me vate, futuris,
 3 pollicitique immota fides, dum sidera mundo
 4 volventur tacito. Citius quoque sidera credam
 5 in Chaos antiquum lapso se condere mundo,
 6 irrita quam sacri credam fore foedera pacti,
 7 his concepta tuo quondam cum Davide verbis :
 8 "Dum mare, dum tellus staret, dum sidera caeli,
 9 Davidici generis mansuram in saecula prolem,
 10 et stabilem regni ventura in tempora sedem."
 11 Te, pater, aetherei coetus, te jure piorum
 12 saecula hominum celebrant, patrantem ingentia mundo
 13 mirante, et stabilis jus inviolabile pacti
 14 servantem. Quem terra tibi, quem conferet aether,
 15 magne parens ? Quem siderei tremit omnis Olympi
 16 coetus, et attoniti submissa mente tyranni.
 17 Armorum bellique potens, quocumque moveris
 18 alma fides clara circum te luce refulget.
 19 Tu maris irati furias compescis, et undae
 20 dejicis insanae tumidos ad sidera fluctus.
 21 Tu Pharon elatam letali vulnere sternis,
 22 et quicumque tuis miserum caput objicit armis.
 23 Tu terrae caelique opifex : quaecumque capaci
 24 complexu facies mundi revolubilis ambit,
 25 Auctorem agnoscunt. Aquilo tibi servit et Auster.
 26 Tabor et occiduum qui condit vertice solem,
 27 quique rubet radiis Hermon tepefactus Eois,
 28 Laetitia exsultant. Validae tu robore dextrae
 29 clara per immensum spargis miracula mundum.
 30 Ante tuum solium tibi justum apparet et aequum,
 31 ante oculos adstat bonitas, et nescia flecti
 32 promissi sincera fides. O terque quaterque
 33 felices, quos festarum clangore tubarum
 34 ad tua sacra vocas, quos sacri lumine vultus

35 illustras, hilaresque tui sub nominis umbra
 36 custodis. Bonitate tua super aethera vectis
 37 das vires, decus, imperium, das impia contra
 38 agmina, ceu clypeum, per dura pericula regem.
 39 Tu tibi dilectum secreto numine vatem
 40 implesti, ut saeculis daret haec responsa futuris :
 41 "Ipse mihi legi media de plebe, meoque
 42 imposui regem solio, qui protegat armis
 43 Isacidas, populoque meo qui jura ministret,
 44 Davidis et sacro perfudi tempora olivo.
 45 Huic animum viresque dabo, praesensque tuebor
 46 perpetuo ne fraude scelus, ne robur aperte
 47 exitium ferat. Ipse hostes, ipse impia sternet
 48 agmina, nulla meam vertit sententia mentem.
 49 Auxiliumque feram bonus, et super aetheris axem
 50 nominis auspicio nostri se gloria tollit.
 51 Jura dabit terris rapido quas gurgite claudit
 52 hinc mare Sidonio fecundum murice, et illinc
 53 palmifer Euphrates. Supplex me in vota vocabit
 54 Ille patrem. "Deus ille meus tu," dicet, "et unum
 55 praesidium, una meae custodia certa salutis."
 56 Hunc ego praecipuo contra dignabor honore,
 57 supra aliosque dabo rerum moderamina reges,
 58 quacumque immensum populis dant jura per orbem.
 59 Nec meus absistet favor illi in saecula, nec illi
 60 jurata aeterni solventur foedera pacti.
 61 Quin sobolem, et sobolis seros in cuncta nepotes
 62 saecula dabo et stabilis sceptrum immutabile regni,
 63 donec ab obscuris lucem sol dividet umbris.
 64 Quod si posteritas mea foedera sancta profanet
 65 immemor, et legem spernat jussamque recuset
 66 ire viam, domitos poenis duroque labore
 67 compescam, et plagis usque exercebo rebelles.
 68 At neque destituam regem bonitate perenni,
 69 foedera nec solvam, nec quod semel ore profudi
 70 ulla immutabit venturi temporis aetas,
 71 quippe semel sancto firmavi foedere, jurans
 72 per me, nulla dies initi cum Davide pacti
 73 immemorem arguerit. Soboles, dum saecula mundus
 74 volvet, ei patrii sceptri moderamen habebit.
 75 Esto mi sol testis ad haec et conscia luna,
 76 cum quibus aequaevum sceptrum Judaea tenebit."
 77 At nunc, sancte parens, tumida inflammatus ab ira
 78 projecis electum regem. Rata foedera pacti
 79 negligis, et capiti sacrum diadema revulsum
 80 sternis humi, et populis praebes calcare profanis.
 81 Nuda patent hosti disjectis oppida muris ;
 82 si qua manet, gelida formidine concutis arcem.
 83 Cunctis praeda sumus populis, rapiuntque feruntque
 84 vicini, insultantque malis, miserosque protervis
 85 vocibus illudunt. Hostis tu robore dextram
 86 interea firmas, perfundis pectora dulci
 87 laetitia, ac gladios hebetas in vulnera nostros,
 88 nec recreas fractos duro in discrimine belli.
 89 Jam decus et regni splendor, jam proxima caelo
 90 majestas versa in tenebras, solique superbi

91 gloria strata jacet. Brevis immatura juventae
 92 stamina praecidis. Miserae pars ultima vitae
 93 in luctu, in squalore ignominiaque senescit.
 94 Quem finem dabis aerumnis ? Numquamne tuorum
 95 respicies clades vultu placatus amico ?
 96 An, ceu flamma furens, semper tua saeviet ira ?
 97 Ipse memor tecum reputa quam concita nostrae
 98 tempora praetereant vitae. Frustra ergo crearis
 99 humani generis sobolem ? Ut brevis exigat aevi
 100 tempora, perpetuo curarum exercita fluctu,
 101 dum fractam luctu et morbis, seniove, sepulchri
 102 clauserit obscuro mors illacrimabilis antro !
 103 Heu bonitas ubi prisca ? Fides ubi pristina ? Ubi illa
 104 foedera conceptis quondam cum Davide verbis
 105 facta tibi ? Cerne opprobriis quibus impia servos
 106 turba tuos premat insultans, quam multa silenti
 107 claustra sinu maledicta feram, dum turba profana,
 108 dum circum innumerae gentes convicia fundunt,
 109 nosque tui Christi verbis petulanter amaris
 110 adventum sperare jubent. At tu, bone rerum
 111 conditor, aeterno verax celebraberis aevo.

ooo

GEORGII BUCHANANI PARAPHRASIS IN QUARTUM LIBRUM PSALMORUM

PSALMUS XC. DOMINE, REFUGIUM FACTUS ES NOBIS etc.

P_4_1 v.1 Caelitum rector bone, abusque primis
 2 saeculis, mundi rudis et juventa,
 3 qui laborantes ope sublevasti
 4 semper amicos,
 5 antequam tellus nova parturiret
 6 montium saltus, tegetetque montes
 7 lucidus caeli decor, ante metas
 8 lucis et umbrae,
 9 tu manes idem, pater orbis, unus,
 10 nec vices rerum patiens, nec aevi
 11 termino clausus brevis, unus expers
 12 finis et ortus.
 13 At brevis nobis miseraeque vitae
 14 fila paulatim tenuas, senecta
 15 donec in putrem cinerem caducos
 16 solverit artus.
 17 Tempus annorum tibi mille, lucis
 18 instar hesternae, fluidique puncti,
 19 nulla decursus quod ubi recessit
 20 signa relinquit.
 21 Nostra vanescit tenues in auras

22 vita, per siccas velut unda arenas,
 23 aut velut sensus per opaca ludens
 24 noctis imago.
 25 Herba ceu verno saturata rore
 26 mane, mox languet medio sub aestu,
 27 mox humi comis jacet arefactis
 28 vespere sero.
 29 Praeter et vitae mala tot fugacis,
 30 quae voluptates vitiant amaro,
 31 ira turbatis tua semper instans
 32 pectora vexat.
 33 Quicquid erramus temere aut maligne,
 34 quae timor celat tenebris pudorve,
 35 tu vides, nec te latet inquieti
 36 pectoris aestus.
 37 Dum tui poenas meritas furoris
 38 mens reformidat, prope cogitatis
 39 ocus vitae spatium citatis
 40 aufugit alis.
 41 Septies denos spatiosa in annos
 42 vita procurrit, quibus et senecta
 43 firmior, ferme in decimum supersunt
 44 amplius annum.
 45 Quid senectutis memorem labores ?
 46 Transvolat blandae breve ver juventae,
 47 inquires curis miserisque morbis,
 48 ocus Euro.
 49 Deinde quis justae tolerabit irae
 50 impetum, si jam jubeas nocentes
 51 pro modo offensae numeroque justas
 52 pendere poenas ?
 53 Sic, pater, sic o numerare fluxae
 54 nos doce vitae spatium, caducis
 55 mens ut a curis revocata veri
 56 lumen honesti
 57 cernat. O tandem placidus favensque
 58 desine irarum, propiusque servis
 59 semper assueta tibi lenitate
 60 consule fessis.
 61 Fac tuae fructu bonitatis aucti
 62 gaudio tandem satiemur. Aegris
 63 liberi ut curis reliquos agamus
 64 suaviter annos.
 65 Cedat et laetis fugiens vicissim
 66 luctus. Exacto modus et labori
 67 par voluptatis subiens amarum
 68 mitiget aevum.
 69 Facta, majestas, opera, amplitudo
 70 nota sint servis tua, posterisque
 71 nota servorum, tua qui libenter
 72 jussa capessunt.
 73 Fac tuae semper bonitatis ut nos
 74 splendor illustret, bone rector orbis,
 75 gratiae adspirans favor actiones
 76 prosperet omnes.

PSALMUS XCI. QUIS HABITAT IN ADIUTORIO ALTISSIMI etc.

P_4_2 v.1 Si protegendam praesidio Dei
 2 credas salutem, rem, sobolem, domum,
 3 insana cum sors intonabit,
 4 si Domini fugias sub umbram,
 5 securus omnem fer violentiam
 6 sortisque mortisque, et tetricas minas
 7 contemne. Securus tumultum
 8 despicias creperi duelli.
 9 E fraude caeca te Deus eximet,
 10 frangetque casses insidiantium,
 11 nec saeviens late venenum
 12 letiferae patiere pestis.
 13 Expandet alas te super, et suis
 14 pennis fovebit rebus in asperis,
 15 certusque praemissae salutis
 16 sub clypei latitabis umbra.
 17 Noctis per atrae caeca silentia
 18 non expavesces caeca pericula.
 19 Non luce grassantem timebis
 20 perniciem, nec aperta bella,
 21 interque strages mille cadaverum,
 22 dextra sinistra mille cadaverum,
 23 periculorum exsors propinquam
 24 incolumis fugies ruinam.
 25 Poenam luentes interea malos
 26 laetus videbis. Praesidio Dei
 27 securus armorum et tumultus,
 28 ceu validis tegerere muris.
 29 Nec te nec aedes vis propius tuas
 30 aut damna tangent. Nam Deus angelos
 31 custodiae tuae salutis
 32 praeficiet, vigilesque ad omnes
 33 motus, viarum qui reserent moras,
 34 qui per salebras te manibus ferant,
 35 ne saucietur pes recussus
 36 objicibus scopulorum acutis.
 37 Securus atras inter et aspides
 38 deges, ferarum et pignora tigridum,
 39 tutusque calcabis dracones,
 40 et Libycae catulos leaenae.
 41 "Observat," inquit, "me Deus, unice et
 42 honore nomen prosequitur meum.
 43 Laboriosis hunc vicissim
 44 incolumem eripiam periculis.
 45 "Praesens vocanti, subsidium feram,
 46 et imminenti rebus in asperis
 47 fato eximam. Exemptoque honorum
 48 eximium decus arrogabo
 49 "Faxo virenti robore transigat
 50 serae senectae tempora suaviter,
 51 meosque monstrabo beare
 52 qua soleam ratione amicos."

PSALMUS XCII. BONUM EST CONFITERI DOMINO ET PSALLERE etc.

P_4_3 v.1 Te praedicare, laudibus te prosequi,
 2 rex alme caelitem, decet.
 3 Seu sol Eoa luce terras purpuret,
 4 seu nox tenebris obruat,
 5 lux praedicantem me tuam clementiam,
 6 nox audiet constantiam.
 7 Nec voce tantum, sed canora barbita,
 8 sed cymbalo, sed nablio.
 9 Operum tuorum tacita cogitatio
 10 animum jacentem exsuscitat.
 11 Cum facta reputo, gestiunt praecordia
 12 perfusa dulci gaudio.
 13 O opera ! Facta o magna vere ! O sub cava
 14 consilia nube condita !
 15 Consilia caecis mentibus mortalium
 16 ignota, qui non cogitant
 17 florere pravos instar herbae, quam fovet
 18 sol lenis, humor educat.
 19 Mox instar herbis frigorum afflatu levi
 20 marcentis evanescere.
 21 Tu semper idem permanes, nec sentiens
 22 rerum vices, nec temporum.
 23 Sceleris amicos ac tuos hostes premet
 24 ruina inevitabilis,
 25 at me fovebis patria indulgentia,
 26 crudo vigentem robore,
 27 et rore mitis balsami vultum imbues,
 28 roseo juventae lumine.
 29 Oculis malignis qui tuentur me hostium
 30 pascam ruinis lumina,
 31 et impiorum, qui creant molestiam
 32 mihi, laetus excidium audiam.
 33 Ceu palma, justus germinabit interim,
 34 aut cedrus in Libani jugo,
 35 quam non procellae, non calor, non frigora
 36 honore nudant frondium.
 37 Quae planta firmis haeserit radicibus
 38 in aede Domini aut atriis,
 39 se flore amoeno frondibusque vestiet,
 40 fluxique lapsu temporis
 41 aegrae senectae damna nulla sentiet,
 42 onerata largis fructibus,
 43 ut nota cunctis gentibus sit aequitas
 44 domini potentis, qui mea
 45 arx est salutis una, qui numquam malae
 46 affinis est injuriae.

PSALMUS XCIII. DOMINUS REGNAVIT, DECOREM INDUTUS EST etc.

P_4_4 v.1 Jam Dominus rerum imperium suscepit, amictus
 2 decore multo et dignitate, robore
 3 jam sese accinxit Dominus, qui moenia mundi

4 firmavit, ullo non movenda saeculo.
 5 Cujus ab aeterno solium est immobile regni,
 6 ut ipse, nullas temporum metuens vices.
 7 Flumina praecipites volvant cum murmure fluctus,
 8 et aequor undis aestuet minacibus.
 9 Compescit Dominus gravidis turgentia nimbis
 10 flumina, minacis sternit undas aequoris.
 11 Stat fixum, et cunctis manet invariabile saeculis,
 12 quodcumque Dominus ore sancto protulit,
 13 quaeque aedem exornant Domini sacra mystica, nulla
 14 oblivionis damna serae sentient.

PSALMUS XCIV. DEUS ULTIONUM DOMINUS.

P_4_5 v.1 O fraudis ultor, sceleris o vindex Deus,
 2 ostende numen impios contra tuum.
 3 O juste iudex orbis, expurgare,
 4 meritisque poenis reprime arrogantiam.
 5 Quousque tandem, rector orbis optime,
 6 sese superbe jactitabunt impii ?
 7 Devota sceleri factio in scelere suo
 8 plaudit, sibique fabulis stultis placet,
 9 tuumque populum pedibus interim premunt,
 10 tuam proterve hereditatem proterunt.
 11 Viduam trucidant advenamque, et omnibus
 12 parente cassos obruunt molestiis.
 13 Secumque mussant : "Haec Deus non adspicit,
 14 nec fanda prorsus et nefanda intelligit."
 15 Gens ergo bruta, penitus ignorantia
 16 obsessa pectus somnolentum, discute
 17 animi veterum et cogita tecum, Deus
 18 qui fecit aurem surdus est ? Qui luminum
 19 formavit orbis, ipse nil videt ? Vagas
 20 sine lege gentes recta qui sequi docet,
 21 non is suorum puniet scelera, quibus
 22 oracla legum sacrosancta credidit ?
 23 Arcana nostri pectoris novit Deus,
 24 consilia vana, spes inanes, turbidos
 25 aestus. Beatus ille demum, quem parens
 26 erudit amore patrio, legis suae
 27 cui scita monstrat. Rebus in duris aget
 28 securus aevum, dum paratur impio
 29 nassa, in lacunam incogitantem quae trahat.
 30 Hereditatem nec Dominus umquam suam
 31 ope destitutam negliget, nec impiis
 32 praedae relinquet, sed tribunal iudicum
 33 ad aequitatis dirigit normam suae,
 34 vitamque ad illam dirigent boni suam.
 35 Contra scelestos quis mihi auxilium feret ?
 36 Mecum impiorum quis premet superbiam ?
 37 Nam jam sepulchri frigidus sub frigido
 38 cumulo jacerem, nisi Dominus opem mihi
 39 praesens tulisset, et sua clementia
 40 firmasset animum, et jam vacillantem gradum
 41 fulsisset, et me paene submersum malis

42 solatus esset, anxiaeque nubibus
 43 curae remotis reddidisset gaudium.
 44 Mecum loquebar : "Quid scelestis cum Deo
 45 commune ? " Scelera legis umbra qui sua
 46 tegunt, bonorum fraudulenta qui in caput
 47 consilia coeunt, factione innoxium
 48 premunt, iniquisque obruunt sententiis.
 49 At rector orbis me tuebitur, meae
 50 custos salutis, arx meae fiduciae,
 51 pro scelere pravis digna reddet praemia,
 52 suis et ipsos artibus pessumdabit
 53 rerum creator Dominus ac noster Deus.

PSALMUS XCV. VENITE, EXULTEMUS DOMINO, jubILEMUS DEO etc.

P_4_6 v.1 Eia alacres cuncti Domini celebremus honores,
 2 salute parta Domino agamus gratias.
 3 Eia alacres rapiamus iter, mora segnis abesto,
 4 Dominum canora personemus barbitio.
 5 Magnus enim Dominus Deus est, rex magnus, et orbis
 6 longe universis est deis potentior.
 7 Ille manu fulsit vastae penetralia terrae,
 8 et nube cincta montium fastigia.
 9 Ille vagum fecitque, et factum temperat aequor,
 10 terramque salsis innatantem fluctibus.
 11 Eia igitur genibus flexis manibusque supinis,
 12 dominoque nostro supplicemus et patri.
 13 Noster enim Deus est, nos grex illius. Ab uno
 14 pendemus illo, spiritumque ducimus.
 15 Si modo non lentam verbis damus illius aurem,
 16 nec respuamus monita pertinaciter,
 17 nec, velut ad Meribam : "Me rixis," inquit, "acerbis
 18 et arroganti provocetis murmure,
 19 aut, Arabum veluti quondam per inhospita saxa,
 20 vires rebelli voce tentetis meas.
 21 Cum proavi vestri me exploravere, meamque
 22 didicere factis plurimis potentiam.
 23 Illa quater denis mihi natio restitit annis,
 24 dixique semper interim : "Haec gens desipit,
 25 et mea securas transmittit dicta per aures.
 26 Ira ergo justa in pertinaces concitus
 27 juravi, "terrae gens haec ingrata beatae
 28 promissa amicis commoda haud carpet meis." "

PSALMUS XCVI. CANTATE DOMINO CANTICUM NOVUM etc.

P_4_7 v.1 Non usitato pangite
 2 orbis parentem carmine,
 3 orbis coloni, incognitis
 4 abusque terrae finibus.
 5 Cantate Dominum, laudibus
 6 nomen beatum tollite,
 7 et mente grata agnoscite
 8 vestrae salutis vindicem.

9 Sol qua recurrit, audiant
 10 gentes Dei potentiam,
 11 stuporque dulci gaudio
 12 perfusa oberret pectora.
 13 Namque unus est vere Deus,
 14 cunctisque major laudibus,
 15 et diis timendus ceteris,
 16 quos horret error credulus.
 17 Vesana gentes ceterae
 18 pro diis colunt ludibria,
 19 Dominus potenti dextera
 20 caelum solumque condidit.
 21 Apparet illi dignitas,
 22 auctoritas, potentia,
 23 ejusque templa siderum
 24 fulgore lucent gloriae.
 25 Tribuite Domino gentium
 26 terras colentum saecula.
 27 Tribuite regi caelitem
 28 et robur et potentiam.
 29 Tribuite magnitudinem
 30 tanto decoram numini,
 31 augusta templi ad atria
 32 adferte prompti munera.
 33 Adeste, pompam adducite,
 34 et supplices procumbite,
 35 omnesque rerum termini
 36 Deum tremant et diligant.
 37 Narrate cunctis gentibus
 38 regnare Dominum, qui ligat
 39 orbem catena immobili, et
 40 aequis gubernat legibus.
 41 Laetetur aether, gestiat
 42 tellus, fretum prae gaudio
 43 exsultet, et quicquid freti
 44 salsas lacunas incolit.
 45 Campi virescant avii,
 46 se culta fruge vestiant,
 47 arrideantque floribus
 48 silvae, et graventur fructibus.
 49 Natura rerum gestiens
 50 cunctos per artus sentiat
 51 Dei sui praesentiam,
 52 et prompta jussis pareat.
 53 Jus namque veniet dicere,
 54 a vi suos ut asserat,
 55 mundumque justis legibus
 56 et veritate temperet.

PSALMUS XCVII. DOMINUS REGNAVIT etc.

P_4_8 v.1 Ipse sui Dominus regni moderatur habenas,
 2 laetare tellus continens, et insulae
 3 quas vagus Oceanus refluis complectitur undis,
 4 cuicumque caeli subjacetis cardini.

5 Hunc circum umbriferae nubis praetexit amictus,
 6 pallensque multa fusca nox caligine.
 7 Apparent famulae juxta, firmantque tribunal
 8 severitasque dura, mitisque aequitas.
 9 Ante volant saevum rutilantes fulminis ignes,
 10 hostesque flammis obruunt sequacibus.
 11 Fulguribusque micat late flagrantibus aether,
 12 attonita tellus intremiscit, montium
 13 saxa fluunt, rapido ceu cera liquescit ab igne,
 14 a sempiterni pavida vultu numinis.
 15 Terra sui a vultu Domini tremefacta liquescit,
 16 et aequitatem templa caeli praedicant.
 17 Et quicumque habitant terras ubicumque remotas
 18 novere numen et Dei praesentiam.
 19 Illis ora pudor turpis confundat, inanes
 20 quicumque mentis stipites pro diis colunt,
 21 dumque sacris placant picti ludibria trunci,
 22 se gloriantur impio in scelere pios.
 23 Quicquid ubique Dei sub nomine credulus error
 24 honorat, unum adoret, unum diligat.
 25 Laeta Sion tenebras errorum cernet abactas,
 26 Judaea dulci delibuta gaudio.
 27 Sacrilega adspiciet vani sacraria ritus
 28 eversa, poenas luere meritas impios.
 29 Nam procul astriferi trans ignea moenia mundi
 30 tu frena rerum justus arbiter tenes.
 31 Teque deos infra longe premis altior omnes,
 32 tuique obumbras numinis fastigio.
 33 Ergo Deum quicumque pio complectere amore,
 34 a scelere mentem contine puram et manum.
 35 Nam Domino cordi est pietas, vitamque bonorum
 36 a vi tuetur impiae tyrannidis,
 37 et laetum offundit lumen cultoribus aequi,
 38 et pura sceleris corda recreat gaudio.
 39 Vos quibus est cordi reverentia juris et aequi,
 40 gaudete, Domini spe favoris ac opis
 41 securi, gratoque Deum super aethera cantu
 42 sanctumque nomen ejus usque tollite.

PSALMUS XCVIII. CANTATE DOMINO CANTICUM.

P_4_9 v.1 Non usitato carmine
 2 rerum parentem pangite,
 3 virtute qui victoriam
 4 non usitata rettulit.
 5 Sua ipse solus dextera,
 6 externae opis nil indigus,
 7 nos liberando, posteris
 8 miranda gessit saeculis.
 9 Sensere gentes impiae
 10 bello Dei potentiam,
 11 poenas luendo judicem
 12 sensere justum et vindicem,
 13 promissa solvit optima
 14 fide Isaci nepotibus,

15 partae salutis testibus
 16 totius orbis incolis.
 17 Huic ergo laeti psallite
 18 totius orbis incolae,
 19 hunc ferte in astra laudibus,
 20 laetis tubae et clangoribus.
 21 Laudate Dominum barbito,
 22 nervisque carmen jungite,
 23 lenisque tibiae modis
 24 adsit sonora buccina.
 25 Testetur aequor gaudium,
 26 et quicquid aequor occulit,
 27 orbisque terrae gestiat,
 28 et quicquid orbis educat.
 29 Exsultet unda fluminum,
 30 leni susurrans murmure,
 31 montesque laeti plausibus
 32 Deum venire gaudeant.
 33 En ipse dominus advenit,
 34 cunctis ut orbis incolis
 35 det aequa justus praemia
 36 et facta plectat impia.

PSALMUS XCIX. DOMINUS REGNAVIT, IRASCUNTUR POPULI etc.

P_4_10 v.1 Jam regnum Dominus, spirituum piis
 2 qui dat jura choris, suscipit, impiis
 3 horror terrificet pectora gentibus,
 4 tellurem quatiat tremor.
 5 Nec tantum Solymae vim Dominus sui
 6 fecit conspicuam numinis, et suae
 7 majestatis opes cernere finibus
 8 terrarum dedit ultimis.
 9 Ergo te meritis tollat honoribus,
 10 augustum celebret gens hominum tuum
 11 nomen, qui salubri temperie modum
 12 sceptris constituas tuis.
 13 Selectae soboli qui populi tui
 14 jus nullis dederis mobile saeculis,
 15 frenas justitiae qui moderamine
 16 aequali genus Isaci.
 17 Sublimen Dominum laudibus et Deum
 18 solus qui liquido regnat in aethere
 19 ferte, et scamna pedum (sanctus enim Deus
 20 est noster) veneramini.
 21 Huic Moses et Aron et Samuel bonus
 22 docti legitimis tingere victimis
 23 aras, consilium cum peterent, data
 24 saepe oracla petentibus.
 25 De pila tereti nubis eis dabat
 26 responsa ambiguus sollicito metu,
 27 legum quod monitus pactaque foedera
 28 servassent stabili fide.
 29 Aurem supplicibus tu facilem dabas,
 30 o rerum genitor maxime et optime,

31 indulgensque bonis, et scelerum simul
 32 vindex, durus in impios.
 33 Sublimem Dominum tollite laudibus,
 34 solus qui liquido regnat in aethere, et
 35 montem quo colitur (sanctus enim Deus
 36 est noster) veneramini.

PSALMUS C. JUBILATE DEO OMNIS TERRA, SERVITE DOMINO etc.

P_4_11 v.1 Orbis omnes incolae
 2 a sole Eoo ad Hesperum
 3 jubilate, et optimo
 4 rerum parenti plaudite
 5 mente laeta, et ritibus
 6 servite puris numini.
 7 Gestientes gaudio
 8 adite sancta limina,
 9 ille noster est Deus,
 10 noster parens et conditor.
 11 Non enim nos finximus
 12 ipsi, sed illius sumus,
 13 qui levi de pulvere
 14 alit creatos et regit.
 15 Ad fores ergo illius
 16 adite laeti, gratias
 17 agite, festis laudibus
 18 benignitatem pangite.
 19 Praedicate ceteris
 20 nomen beatum gentibus.
 21 Nam benignitas Dei,
 22 et in suos clementia,
 23 clausa nullo est termino,
 24 et firma stat pactis fides
 25 posterorum posteris
 26 in sempiterna saecula.

PSALMUS CI. MISERICORDIAM ET JUDICIUM etc.

P_4_12 v.1 Te salus rerum cano, qui precanti
 2 lenis irarum es, facilisque flecti,
 3 impiorum idem tetricus rebelles
 4 frangere fastus.
 5 Huc meae vires vigilant, labores
 6 huc ferent omnes, opis in tuae spem
 7 semper ut castis domus institutis
 8 culta nitescat.
 9 Si salutarem mihi tu serenus
 10 porrigis dextram, tibi corde puro
 11 serviam : fraudum scelerisque pura
 12 serviet aula.
 13 Nec mihi exemplum statuam sequendum,
 14 litibus si quis miseros iniquis
 15 vexit, aut causam tenuis clientis
 16 prodidit hosti.

17 Sponte qui pravis studiis inhaeret
 18 sit procul. Saevi sceleris minister
 19 candidos numquam mihi censeatur
 20 inter amicos.
 21 Quisquis incautum lacerat sodalem,
 22 clam venenato jaculatus ictu,
 23 persequar, plectam, penitusque ab ima
 24 stirpe revellam.
 25 Nec meae mensae dapibus fruetur
 26 mentis elatae tumor arrogansque
 27 vultus, et cunctos veluti minores
 28 lumine spernens.
 29 Veritas simplex quibus est amori,
 30 hos amo, amplector, video libenter,
 31 his mihi seros sociis senectus
 32 impleat annos.
 33 Integer vitae mihi sit minister,
 34 tecta non intret mea fraudulentus,
 35 nemo mecum intra mea commoretur
 36 limina mendax.
 37 Impios longe (mora nulla) terrae
 38 finibus pellam. Procul omne monstrum
 39 civitas sancta ut Domini releget
 40 flagitiorum.

PSALMUS CII. DOMINE, EXAUDI ORATIONEM MEAM etc.

P_4_13 v.1 Exaudi, genitor sancte, meas preces,
 2 clamorisque sonum percipe lugubris,
 3 neu vultum misero subtrahe, cladibus
 4 omni ex parte prementibus.
 5 Aures suppliciiis nunc adhibe meis,
 6 da votis facilem te, pater optime,
 7 et presso celerem porrige dexteram,
 8 et praesente ope subleva.
 9 Ceu fumi nebulae tempora transvolant,
 10 ut lentis coquitur torris ab ignibus,
 11 paulatim tacitus sic dolor aridis
 12 humorem ebibit artubus.
 13 Dum luctu crucio me dapis immemor
 14 ut secta e viridi gramina caespite
 15 arescunt nimio torrida sole, cor
 16 Exsuccum mihi tabuit.
 17 Crebro sic remeans spiritus ilia
 18 tendit, sic gemitus pectora concutit
 19 maestus continuo, tabida uti cutis
 20 jam vix haereat ossibus.
 21 Ut saltus habitans cuculus avios,
 22 aut tectis latitans noctua dirutis,
 23 aut turtur viduus, solus, inops, dies
 24 et noctes vigiles gemo.
 25 Dum ceu ludibrium rideor improbis,
 26 irrisumque petunt fraude nefaria,
 27 nec panis cinere est gratior arido, et
 28 potum tempero fletibus.

29 Istis ira malis me cumulat tua,
 30 qui me sustuleras ex humili loco,
 31 sublimi gravius rursus ut e gradu
 32 tractum praecipitem dares.
 33 Ut sero in tenebras umbra crepusculo
 34 vanescit, celeres deproperans dies
 35 in mortem, veluti sub medio die
 36 fenum, corpus inaruit.
 37 At te perpetuis saecula saeculis
 38 nectentem, volucris non fuga temporis
 39 carpit, nec memorem nominis obruet
 40 famam posteritas tui.
 41 Tandem surge, pater, tecta Sionia
 42 jam lenis placido respice lumine.
 43 Jam pleno redeunt tempora circulo,
 44 promissumque ferunt diem.
 45 Jam servi lapides respiciunt tui
 46 disjectos faciles, sparsaque rudera,
 47 incultique soli jam miserabilem
 48 versa mente dolent vicem.
 49 Ut vertat populos terror in exteros,
 50 ut nomen Domini sit celebre omnibus
 51 et numen, trifidum qua colitur solum
 52 formidabile regibus,
 53 versam restituet cum Solimam, suae
 54 majestatis opes cum dabit adspici,
 55 lugentem miseris cum querimoniis
 56 flectet se, et prece supplice.
 57 Scribentur tabulis ista fidelibus,
 58 seris ut Domini nota nepotibus
 59 sit laus, nec senium prodita posteris
 60 norit gloria saeculis.
 61 De sanctis adytis aetheriae domus,
 62 templi sepositis de penetralibus,
 63 caelestis Dominum non piguit soli
 64 curas respicere ad leves.
 65 Nexorum ut gemitus audiat, et neci
 66 addictos tetrica compede liberet,
 67 laudes ut Solymae templa Deo sonent,
 68 et nomen recinat Sion
 69 in coetu celebri. Tum procul ultimis
 70 terrarum populi finibus exciti
 71 illuc sacra ferent, et Domino dabunt
 72 reges munera supplices.
 73 Quamvis in medio curriculo meum
 74 robur comminuit, destituit manum,
 75 atque aevi spatiis tempora lubrici
 76 contraxit brevioribus,
 77 clamabo tamen : "O mi Deus unice,
 78 in vitae medio ne statio brevem
 79 cursum siste rotae. Quantulum ad ultimam
 80 jam metam superest mihi ?
 81 Te numquam, brevibus clausa recursibus
 82 astrorum, senio conficiet dies.
 83 Tu terrae stabilis mole, volucris
 84 tu caeli prior ignibus.

85 Illis interitus stant sua tempora,
 86 tu nullo interitum tempora senties.
 87 Annorum series cetera deterit,
 88 ut vestis teritur vetus.
 89 Ut detrita novis pallia vestibus
 90 permutat locuples, sic abit et redit
 91 et mutat facies imperio tuo
 92 mundi daedala machina.
 93 An tu, qui fueras, semper es atque eris,
 94 in te ipsoque habitas, nec varias vices
 95 decurso patiens tempore, permanes
 96 metae, saecula nescia,
 97 sed servi subolis, et subolis tui
 98 servi posteritas per seriem tuis
 99 tecum perpetuis aemula saeculis,
 100 aevi tempora transigent."

PSALMUS CIIII. BENEDIC, ANIMA MEA, DOMINO, ET OMNIA etc.

P_4_14 v.1 Sit parens rerum mihi carmen, illum
 2 vox canat, sensus petat, et remotis
 3 quisquis est fibris vigor, et sacratum
 4 nomen honoret.
 5 Mens, Deo laudes cane, redde grates,
 6 mens, Deo. Nullis benefacta saeculis
 7 excidant, et quae tribuit benigne
 8 munera dextra,
 9 Qui scelus tollit maculosum et aegros
 10 sanat angores, animoque vires
 11 reddit, et vitae properante fato
 12 prorogat annos.
 13 Qui manu larga tibi plura donat
 14 ore quam poscas animo vel optes,
 15 servat ac in morem aquilae virentem
 16 flore juventam.
 17 Integer iudex, scelerumque vindex,
 18 tradidit sancto sua jura Mosi.
 19 Isaci prolem docuit piarum
 20 dogmata legum.
 21 Lenis et blandus, dare dona largus,
 22 tardus irasci, neque sempiternae
 23 saevit offensae memor, aut perennes
 24 ardet in iras,
 25 nec modus poenae numerusve nostris
 26 aequus est culpis. Bonitas redundat
 27 latius terrae plaga quam remoto
 28 distat Olympo.
 29 Tam procul nostri maculas removet
 30 criminis, quam se procul a cubili
 31 Gaditano sol oriens Eois
 32 exserit undis.
 33 Qualis in natos placidi parentis
 34 lenitas, talis Domini benigni est,
 35 quisquis illius pietate vera
 36 nomen adorat.

37 Tu sinus mentis penitus repostos,
 38 tu pater nosti penetrabile cordis,
 39 quippe nos terrae memor e rubenti
 40 pulvere factos.
 41 Herba ceu lactens pueri venustas
 42 prodit, occultoque adolescit aevo,
 43 donec ut fenum cadat arefactum
 44 falce senectae,
 45 instar aut floris Tyrio comantis
 46 murice, ut vultu modice sereno
 47 risit, afflatu tepidi repente
 48 concidit Austri.
 49 Sed Dei aeterna bonitate in aevum
 50 tutus aeternum remanet piorum
 51 coetus, et longa serie propago
 52 sera nepotum.
 53 Si nec aeternas violabit icti
 54 foederis leges, memorique jussa
 55 mente servarit, referatque vita
 56 puriter acta.
 57 Ille flammantis super alta caeli
 58 culmina immotum solium locavit,
 59 et suo nutu facile universum
 60 temperat orbem.
 61 Angeli, jussis Domini ministri,
 62 sub jugum jus est quibus et potestas
 63 cuncta cogendi, Domino Deoque
 64 pangite laudes.
 65 Quique castrorum comites meretis
 66 sub ducis tanti imperio, audientes
 67 sedulo dictis, Domino Deoque
 68 pangite laudes.
 69 Quaeque per vastos ubicumque fines
 70 imperi pollens opifex creavit,
 71 plaudite, auctori Domino Deoque
 72 pangite laudes.
 73 Mens, Deo grates cane, redde grates,
 74 Mens, Deo : hunc sensus petat, et remotis
 75 quisquis est fibris vigor, et beatum
 76 nomen honoret.

PSALMUS CIV. BENEDIC, ANIMA MEA, DOMINO etc.

P_4_15 v.1 Te, rerum Deus alme, canam Dominumque patremque,
 2 magne parens, sancta quam majestate verendus,
 3 aetheris aeternas, rector, moliris habenas.
 4 Te decor, auratis ambit te gloria pennis,
 5 et circumfusum vestit pro tegmine lumen.
 6 Tu tibi pro velo nitidi tentoria caeli,
 7 et liquidas curvo suspendis fornice lymphas,
 8 et levibus ventorum alis per inania vectus,
 9 frenas ceu celeres volitantia nubila currus.
 10 Apparent accinctae aurae flammaeque ministrae,
 11 ut jussa accipiant. Stat nullo mobilis aevo
 12 terra, super solidae nitens fundamina molis,

13 pollenti stabilita manu, terra obruta quondam
14 fluctibus, ut fuso super ardua culmina velo.
15 Sed simul increpuit tua vox, tonitruque tremendo
16 insonuere aerae, paulatim ascendere montes
17 cernere erat, sensimque cavas subsidere valles,
18 inque cavas valles trepidas decurrere lymphas.
19 Neve iterum immissa tellus stagnaret ab unda,
20 limitibus compressa suis resonantia plangit
21 litora, praescriptas metuens transcendere metas.
22 Tum liquidi fontes imis de collibus augent
23 flumina, per virides undas volventia campos,
24 unde sitim sedent pecudes, quae pingua tondent
25 pascua, quique feris onager saxa invia silvis
26 incolit. Hic levibus quae tranant aera pennis,
27 per virides passim ramos sua tecta volucres
28 concelebrant, mulcentque vagis loca sola querelis.
29 Tu, pater, arios montes camposque jacentes
30 nectare caelesti saturas, fecundaque rerum
31 semina vitales in luminis elicis oras.
32 Unde pecus carpat viridis nova pabula feni,
33 unde olus humanos geniale assurgat in usus,
34 quaeque novent fessas cerealia munera vires,
35 quaque hilarent mentes jucundi pocula vini,
36 quique hilaret vultus succus viridentis olivi.
37 Nec minus arboribus succi genitabilis humor
38 sufficitur. Cedro Libanum frondente coronas,
39 alitibus nidos, abies tibi consita surgit,
40 nutrit ubi implumes peregrina ciconia fetus.
41 Tu timidis montes damis, cava saxa dedisti,
42 tutus ut abstrusis habitaret echinus in antris.
43 Tu lunae incertos vultus per tempora certa
44 circumagis, puroque accensum lumine solem
45 ducis ad occiduas constanti tramite metas,
46 inde superfusis cuncta involventibus umbris,
47 per tacitas spargis nocturna silentia terras.
48 Tum fera prorepat latebris, silvisque relictis
49 praedator vacuis errare leunculus arvis
50 audet, et e caelo mugitu pabula rauco
51 te patrem exposcit. Dein rursus, sole renato,
52 abditur occultis praedatrix turba cavernis,
53 inque vicem subeunt hominumque boumque labores,
54 donec sera rubens accendat lumina vesper.
55 Sic, pater, in cunctos dedis te providus usus.
56 Nec tantum tellus, genitor, tua munera sentit,
57 tam variis fecunda bonis, sed et aequora ponti
58 fluctibus immensas circumplectentia terras,
59 tam laxo spatiosa sinu, tot millia gentis
60 squamigerae tremula per stagna liquentia cauda
61 exsultant, tot monstra ingentia et horrida visu
62 veliferas circum nant puppes, grandia cete
63 effingunt molles vitreo sub marmore lusus.
64 Atque adeo quae terra arvis, quae fluctibus aequor
65 educat, a te uno pendat, pater optime, teque
66 quaeque suo proprium poscunt in tempore victum.
67 Te magnam pandente manum, saturantur abunde
68 omnia ; te rursus vultum condente, fatiscunt ;

69 te tollente animam, subito exanimata recurrunt
 70 in cinerem. Inspirante animam te denuo, surgit
 71 illico fecundae sobolis generosa propago,
 72 et desolatas gens incolit aurea terras.
 73 Sic eat, o nullo regnet cum fine per aevum
 74 majestas divina, suumque in saecula laetus
 75 servet opus Deus, ille Deus, quo territa tellus
 76 concutiente tremit, montes tangente vaporant,
 77 fumifera trepidum nebula testante pavorem.
 78 Hunc ego dum vivam, dum spiritus hos reget artus,
 79 usque colam. Tantum ille meas facilisque bonisque
 80 accipiat voces, nempe illo oblector in uno.
 81 At vero impietas plane exstirpetur ab ima
 82 radice, et scelerum stirps nulla repullet, ac nos
 83 te rerum, Deus alme, patrem Dominumque canemus.

PSALMUS CV. CONFITEMINI DOMINO.

P_4_16 v.1 Canite Dominum, et invocate nomen ejus. Exteris
 2 facta gentibus per orbem praedicate illustria.
 3 Ille sermo, carmen ille, et illius miracula,
 4 nomen ejus, numen ejus una nobis gloria.
 5 Hunc amantum et hunc petentum palpitet cor gaudio.
 6 Robor ejus, pignus ejus sacrosanctum roboris
 7 petite. Vultum ejus beatum continenter quaerite.
 8 Subeat animum quanta nostris edidit majoribus
 9 signa, quae portenta, legum scita quae reliquerit.
 10 Vos Abrami, vos Jacobi posterii, servi Dei
 11 separati, sorte lecta natio, vos alloquor.
 12 Ille rerum rector unus, orbis unus arbiter,
 13 pacta nostris firma servat facta cum majoribus.
 14 Verba meminit, mille sancta in saecula nectit foedera,
 15 icta primitus cum Abramo, deinde jurata Isaco,
 16 Isaci sancita nato lege non mutabili,
 17 posterisque sempiterno roborata vinculo.
 18 Cum "Tibi Chananaea," dixit "arva sorte dividam,"
 19 turba numero parva quamvis advena illic degeret,
 20 aucta nondum stirpe longis temporum decursibus,
 21 regna quamquam et nationes exsul errans verteret,
 22 hos tamen Dei benigna fovit indulgentia,
 23 vimque duram praepotenti dextera ab illis arcuit,
 24 et minis reges potentes tetricis compescuit.
 25 "Ne mihi," inquit, "consecratos, ne mihi unctos tangite,
 26 a meis, moneo, prophetis abstinete injuriam."
 27 Cum famem voracem in orbem contumacem induceret,
 28 gentibusque alimenta late noxiis subduceret,
 29 praeivium misit ministrum Nili ad arva fertilis,
 30 filium pulchrae Rachelis mango turpis vendidit.
 31 Carceris latuit tenebris, crura vinctus compede,
 32 somnii donec soluti nota regi veritas.
 33 Crura ferro liberavit, solvit animum crimine,
 34 et nova sortis benignae jam vicissitudine
 35 regionum servulorum servus ante ignobilis,
 36 frena rerum tractat unus. Nuper e custodia
 37 missus, aulae purpuratos nunc coercet vinculis,

38 et senum juvenis severae praesidet prudentiae.
39 Isaci tandem propago, culta linquens patria
40 pinguis ad fluenta Nili castra fixit advena.
41 Ac, Deo fovente, laeta stirpe sic reffloruit,
42 viribus brevi ut praeiret inquilius incolas.
43 Tum Phari rector superbae, mente versa, Abramidas
44 fraude molitus nefanda stirpitis revellere,
45 circulo donec voluto destinati temporis
46 legifer cum fratre Moses missus est divinitus,
47 ac Pharon Pharique regem terruit miraculis.
48 Ergo natura, imperantis non rebellis jussibus,
49 vestiit polum tenebris, et solum caligine
50 condidit ceu nocte caeca sole jusso cedere.
51 Unda decolor cruoris tabe rivos polluit,
52 squameaeque strage gentis inquinavit litora.
53 Terra felix ante frugum, more nunc praepostero,
54 turpibus fecunda ranis squalet. Ipsa regia
55 feta ranis, ipsa regum feta sunt cubilia.
56 Fusa deinde nube densa musca Memphin occultit,
57 et pediculorum ubique feda erant examina.
58 Instar imbrum ruebat mixta flamma grandini,
59 arbores nudans comantes fronde, flore, fructibus.
60 Quod reliquit atra grando, mox locusta perdidit,
61 bruchus abstulit, locustas quod voraces fugerat.
62 Tot malis subinde saevis icta Nili regia,
63 cum ferox non mitigaret contumaces spiritus,
64 dira populum mox in ipsum versa poena saeviit.
65 Prima pignorum repente per penates omnium
66 occidere, cuncta planctu, cuncta fletu personant.
67 Rege tandem pertinace cladibus perterrita,
68 sancta Memphin gens reliquit, jam tyranno libera,
69 dives auro argenteisque barbarorum poculis,
70 nec tot inter millia ullum languor attentaverat.
71 Ergo Nili jam pavore liberata regia,
72 voce, vultu, plausibusque praeferebat gaudium.
73 At parens memor benignus gentis electae sibi,
74 per siticulosae arenae vastitatem imperviam
75 castra nubis texit umbra, luce. Noctem luridam
76 ignium late corusco temperavit lumine.
77 Arva, victum cum rogarent, texit imber alitum,
78 panis impluit per auras more densae grandinis.
79 Petra jussa fudit undas, deque rupis viscere
80 ante sicca solitudo flumen hausit. Scilicet
81 foederis parens benignus, immemor numquam sui,
82 quod sibi caro cum Abramo sempiternum fecerat.
83 Sic parentum stirps piorum, tuta ductu numinis,
84 arva liquit fraudulenta perfidi Pelusii,
85 occupatis efferarum nationum sedibus
86 tradidit Deus labores impiorum iis carpere,
87 sanctiones ut tenerent sacrosancti foederis,
88 et piarum ad jussa legum facta cuncta fingerent.
89 Laus, honor, decusque regi sempiterno caelitem.

PSALMUS CVI. CONFITEMINI DOMINO, QUONIAM BONUS etc.

P_4_17 v.1 Laudate regem caelitem, regem bonum,
 2 suisque nullo non benignum tempore.
 3 Quis facta verbis aequet ? Eloquentia
 4 quis assequetur illius potentiam ?
 5 O ter beatos aequi amantes, et tuae
 6 praescripta legis qui tuentur jugiter !
 7 Memento nostri facilis et favens, tuum
 8 respicere populum qua soles clementia,
 9 et me revise lenis ac salutifer,
 10 ut separati tibi bonis populi fruar,
 11 carpamque laetus quo fruuntur gaudio,
 12 hereditatique comes applaudam tuae.
 13 Scelesti proles cum scelestis patribus
 14 in te rebelles multa iniqua fecimus,
 15 abominanda, dira perpetravimus.
 16 Nam nec tyranni Aegyptii ex ergastulo
 17 nostri parentes, liberi per te, tua
 18 ostenta graviter ponderarunt, nec tuae
 19 meminere gratis mentibus clementiae,
 20 sed propter undas aequoris rubri, duces
 21 adversus animis turba contumacibus
 22 obmurmuravit. At parens malis bonus
 23 poenas remittis, ut tuam clementiam
 24 agnoscat orbis et tremat potentiam.
 25 Nam comminanti cessit unda fluctuum,
 26 suspensa moles hinc et inde per sali
 27 tranquillii arenas aridam dedit viam,
 28 ceu solida campis figerent vestigia,
 29 donec tyranno liberati et hostium
 30 crudelitate tuta tuti litora
 31 tenere, at hostes vorticoso gurgite
 32 absorpsit unda, cladis ut nec nuntius
 33 superesset. Illic tum salutis compotes
 34 fidemque verbis praebuere, et cantibus
 35 cecinere festis numinis potentiam.
 36 Metu repulso, protinus lascivia
 37 animos rebelles perculit, nec amplius
 38 meminere signa nec pericla pristina.
 39 Repente prava perciti libidine
 40 arsere, verbis et Deum procacibus
 41 irae impulerunt frena justae solvere,
 42 ac flagitatos impie dedit cibos,
 43 justisque poenis impios coercuit.
 44 Nec poena mentes nec benignitas feras
 45 mollire potuit, quin procaciter ducem
 46 ducisque fratrem peteret aemulatio,
 47 et freta studiis semper ambitio malis.
 48 Sed factiosos terra vasto condidit
 49 sinu dehiscens, flammeique gurgitis
 50 torrens vorago devoravit impios.
 51 Nec noxiorum monita tot poenis modum
 52 gens prava sceleri fecit. Horeb in jugo,
 53 (proh facinus !) ante imaginem bovis dei
 54 imago sese stravivit, et fronte saturi

55 simulacra tauri coluit instar numinis.
56 Partae salutis nuper ingrata, immemor
57 miraculorum in urbibus Niloticis,
58 et fluctu eodem sospites se, subrutos
59 hostes superbos vorticosis aestibus.
60 Ergo scelestos ira justa perdere
61 ibat, furenti ni Deo carum caput
62 pro gente Moses obtulisset, et prece
63 frenasset iras. Nec tamen turbae furor
64 illic quievit, expetitum tam diu
65 uber feracis spreuit agris, nec fidem
66 Mosi docenti, pollicenti nec Deo
67 habuit. Tumultu castra complens respuit
68 imperia, donec ille munificus parens,
69 delere promptus inter invia montium
70 toties rebelles, extulit dextram et genus
71 per nationes impias disperdere
72 jam destinarat. Ante sculpta numina
73 iterum protervi procidere, et mortuis
74 dis tura, lectasque immolarunt hostias,
75 Deum sceleribus provocaverunt novis,
76 iramque rursus exasperarunt vindicem,
77 justa incitatus donec ira Phineas
78 ferro scelestam puniit licentiam,
79 et saevientem dexteram compescuit
80 domini, sibique peperit aeternum decus
81 quod nulla sileant posteriorum saecula.
82 Nec contumaces supplicia tot spiritus
83 coercuerunt, Meribae ad undas quin Dei
84 rursus furorem accenderent, nec publico
85 Moses furore liber, etiam incredula
86 oratione vertit iram numinis
87 in se. Potiti deinde pactis finibus,
88 nec impiarum semen omne gentium
89 disperdiderunt funditus, nec jussibus
90 recte monentis paruerunt numinis,
91 sed se profanis miscuere gentibus
92 didicere ritus, serviere ludicris
93 diis, ac, eorum mancipati cultibus,
94 tenere puras a scelere nullo manus.
95 Quippe immolarunt filios ac filias
96 ad daemonum aras, et suae propaginis
97 tinxere sculptos sanguine innocuo deos,
98 terramque sanctam polluerunt caedibus,
99 in scelera proni abominanda, dum suae
100 manus adorant opera, patrium Deum
101 justas ad iras provocarunt, ut suam
102 hereditatem abominatus impiis
103 in servitutem manciparet hostibus,
104 quorum severo paene contriti jugo
105 posuere saevam spiritus ferociam
106 ac liberati saepe Domino vindice,
107 rursus rebelles spiritus in vindicem
108 sumpserunt. Rursus ob scelera poenas sua
109 dedere, mitis nec Dei bonitas tamen
110 in rebus artis innocentium a prece

111 avertit aurem. Foederis memor sui
 112 poenas remisit lenis et placabilis.
 113 Quin et superba corda gentis barbarae,
 114 cui serviebant, diruta jam patria,
 115 lenivit, animos omnium ut perstringeret
 116 imago sortis flebilis vel hostibus.
 117 Tu nos tuere, Domine noster et Deus,
 118 et e profanis gentibus recollige,
 119 ut te canamus, nomen ut sanctum tuum
 120 celebremus unum, populus omnis ut simul
 121 dicat : "Deo, quem posteri Abrami colunt,
 122 sit laus honorque in saeculorum saecula.
 Amen, amen.

ooo

GEORGII BUCHANANI PARAPHRASIS IN QUINTUM LIBRUM PSALMORUM.

PSALMUS CVII. CONFITEMINI DOMINO, QUONIAM etc

P_5_1 v.1 Cantemus Dominumque bonum facilemque parentem,
 2 cujus habet nullas larga indulgentia metas.
 3 Hunc grato simul ore canant, quos dira tyrannis
 4 cum premeret, saevo incolumes ex hoste recepit,
 5 et juga captivo excussit servilia collo,
 6 perque feras gentes sparsos, qua surgit ab undis
 7 et qua diversas abiens se condit in undas
 8 Phoebus, ab arctoe campis glacialibus ursae
 9 collegit, tepidoque domum revocavit ab Austro.
 10 Per steriles saltus et inhospita saxa vagantes,
 11 qua nulla ad cultus ducunt vestigia terras,
 12 fracti animos maerore, inopesque undaeque cibique,
 13 auxilium miseris imploravere querelis.
 14 Audiit orantes, et opis miseratus egenos,
 15 omnibus exsolvit maerentia pectora curis,
 16 monstravitque viam cultas quae ferret ad urbes.
 17 Ergo canant Dominumque bonum facilemque parentem,
 18 et late ignotis pandant facta inclyta terris,
 19 quippe sitim victuque famem compescuit aegram,
 20 reddidit et membris vires animoque vigorem.
 21 Quique Dei monitis ingrata mente relictis,
 22 carceris in tenebris et caeca nocte jacebant
 23 cum tremarent gelidae exanimes formidine mortis,
 24 afflictique malis humiles fractique jacerent,
 25 auxilium miseris imploravere querelis,
 26 audiit orantes, et opis miseratus egenos,
 27 omnibus exsolvit maerentia pectora curis,
 28 vincla manu valida rupit, mortisque timorem
 29 reppulit et taetris pavidos eduxit ab umbris.
 30 Ergo canant Dominumque bonum facilemque parentem,

31 et late ignotis pandant facta inclyta terris,
 32 liminaque et portae qui claustra refregit ahenae.
 33 Deliciis animi vires cum stulta libido
 34 affligit, corpusque gravi languore solutum
 35 stultitiae pendit poenas, et morte propinqua
 36 rejiciunt omnem fastidia marcida victum,
 37 auxilium miseris qui imploravere querelis,
 38 adspicit orantes, et opis miseratus egenos,
 39 omnibus exsolvit maerentia pectora curis,
 40 ereptisque suo leti de limine verbo,
 41 restituit laetumque novat per membra vigorem.
 42 Ergo canant Dominumque bonum facilemque parentem,
 43 et late ignotis pandant facta inclyta terris,
 44 et meritis cumulent memores altaria donis,
 45 et grata acceptam testentur voce salutem.
 46 Qui mare fluctisonum sulcat, curvisque carinis
 47 admovet externas vaga per commercia gentes,
 48 non ignota illi divina potentia, nec quae
 49 monstrat in immenso miracula saepe profundo.
 50 Cum jubet, irrumpunt venti stridente procella,
 51 et mare nunc spumis canentibus astra lacescit,
 52 et nunc Tartarei subsidit ad ima barathri.
 53 Pallent ora, metus trepidantia pectora pulsat,
 54 et velut oppressis vino vestigia nutant,
 55 callida nec cani juvat ars aut cura magistri.
 56 At Dominum ut maestis imploravere querelis,
 57 exaudit trepidos, et opis miseratur egenos.
 58 Jam venti ponunt, strataque aequaliter unda,
 59 arrident taciti tranquilla silentia ponti.
 60 Jam posita laeti gaudent formidine nautae,
 61 cum lacerae optatum portum tetigere carinae.
 62 Ergo canant Dominumque bonum facilemque parentem,
 63 et late ignotis pandant facta inclyta terris,
 64 hunc populi coetus laudent, sanctique senatus
 65 concilium super astra ferat, qui flumina siccat,
 66 et riguos passim rivis bullantibus agros,
 67 fontibus oclusis sitiendi damnat arena,
 68 et fecunda, sua facta ob scelerata coloni,
 69 arva jubet falsis subito sterilescere glebis.
 70 At contra in sterili campo male pinguis arenae
 71 stare lacus, pinguesque facit stagnare paludes,
 72 et fluviis siccos rivisque fugacibus agros
 73 irrigat, atque inopi transmittit habere colono.
 74 Quique novas sanctis moderetur legibus urbes,
 75 et scrobibus credat vites, et semina sulcis,
 76 unde legat dulces maturo in tempore fructus,
 77 quos pater omnipotens alit, et proventibus auget
 78 assiduis pecorum fetus. Ubi nescia rursus
 79 commoda fortunae modice mens ferre secundae,
 80 frena dedit vitiis, retrahit sua munera justus
 81 arbiter. Indomitos animos et corda superba
 82 cladibus affligit, saevis punire tyrannis
 83 tradit, et ignavo petulans sub principe vulgus
 84 contemptum, populis praedam jubet esse propinquis.
 85 Perque inopes victus terras traducit, ubi ante
 86 nulla hominum tritam monstrant vestigia callem.

87 Avertit mala pauperibusque animique modestis,
 88 atque hilares multa fecundat prole penates.
 89 Haec spectant gaudentque boni, male conscia mussat
 90 turba metu. Ast, animi quibus est solertia, cura
 91 assidua volvunt, memorique haec mente recondunt,
 92 luceat ut cunctis Domini clementia terris.

PSALMUS CVIII. PARATUM COR MEU, DEUS, PARATUM COR MEUM etc

P_5_2 v.1 Mens invicta malis, animi vigor integer, orbis
 2 te voce rector, te celebrabit lyra.
 3 Eia age depositis, mens, expergiscere curis,
 4 et tu, canora barbitos cum nabliis.
 5 Ocius aurorae quam luficer excitet ignes,
 6 aurora cantus quam volucrum exsuscitet,
 7 Te, pater alme, canam, populos tua facta per omnes,
 8 quacumque tellus panditur, vates feram.
 9 Nam tua siderei bonitas fastigia caeli,
 10 fidesque tractus nubium supervolat.
 11 O Deus, augustum nitido caput exere caelo,
 12 ostende terris gloriae jubar tuae.
 13 Eripiasque tuos gelidi formidine leti
 14 praesens, et opifer invocantes audias.
 15 Audiit, ex adytoque Deus flammantis Olympi
 16 vocem rependit gaudii praenuntiam.
 17 "En tibi frugiferos Sichimae dispertiar agros,
 18 vallem Sucothi metiar decempeda.
 19 Nonne nihi parent Jacobi pignora, quisquis
 20 vel pecore tondet arva, vel vomere secat ?
 21 Oppida sub pedibus Syriae calcabo superbae,
 22 Moabum, Idumen, et Palaestinas domos."
 23 Quis mihi pandet iter munitas ductor ad arces ?
 24 Muros Idumes divitis quis diruet ?
 25 Quis nisi tu, nostrae gentis, Deus unice, tutor ?
 26 Qui nos premendos hostibus reliqueras
 27 offensus vitiis pravis, nec in arma ruentes
 28 nostros praeibas dux, ut ante, exercitus.
 29 Nunc, pater, auxilium rebus bonus adfer in artis,
 30 humanas fallax credulos spes decipit.
 31 Te duce, victrici decorati tempora lauro
 32 pedibus prememus hostis arrogantiam.

PSALMUS CIX. DEUS LAUDEM MEAM NE TACUERIS.

P_5_3 v.1 Ne sileas, ne dissimula, mea gloria, neve
 2 sine veritatem supprimi mendacio.
 3 Me scelerati oris fraus et crudele venenum,
 4 proterva fictis lingua me premit dolis.
 5 In me odia occultis acuunt sermonibus iras,
 6 ut immerenti fabricant molestiam.
 7 Qui mihi dedebant fidum solamen amici,
 8 probra ingerebant clanculum et convicia.
 9 Ast ego, secretae tibi qui penetralia mentis
 10 cernis, dolente corde fundebam preces.

11 Omnibus officiis culti mihi damna rependunt,
 12 remunerantur odio amorem simplicem.
 13 Tu, pater, hunc saevo vexandum trade tyranno,
 14 vastator illi ad dexteram astet angelus.
 15 Judicis astiterit cum sordidus ante tribunal,
 16 damnatus aspris exeat sententiis.
 17 Cum volet iratos animos inflectere fando,
 18 oratione iudices exasperet.
 19 Ante diem fato pereat praereptus acerbo,
 20 locumque vacuum dominus occupet novus.
 21 Orba fleat soboles, vidua gemat uxor in aula,
 22 ejecta proles patrio exsulet solo.
 23 Instabilis, mendica, vagis erroribus orbem
 24 lustret, quietum reperiat nusquam locum,
 25 conturbetque domum miseram, inscribatque penates
 26 scrutatus omnes fenerator arculas.
 27 Ignotusque haeres longo congesta labore
 28 rapiat, opemque nemo poscenti ferat,
 29 nullaque progeniem miseratio sublevet orbam.
 30 Mors falce totam demetat semel domum,
 31 proxima gentem omnem cum nomine delet aetas
 32 apudque dominum, patris erratum, ut recens
 33 ante oculos interque manus versetur et erret,
 34 nec vitia matris tollat ulla oblivio.
 35 Utque erat oblitus miserandi, oblivio gentem
 36 ejus perenni supprimat silentio,
 37 qui dejectum, inopem, et curis mordacibus aegrum
 38 pertrahere mortis nixus est in retia.
 39 Semper ei veluti fuerat maledictio cordi,
 40 maledicta in illum et exsecratio cadent.
 41 Ac veluti studio fugit benedicere pravo,
 42 sic nullus illi cupiat aut dicat bene.
 43 Et velut obtegitur talari corpus amictu,
 44 totus miseriis ille sordeat obsitus.
 45 Sic in cuncta illi passim se viscera fundant
 46 ut oleum in ossa penetrat, unda in viscera.
 47 Hoc ergo incedat semper vestitus amictu,
 48 haec zona lumbos cingat illi et ilia.
 49 Ante Deum tales pendat detractio poenas,
 50 et clam salutem quisquis oppugnat meam.
 51 Alme pater, pater alme, tua me protege dextra,
 52 et invidorum libera calumniis
 53 ut nomen latus omne tuum telluris honores
 54 et suavitatem sentiat clementiae.
 55 Eripe me invidiae. Sum pauper, egenus et expes,
 56 animumque curae turbidum urunt anxiae.
 57 Non aliter pereo, species quam futilis umbrae,
 58 pallent tenebris sera cum crepuscula,
 59 aut ubi decussis solerti indagine ramis,
 60 locusta tectis pulsa frondeis cadit.
 61 Genua labant infirma, artus jejunia solvunt,
 62 exsanguis siccis corpus aret ossibus.
 63 Me tumidi probris hostes petiere superbis,
 64 me conspicati capita quassarunt sua.
 65 Adfer opem, servumque tuum, pater optime, serva
 66 pro lenitate semper assueta tibi.

67 Agnoscantque tuam, rerum pater optime, dextram,
 68 tuaque salvum me sciant clementia.
 69 Dum maledicta voment hostes, dum probra loquentur,
 70 bonusque placidusque benedices tu mihi.
 71 Dum confusa illis turpis pudor ora notabit,
 72 laetitia servi pectus hilarabit tui.
 73 Hos pudor ut talos a vertice vestis ad imos
 74 effusa late corpus omne contegit.
 75 Hos pudor, et maerens turbato infamia vultu,
 76 qui me maligno dente rodunt, obruat.
 77 Ast ego tum Domino grates memor ore sonabo,
 78 coetuque laudes in celebri concinam.
 79 Qui stetit auxilio dexter, cum paupere, vitamque
 80 eripuit ejus hostium ludibrio.

PSALMUS CX. DIXIT DOMINUS DOMINO MEO etc.

P_5_4 v.1 Sic allocutus Dominus est dominum meum :
 2 "Asside dexteram ad meam,
 3 dum proterendos, ceu scabellum, sub pedes
 4 hostes tibi provolvero.
 5 Ad orbis oras ultimas fasces tuos
 6 alta ab Sione proferam,
 7 ut juris aequi vinculis coerceas
 8 fastus rebelles hostium.
 9 Te pompa laetis cum reducet plausibus
 10 ad templa voti computem,
 11 sancto decorus apparatu exercitus
 12 laetum celebravit diem.
 13 Non roris imber ante lucem argenteis
 14 tot vestit arva gemmulis,
 15 quam multa cunctis gentium de finibus
 16 ad te propago confluet."
 17 Juravit et se adstrinxit immutabili
 18 Dominus sacramento tibi,
 19 tete futurum Melchisedecis sibi
 20 ritu sacrorum antistitem,
 21 sol inquieto lucis orbe dum diem,
 22 dum luna noctem illuminet.
 23 Ad dexteram ille semper adsistet tuam,
 24 ferro tyrannos vindice
 25 compescet. Iram commodans suam tibi
 26 gentes rebelles comprimet,
 27 ducesque regnis imperantes ditibus
 28 sternet solo, torrentibus
 29 e fortuitis, dum fugam premet, sitim
 30 victor levabit igneam.
 31 Ergo, subactis hostibus, caelo caput
 32 tollet decorum gloria.

PSALMUS CXI. CONFITEBOR TIBI, DOMINE, IN TOTO CORDE MEO etc.

P_5_5 v.1 Sive inter fidos memorem secreta sodales,
 2 seu sancti stipante caterva

3 me populi loquar, alme parens, te pectore toto
 4 usque canam, tua munera grato
 5 ore feram, magna aeternae miracula dextrae.
 6 Magna quidem, sed et inclyta certe,
 7 et manifesta bonis, studio scrutante fideli.
 8 Quicquid enim gerit, omnia splendor,
 9 omnia divina majestas luce refulgens
 10 illustrat. Dum sidera terras
 11 ignea lustrabunt, hunc justum semper et aequum
 12 sera agnoscent saecula nepotum.
 13 Nec quae primaevi quondam stupuere parentes
 14 attoniti, mirandaque natis,
 15 invida delebunt obliviam. Parcere largus
 16 nempe parens, facilisque querelis
 17 flectere cor miseris, spoliis ex hoste superbo
 18 direptis decoravit amicos.
 19 Nec cum gente sua percussi foederis illum
 20 immemorem ulla redarguet aetas.
 21 Ostenditque suas per facta illustria vires,
 22 cum populatus regna superba,
 23 dimensusque novis hostilia rura colonis,
 24 dilectae dedit oppida genti.
 25 Quicquid agit loquiturque, fides immobilis actus
 26 aequi et regula dirigit omnes.
 27 Quae jubet, aequa jubet, nulloque interlita fuco,
 28 aut tacitam celantia fraudem.
 29 Quaeque nec aeterno volventia saecula lapsu
 30 interimant aut tempore carpant,
 31 quippe adstans fidei firmatae constantiae et aequum
 32 perpetuo rata jussa tuentur.
 33 Cum premeret Pharii imperium crudele tyranni
 34 selecta de gente nepotes,
 35 excussitque jugum, et regis fera jussa superbi
 36 exuit, aeternaque beatis
 37 libertate frui donaret, pignora sera
 38 si jurata parentibus olim
 39 intemerata pia servassent foedera legis,
 40 foedera nullis irrita saeculis.
 41 Quippe Dei sanctum est et formidabile nomen,
 42 ac sancte sua pacta tuetur,
 43 exigit et duras violato foedere poenas.
 44 Hunc colere ex animoque vereri,
 45 vivendi recte fons et sapientia prima est.
 46 Hanc cunctos qui dirigit actus
 47 ad metam vere sapit, hunc ventura nepotum
 48 semper dicent saecula beatum.

PSALMUS CXII. BEATUS VIR QUI TIMET DOMINUM etc,

P_5_6 v.1 Beatus ille qui Deum rerum patrem
 2 pietate non ficta colit,
 3 Deique gaudet legibus, mores suos
 4 formare ad illas nititur.
 5 Late per urbes divites potentiam
 6 ejus propago proferet.

7 Prolem piorum numinis benignitas
 8 larga beabit dextera.
 9 Res affluenter suppetet semper domi
 10 illi, nec aetas longior
 11 obliterabit aequitatis gloriam
 12 fructumque. Cum premet malos
 13 fortuna, saevo gestient ludibrio
 14 mutare summis infima,
 15 benignitatis tum suae justis Deus
 16 lucem in tenebris offeret.
 17 Clemens bonusque in omnibus periculis
 18 stirpem piorum munit.
 19 Misertus inopis vir bonus, larga manu
 20 succurret indigentiae.
 21 Sic cuncta justo temperans examine,
 22 nec verba temere ut excidant.
 23 Non turbo sortis cuncta quatientis loco
 24 movebit illum, nec dies
 25 suprema famam condet ejus invidio
 26 oblivii silentio.
 27 Non livor illum falsa gaudens spargere
 28 terrebit, aut calumnia
 29 bellive rumor, aut egestas lurida,
 30 fragorque leti proximi.
 31 Sed mente firma provocat discrimina,
 32 Deoque solo nititur.
 33 Ceu cana rupes murmurantis aequoris
 34 spernit minaces impetus,
 35 sic ille certa interritus fiducia
 36 sortis procellas sustinet
 37 ac sustinebit, dum ruinas hostium
 38 salvus suorum adspexerit.
 39 Opes volucris instar aurae mobiles
 40 largitus est egentibus,
 41 sibi aequitatis gloriam superstitem
 42 servavit, orbe gloriam
 43 vivaciorem, nec senectae dentibus
 44 aeruginosae obnoxiam.
 45 Dum laude clarum, reque lautum splendida
 46 spectabit impius pium,
 47 curaeque mentem vellicabunt anxiae,
 48 succumque carpent corporis,
 49 dentem fatigans dente ringetur, lue
 50 se macerabit tabida,
 51 Dominus malorum vota ridet irrita,
 52 spes ut modestas promovet.

PSALMUS CXIII. LAUDATE, PUERI, DOMINUM, LAUDATE etc.

P_5_7 v.1 Psallite Dominum, pueri, Domini
 2 nomen festo tollite cantu,
 3 nomen Domini sic celebretur
 4 ut saeculorum in saecula longi
 5 nulla obliviam sentiat aevi.
 6 Primo a carcere solis Eoi

7 ad purpureos usque occasus,
 8 omnes Domini nomen adorent,
 9 qui gentes super arduus omnes
 10 celsas aetheris incolit arces,
 11 cujus longe gloria mundi
 12 trans flammantia moenia vecta est.
 13 O pietatis nescia verae
 14 pectora ! Ritu sacra nefando
 15 o qui fingitis, anne deorum
 16 quemquam Domino similem nostro
 17 nostis ? Quem super ardua caeli
 18 culmina positum nil latet imae
 19 sub cava clausum viscera terrae,
 20 nil humano procul aspectu
 21 trans multiplices aetheris orbes,
 22 inopem terrae qui prostratum
 23 suscitatur, et de pulvere egenum
 24 tollit, ut alto positus solio
 25 populi primos carpat honores.
 26 Qui maternos sterili fructus
 27 exoratus donat, et orbos
 28 laeta renovat prole penates.

PSALMUS CXIV. IN EXITU ISRAEL DE AEGYPTO, DOMUS etc.

P_5_8 v.1 Cum domus Isacidum patrias remearet ad oras,
 2 barbaraque invisae linqueret arva Phari,
 3 ipse Deus Judam caelesti numine tutum
 4 fecit, erat populi signifer ipse sui.
 5 Vidit et attonitas trepidum mare diffidit undas,
 6 Jordanis refugas in caput egit aquas.
 7 Dura per intonsos salierunt culmina montes,
 8 ut saturas gestit dux gregis inter oves,
 9 celsaque frondentes movere cacumina colles,
 10 agnus ut in pratis luxuriare solet.
 11 Quid, mare, vidisti, solito cur cesseris alveo ?
 12 Cur fugis in fontes, fluminis unda, tuos ?
 13 Cur ita concusso saliistis vertice, montes,
 14 ut satur exultat dux gregis inter oves ?
 15 Cur ita frondenti saliistis vertice, colles,
 16 agnus ut in pratis luxuriare solet ?
 17 Nempe Dei trepidum praesentia terruit orbem,
 18 cui cadit in Solymos victima multa focos.
 19 Qui lapidum venas laticum laxavit in usum,
 20 cui fluxit largo flumine dura silex.

PSALMUS CXV. NON NOBIS, DOMINE, NON NOBIS

P_5_9 v.1 Te, magne rector orbis, haud victoriam
 2 ex hoste saevo poscimus,
 3 nos ut per omnes fama gentes differat,
 4 nec apparatu ut splendido
 5 per ora vulgi nos triumphus aureo
 6 curru superbos transferat,

7 sed impiorum ut saecula gentium sciant
8 te largum opis cultoribus
9 tuis, fideque semper immutabili
10 promissa promptum solvere.
11 Ne forte rebus insolentes prosperis,
12 "Ubi nunc Deus vester ? " Rogent.
13 Deus astra noster incolens mortalium
14 nutu suo res temperat.
15 At impiarum finxit error gentium
16 manu deos inutiles,
17 aurum caminis excoquens, aut malleis
18 massa e sequaci bracteas
19 ducens, figura multiformi ludicra
20 affixit aris numina.
21 Inane vocis os habent, oculos habent
22 orbis inanes luminis.
23 Naribus odores nec trahunt, nec auribus
24 surdis sonores hauriunt.
25 Palpare manibus non queunt, torpentibus
26 nec ingredi vestigiis.
27 Nec vox anhelis edita e pulmonibus,
28 cavo recurrit gutture.
29 Quicumque tales fingit aut colit deos,
30 diis ipse similis sit suis.
31 At tu, Jacobi gens, loca fiduciam
32 omnem salutis in Deo,
33 qui te potenti sublevabit dextera,
34 et in periculis proteget.
35 Et vos, Aronis posteri, spem ponite
36 omnem salutis in Deo,
37 qui vos potenti sublevabit dextera
38 et in periculis proteget.
39 Quicumque cultor es Dei, fiduciam
40 loca salutis in Deo,
41 qui te potenti sublevabit dextera,
42 et in periculis proteget.
43 Qui nos favore semper amplexus memor
44 fovit fovetque sedulo,
45 cunctos Jacobi qui fovebit posteros,
46 Aronis et sacrum genus.
47 Qui se colentes, sive juvenes seu senes,
48 fovebit et custodiet.
49 Qui nosque donis semper augebit novis,
50 et liberorum liberos.
51 Nam nos profanis segregavit gentibus,
52 caeli solique conditor.
53 Caelum sibi ipse regiam fecit, solum,
54 sedem dedit mortalibus,
55 remunerantes muneribus illum ut suis
56 rerum parentem agnoscerent.
57 Neque ora laudes in tuas solvent, pater,
58 quos mors teget silentio.
59 Nos te parentem agnoscimus, qui spiritu
60 vitalis aerae vescimur.
61 Te prosequemur laudibus, dum lucido
62 sol axe terras ambiet.

PSALMUS CXVI. DILEXI, QUONIAM EXAUDIET DOMINUS etc.

P_5_10 v.1 Toto pectore diligam
 2 unice et Dominum colam,
 3 qui lenis mihi supplici
 4 non duram appulit aurem.
 5 Aurem qui mihi supplici
 6 non duram dedit hunc ego,
 7 donec pectora spiritus
 8 pulset, semper amabo.
 9 Jam mors ante oculos erat,
 10 jam stabam super aggerem
 11 busti, jam dolor anxius
 12 omni ex parte premebat.
 13 Expes tum prece supplice
 14 oravi Dominum : "Pater,
 15 quaeso," inquam, "miserabili
 16 saltem consule vitae."
 17 O justum Dominum et bonum,
 18 et pronum veniae ! Auxili
 19 is me consilii indigum
 20 saevo texit ab hoste.
 21 Ergo mens tibi reddita
 22 maerorem cohibe, et Deus
 23 quae larga tribuit manu
 24 donis laeta fruire.
 25 Vitam e faucibus eruit
 26 mortis, et lacrimas genis
 27 abstersit, stabili et pede
 28 firmavit tibi gressum.
 29 Tutus praesidio Dei
 30 degam, et polliciti fide
 31 fretus non dubia, canam
 32 grato pectore laudes.
 33 Lassus, rebus et asperis
 34 afflictus, trepida fuga
 35 vitae prospiciens meae,
 36 sic mecum ipse loquebar :
 37 "Nulla certa homini fides,
 38 at rerum arbiter optimus,
 39 unus polliciti tenax,
 40 unus fallere nescit."
 41 Tot liber toties malis,
 42 tot auctus toties bonis,
 43 quo tandem officio tibi
 44 coner solvere grates ?
 45 Te festa dape, te prece,
 46 te libamine prosequar.
 47 Te vitae columen meae
 48 grata voce fatebor.
 49 Te vitae columen meae
 50 in coetu populi tui
 51 grata prosequar hostia,
 52 damnatus tibi voti.

53 Electos, genitor, tuo
 54 custos praesidio tegis,
 55 nec per vim pereuntium
 56 manes linquis inultos.
 57 Te servum dominus tuum
 58 ancillae sobolem tuae
 59 me minacibus hostium
 60 vinclis eripuisti.
 61 Te, rerum pater optime,
 62 semper laudibus efferam,
 63 nomen in dubiis tuum
 64 usurpabo periclis.
 65 Te voti reus, erutus
 66 morti, prosequar hostia,
 67 sacri limen ad atrii,
 68 sacrae redditus urbi.

PSALMUS CXVII. LAUDATE DOMINUM OMNES GENTES etc.

P_5_11 v.1 Omnes ubique gentium
 2 quos solis ambit orbita,
 3 rerum parentis optimi
 4 laudes libenter pangite.
 5 Agnoscite indulgentiam
 6 benignius nos in dies
 7 foventis, et constantiam
 8 promissa certam reddere.

PSALMUS CXVIII. CONFITEMINI DOMINO etc.

P_5_12 v.1 Eia Deum laudate, Deum facilemque bonumque,
 2 larga benignum semper indulgentia.
 3 Ea Dei, soboles Jacobi, dicite laudes,
 4 larga benignum semper indulgentia.
 5 Eia Deum canat Aronis numerosa propago,
 6 larga benignum semper indulgentia.
 7 Eia Dei pura cultor pietate, fatere
 8 larga benignum semper indulgentia.
 9 Audiit orantem Dominus me rebus in artis,
 10 ac liberavit ilico ex angustiis.
 11 Ille mihi assistat solus, non arma, nec ulla
 12 humana mi vis adferet formidinem.
 13 Ille mihi auxilio sit solus, lumina damnis
 14 explebo (nec me decipit spes) hostium.
 15 Tutius a rerum Domino est sperare salutem,
 16 confidere armis quam virorum fortium,
 17 tutius a rerum Domino est sperare salutem,
 18 confidere opibus quam potentum principum.
 19 In me conjurent populi omni ex parte propinqui,
 20 Dei faventis conteram cunctos ope.
 21 Circumdent omnique premant ex parte licebit,
 22 Dei faventis conteram cunctos ope.
 23 Circumdent omnique premant ex parte licebit
 24 quam nube densa vere se fundunt apes,

25 non secus ac siccas ignis violentia spinas,
 26 Dei faventis conteram cunctos ope.
 27 Improbe, quid frustra labefactum evertere tentas ?
 28 Dei potentis sustinet me dextera.
 29 Ille meae vires, illum mea carmina pangent
 30 unum, salutis unus auctor est meae,
 31 cunctaque justorum pariter tentoria plaudent,
 32 meae salutis pariter auctorem Deum
 33 laudabunt, cantuque ferent ad sidera dextram
 34 belli potentem, divitem victoriae.
 35 Dextram armis, dextram praestantem robore, dextram
 36 belli potentem, divitem victoriae.
 37 Saeva quid insultas mihi mors ? Tua tela reconde,
 38 frustra minaci territas me spiculo.
 39 Vivo quidem, vivusque feram super aethera cantu
 40 raram benigni numinis clementiam.
 41 Jure parens bonus aerumna me afflixit acerba,
 42 at imminentem reppulit mortem tamen.
 43 Pandite, pontifices, sacri mihi limina templi,
 44 salute parta ut laude prosequar Deum.
 45 Haec est illa Deo gratissima janua, justis
 46 votis aperta dehinc futura janua.
 47 Te merito, pater alme, canam. Tu rebus in artis
 48 aurem applicasti supplicis placabilem.
 49 Sospes et infesto, duce te, sum tutus ab hoste,
 50 et molientum tecta quem rejecerat
 51 artificum improbitas lapidem, fastigia summi
 52 late refulgens jam coronat anguli.
 53 Scilicet arcano factum est hoc numine, nostra
 54 attonita factum quod stupescunt lumina.
 55 O lux festa, o lux jucunda ad gaudia nata,
 56 caelestis in nos lux favoris conscia !
 57 Usque fave, custosque tui, pater optime, regis
 58 sis, et secundos coepta duc ad exitus.
 59 O felix, iterum o felix, quem rector Olympi
 60 populo salutis misit auctorem suo !
 61 Nos, quibus est sacri custodia credita templi,
 62 vobis precamur cuncta vertant prospere.
 63 Unus enim Dominus rerum moderatur habenas,
 64 qui gratiae in nos lumen effundit suae.
 65 Laetitia celebrate diem, foetusque bidentis
 66 tenellus arae vinctus astet cornibus.
 67 Te Dominum, te mente colam, te voce fatebor,
 68 tuumque semper laude nomen prosequar.
 69 Eia Deum laudate, Deum facilemque bonumque,
 70 larga benignum semper indulgentia.

PSALMUS CXIX. BEATI IMMACULATI IN VIA etc.

ALEPH

P_5_13 v.1 O beatos, qui sequuntur orbitam legis Dei !
 2 O beatos, qui monenti sponte parent numini,
 3 labe puri nec relinquunt lege jussu tramitem,
 4 quem severitate dura nos tenere praecipis !
 5 O gradum regas labantem sic, monenti ut paream,

6 a tuis attenta jussis nusquam ut errent lumina.
 7 Tum ducem canam aequitatis candido te pectore.
 8 Obsequar tibi, obsequentem tu tibi ne desere.

BETH

9 Quid juventam ne labascat servat aequa ac lex tua ?
 10 Hinc ne aberrem, modo laboro, tu laborantem rege.
 11 Ne vacillet pes, meo tua verba condo pectore.
 12 Rector orbis, aequitatis regulam tuae doce
 13 me, tui oris verba semper ore mediter ut meo,
 14 illa longe cariora semper auro ut aestimem.
 15 Illa cogitem, illa secter, illa mirer unice.
 16 Illa nulla e corde nostro deleant oblivia.

GIMEL

17 Da tuae legi obsequenti vivere, ut propius tui
 18 conspicer pacti aequitatem, pande mentis lumina.
 19 Inquiliuum jussa legis ne tuae celaveris.
 20 Foederum leges tuorum aegra mens desiderat.
 21 O, tuae legis superbum qui premis fastidium,
 22 me tuae legis sequacem vindica. Cui divites
 23 arroganter obloquuntur, jussa quod servem tua,
 24 e tuo sermone vitae quod capessam formulam.

DALETH

25 Aeger animus languet, aegrum recrea verbo tuo.
 26 Cordis arcanas latebras prodidi tibi, rudem
 27 tu doce, praeferque lucem, scita mediter ut tua,
 28 et cor anxium tui verbi erigas solatio.
 29 Absque fuco fac tuarum scita legum ut diligam.
 30 Recta sector, instituta specto semper ad tua.
 31 Lex tua animo sculpta inhaeret, spem meam ne desere.
 32 Pande iter tuae aequitatis, te comes laetus sequar.

HE

33 Legum iter monstra tuarum, foedus erudi tuum,
 34 foedus ut legemque totis imbibam praecordiis,
 35 cuncta ut instituta recta secter usque semita.
 36 Sordidis averte curis jussa pectus ad tua,
 37 flecte lumina, impiae ne vanitates hauriant.
 38 Languidum excita, face ut te timeat animus ac amet.
 39 Libera probro a pudendo me benignus arbiter :
 40 tua statuta diligentem servet aequitas tua.

VAU

41 Me bonus respice opiferque, foederis memor tui,
 42 ora claudam ut exprobranti spem tuae fiduciae.
 43 Spes salutis, veritatem ab ore ne tuam eripe.
 44 Semper ut tuis statutis audiens tuto gradu
 45 ambulem, tua jussa quaero sola. Coram regibus
 46 disseram (nec me pudebit) de tuis sermonibus.
 47 Hos amavi, et hos amabo, et obsequens his brachia
 48 tollam, ut usque et usque volvam hos ore, mente cogitem.

ZAIN

49 Sis memor pacti, columna quae meae fiduciae est,

50 quod levat maerentum, et aegrum e fauce mortis eripit.
 51 Rideant licet superbi, te sequar. Legem tuam
 52 usque repetam, in rebus artis hoc erit solacium.
 53 Impios cum legis hostes cerno, totus horreo.
 54 Carmen haec erit mihi, orbem donec hospes hunc colam.
 55 Hanc ut observem tenebrae me silentes admonent,
 56 illa mentem cura semper unice exercet meam.

HETH

57 Obsequi tibi mihi una est spes, opes, haereditas.
 58 Ut bonus promissa praestes, unice unum id ambio,
 59 actiones vitae ut omnes ad tuam componerem
 60 legem. Ad hanc custodiendam, qua licet, me comparo.
 61 Impeditus impiorum vinculis hanc cogito.
 62 Hujus ergo nocte surgens prosequor te laudibus.
 63 Qui verentur hanc, amicis utor : hanc, parens bone,
 64 qui tua benignitate cuncta replet, edoce.

TETH

65 Domine, ades, pollicita servo fac benigne appareant,
 66 in tua lege aquiescam, me doce legem tuam.
 67 Vix malo coacta leges mens sequi didicit tuas.
 68 Scita, fons benignitatis, tua benigne me doce.
 69 Me superbi criminantur, corde toto ego te sequar.
 70 Jussa me juvant tua. Illis mens hebescit prosperis,
 71 erudisti me malis, ut legi adhaeream tuae,
 72 haeream ut legi, auri acervis gratiori ingentibus.

IOD

73 Da manu tua creato nosse vim legis tuae.
 74 Me pii laeti obsequentem legibus spectant tuis.
 75 Justa lex tua est, premis me jure justus arbiter.
 76 At libenter audientem jussa me tua recrea.
 77 Tibi libenter obsequentem praeveni clementia.
 78 Servulum tuum prementem comprime arrogantiam.
 79 Me tuae legi obsequentes obsequentem diligant,
 80 nec ferat tibi obsecundans pura mens infamiam.

CAPH

81 Deficit mens spe salutis, spes nec illam deficit.
 82 Lassa languent lumina. Utris corpus instar aridi
 83 tabuit. Solare promissi in malis memorem tui.
 84 Quis ferendi finis ? Hostem quando punies meum ?
 85 Mihi tuae legis superbus hostis effodit scrobem.
 86 Aequa lex, promissa certa sunt tua. Hostes confice
 87 qui premunt me, quod te in uno colloquem fiduciam.
 88 Scita fac ut ad tua omnes actiones dirigam.

LAMED

89 Certa eunt promissa, certa stat tuis verbis fides,
 90 dum polo stellae micabunt, herba terras vestiet,
 91 sempiterno quae recursu legibus parent tuis.
 92 Obruissent me dolores, ni affuisset lex tua,
 93 lex salubris, nulla nobis tollet hanc oblivio.
 94 Sum tuus, tua instituta diligentes diligo.
 95 Impii mortem parabant scita meditantia tua.

96 Ceteris est finis, illa sola semper permanent.

MEM

97 O tuam quam legem amavi ! Semper illam cogito.
 98 Hostibus prudentiorem me meis haec reddidit.
 99 Factus huic fui obsequendo doctior doctoribus.
 100 Huic quod audiam, senecta astutior sum callida,
 101 huic ut obsequar malorum flecto gressum a semitis.
 102 Te docente non recedo paululum a verbis tuis,
 103 faucibus meis suavi melle suavioribus.
 104 Eruditus his, recedo a semita mendacii.

NUN

105 Sancta lex, velut lucerna, dirigit pedes meos.
 106 Obstinavi animum tuis ut obsequar sermonibus.
 107 Obrutum malis, tuorum foederum memor, leva.
 108 Edoce me jussa, et oris hanc bonus cape victimam.
 109 Jussa non rejecta, quamvis undique instarent mala.
 110 Haec nec abjecti impiorum paene clausus retibus.
 111 Haec voluptas, hoc mihi unum gaudium, haec haereditas.
 112 Hic scopus mihi manebit, vivus aura dum fruam.

SAMECH

113 Diligo legem tuam, sicut malos abominor.
 114 Unica est spes, una verbis in tuis fiducia.
 115 Ut Dei mandata servem, hinc, impii, facessite.
 116 Me tuo sermone fulci, ne sequar spes irritas.
 117 Te regente salvus usque jussa diligam tua.
 118 Perfugas calcas tuos, qui vana frustra cogitant.
 119 Legem amo tuam, quod omnes impios extermines.
 120 Corpus horret cum severum cogito te judicem.

AIN

121 Aequa ne me diligentem desere opprimentibus,
 122 justa fac amem superbo tutus a ludibrio.
 123 Dum salutem spero, scita specto dum tua, lumina
 124 lassa languent. Tu benignus edoce servum tua
 125 placita, legum fac tuarum intelligat mysteria.
 126 Tempus instat puniendi legis adversarios.
 127 At tuum foedus mihi auro est carius carissimo.
 128 Hoc amo, huc errore misso dirigo vitae ordinem.

PHE

129 Mira rituum tuorum mens colit mysteria.
 130 Verba pectori imperito luminis sunt janua.
 131 Faucibus tua verba apertis duco, vitae ut spiritum.
 132 Ceu soles te diligentes, intueri me bonus.
 133 Dirige ad tua verba gressus, tum scelus non opprimet
 134 me. Tuae legi, impiorum liber a calumnia,
 135 obsequar. Bonus intueri me, tuam ut legem sequar.
 136 Si quis hanc spernit, fluunt mihi more rivi lacrimae.

ZADE

137 Justus es creator orbis, justa jussa sunt tua.
 138 Plena lex est aequitatis, certa verbis veritas.
 139 Rumpor ira, cum scelestis impie contemnitur.

140 Sermo purus instar ignis, servus hunc amat tuus.
 141 Impii spernant licebit me, tuam legem sequar.
 142 Jussa stant tua sempiterna meta nullo turbine.
 143 Turbidis mihi illa rebus anxium cor recreant.
 144 Scire legem da tuum, vitam mihi donaveris.

COPH

145 Corde toto audi vocantem, legi ut obsequar tuae.
 146 Invoco, adjuva invocantem, foedus ut colam tuum.
 147 Invoco te mane, verbis in tuis fiducia est.
 148 Nocte vigiles anteverto, verba mediter ut tua.
 149 Me benigne audi, ut soles, et fauce mortis eripe.
 150 Impii me persecuntur, legis expertes tuae.
 151 Tu propinqua, Domine, jussa cujus omnia justa sunt.
 152 Jussa firma fine nullo, firma nullo exordio.

RES

153 Adspice afflictum. Leva me, foederis memorem tui,
 154 foederis memor meam vitam patronus assere.
 155 Impii male interibunt, jussa qui tua negligunt.
 156 O bonus sine fine, roboram, ut soles, vitam meam.
 157 Me prementum multitudo a lege non flectit tua.
 158 Maeret animus intuendo pacta qui spernunt tua.
 159 Tu bonus tua jussa amantem me vicissim recrea.
 160 Cuncta promissa tua nullum fixa norunt terminum.

SIN

161 Me premit tyrannis, at cor verba meditatur tua.
 162 Verba gratiora gazis aureis animo meo.
 163 Diligo legem tuam, ceu vanitatem abominor.
 164 Septies tuam aequitatem me canentem lux videt.
 165 Legem amantibus tuam pax multa, nulla offensio.
 166 Spectat a te mens salutem, nixa promissis tuis.
 167 Mens amat promissiones unice et servat tuas.
 168 Servo tua pacta, ut vicissim tu vitam observas meam.

THAU

169 Invocanti da tuarum scire legum abscondita.
 170 Invocantem libera me, foederis memor tui.
 171 Te docente praedicabit os tuas laudes, tua
 172 jussa lingua nuntiabit, jussa longe aequissima.
 173 Dexteram tua obsequentem jussibus juva tuis.
 174 Abs te opem spero, tuarum scita legum diligo.
 175 Sospita me, ut praedicem te, lex juvabit me tua.
 176 Me, vagam ut pecudem, require foederis memorem tui.

PSALMUS CXX. AD DOMINUM, CUM TRIBULARER etc.

P_5_14 v.1 Hinc me obsidebant bella, et hinc calumniae
 2 livor faces admoverat.
 3 Ad te refugi destitutis omnibus,
 4 rerum creator optime.
 5 Te voce supplex invocavi, tu meas
 6 non lentus audisti preces.
 7 A fraudulentae toxico linguae Deus

8 me protege et mendaciis.
 9 O lingua fraudis machinatrix impiae,
 10 qua spe meum oppugnas caput ?
 11 Scythae ferocis lingua pestilentior
 12 tinctis veneno spiculis,
 13 ignis voracis lingua flammis acrior,
 14 cum silva flagrat arida.
 15 Heu vita tristis, vita dura et anxia,
 16 per invios erratica !
 17 Montes, latrones inter, atque inhospita
 18 gentis ferae mapalia,
 19 mens aegra vitae carpitur fastidio,
 20 hostes quietis accolens,
 21 hostes quietis, blanda quos oratio
 22 ferociores efficit,
 23 quos innocentis mentio concordiae
 24 ad bella saeva exasperat.

PSALMUS CXXI. LEVAVI OCULOS MEOS IN MONTES etc.

P_5_15 v.1 Dum ferox armis inimicus instat,
 2 ad montes vaga lumina
 3 proximos circumfero, si quid illinc
 4 forte appareat auxilii.
 5 At mihi caeli Dominus solique
 6 certam solus opem feret.
 7 Ille (quid vano trepidans tumultu,
 8 cor, pulsas mihi pectora ?),
 9 Ille sanctorum, mihi crede, custos
 10 noctes excubat et dies,
 11 victa nec blandi illecebris soporis
 12 umquam lumina dimovet.
 13 Leniter passis tibi semper alis
 14 umbrae more supervolat,
 15 ne cutem solis violentioris
 16 urant spicula de die,
 17 nocte ne lunae nebulosioris
 18 artus degravet halitus.
 19 Seu domi clausus lateas, latentem
 20 clausis servat in aedibus,
 21 seu foris pacis obeas amicae,
 22 seu belli fera munera,
 23 sospitem e cunctis Dominus periculis
 24 semper te bonus eruet.

PSALMUS CXXII. LAETATUS SUM IN HIS QUAE etc.

P_5_16 v.1 O lux candida, lux mihi
 2 laeti conscia nuntii,
 3 jam pleno stata tempora
 4 reddit circulus anno,
 5 jam festi revocant dies
 6 augustam Domini ad domum,
 7 jam sacri pedibus premam

8 latus limina templi.
 9 Jam visam Solymae edita
 10 caelo culmina, et aedium
 11 moles nobilium, et suo
 12 angustam populo urbem,
 13 urbem, quam procul ultimis
 14 terrae finibus exciti
 15 petunt Isacidae, ut Deum
 16 placent more parentum,
 17 jussam caelitus oppidis
 18 urbem jus dare ceteris,
 19 et sedem fore Davidis
 20 cuncta in saecula proli.
 21 Mater nobilis urbium,
 22 semper te bona pax amet,
 23 et te semper amantibus
 24 cedant omnia recte.
 25 Semper pax tua moenia
 26 colat, semper in aedibus
 27 tuis copia dextera
 28 larga munera fundat.
 29 Dulcis Isacidum domus,
 30 te pax incola sospitet,
 31 sedes numinis, omnia
 32 succedant tibi fauste.

PSALMUS CXXIII. AD TE LEVAVI OCULOS MEOS etc.

P_5_17 v.1 Ad te levavi, rex pater et Deus,
 2 ad te levavi lumina, qui procul
 3 contagio humano remotus
 4 templa habitas radiata caeli.
 5 Ut servus observat domini manus,
 6 gestus et omnes lumine mobili
 7 argute ceu nutus acutis
 8 serva oculis dominae tuetur,
 9 te nostra spectant, te, Domine et Deus,
 10 10 intenta mentis lumina, dum graves
 11 11 iras remittas, servulisque
 12 12 des veniam bonus atque pacem.
 13 13 Jam lenis in nos respice, servulis
 14 14 jam parce tandem, parce fidelibus,
 15 15 quos hostis insultans superbo
 16 16 ludificatque premitque vultu.
 17 17 Contemptus hosti ac opprobrium sumus,
 18 18 vitaeque taedet. Ferre animus nequit
 19 19 supercili fastum superbi,
 20 20 ludibriumque opibus tumentum

PSALMUS CXXIV. NISI QUIA DOMINUS etc.

P_5_18 v.1 "Ni faventis affuisset numinis praesentia,"
 2 dicat Isaci propago, "numinis praesentia
 3 ni faventis affuisset, cum veniret perditum

4 nos superba multitudo, freta stultis viribus,
 5 forte vivos devorassent, debilesque et pauculos,
 6 ira fervidi furoris avida nostri sanguinis
 7 obruisset instar undae nos procella cladium,
 8 more torrentis nivali ab imbre turgidi, impetus
 9 nos repente sustulisset, usque ad animam gurgites,
 10 usque ad animam transiissent gurgites impervii."
 11 Sempiterno laus Deo sit, qui suos non tradidit
 12 dentibus praedam cruentis perfidarum gentium.
 13 Cassibus fractis dolosis sospites evasimus,
 14 capta veluti jam volucris rete fugit aucupis.
 15 In Deo nostrae salutis spes reposita est unico,
 16 qui solum caelumque fecit vi potentis dexterarum.

PSALMUS CXXV. QUI CONFIDUNT IN DOMINO etc.

P_5_19 v.1 Sionis arcem non Aquilo impotens
 2 saxo sedentem perpetuo quatit,
 3 nigrantibus non Auster alis
 4 imbriferas glomerans procellas.
 5 Quicumque vere spem locat in Deo,
 6 non hostis hunc vis, non quatiet dolus,
 7 si fractus illabatur orbis,
 8 incolumis fugiet ruinam.
 9 Ut civitatem moenia montium
 10 sanctam tuentur, sic Dominus suos
 11 vi cingit arcana, nec umquam
 12 praesidii viduos relinquet.
 13 Nec impiorum perpetuo iugo
 14 sinet piorum progeniem premi,
 15 ne turpibus contaminetur
 16 flagitiis labefacta mentem.
 17 Ut affluenter fac bona sint bonis,
 18 ut continenter fac male sit malis,
 19 de calle quos recti illecebris
 20 impietas male sana flexit.
 21 Fac, sancte rerum conditor, ut domum
 22 beata semper pax colet Isaci,
 23 tranquillitas segura pulchrae
 24 exhilaret Solymae colonos.

PSALMUS CXXVI. IN CONVERTENDO DOMINUS CAPTIVITATEM SION etc.

P_5_20 v.1 Cum pater omnipotens captam remeare Sionem,
 2 dulcemque jussit patriam revisere,
 3 attoniti stupuere animi, necopinamque secum
 4 metum librantes inter et spem gaudia.
 5 Vixque sibi credunt, veluti qui noctis opacae,
 6 sopore pulso, mane versat somnia.
 7 Pro lacrimis redeunt risus, sua gaudia quisque
 8 sermone celebrat, patrium laudans Deum.
 9 Nec minus attonito stetit ad miracula vultu,
 10 sic barbarorum turba secum mussitans :
 11 "En, pater ille deum quot signa ostendit amoris !

12 Hujus saluti gentis usque ut prospicit !"

13 Nec falso : nam signa Deus monstravit amoris

14 praeclara, nostrae dum saluti prospicit.

15 Ergo alacres laeto testantur gaudia plausu.

16 At tu benigne fac parens ut ceteri

17 jam redeant, plenisque viis sic agmen inundet,

18 ut aestuosi cum flat Austri spiritus,

19 indignata suis cohiberi flumina ripis,

20 vaga per agros murmurant licentia.

21 Qui male fecundae commisit semina terrae,

22 et corde tristis multa volvit anxio,

23 si venit uberius seges imbribus aucta benignis,

24 exultat hilari cor metentis gaudio.

25 Nos quoque longa fugae post taedia, postque labores,

26 laeti arva dulcis patriae revisimus.

27 Te patrium canimusque Deum, semperque canemus,

28 agimusque memores atque agemus gratias.

PSALMUS CXXVII. NISI DOMINUS AEDIFICAVERIT DOMUM etc.

P_5_21 v.1 Ni coepta Dominis juverit, frustra struit

2 moles superbas aedium.

3 Ni Dominus urbem servet, incassum excubat

4 muris vigil custodia.

5 Frustra antevertis mane solem, et vespere

6 sero domum reverteris :

7 victum labore vix parabis anxio,

8 ni Dominus admorit manum.

9 At ille amicis interim suis dabit

10 purum soporem somniis,

11 domumque dulci prole fetam liberum

12 praebebit. Haec haereditas,

13 haec illa merces qua beat caros sibi

14 rerum ille Dominus omnium.

15 Non sic timori est dexteram telis gravis

16 bellator hostis hostibus,

17 ut quem parentem masculae propaginis

18 favor beavit numinis.

19 O ter beatum et amplius, qui talibus

20 pharetram sagittis impleat.

21 Non ad tribunal erubescet jurgia

22 procacis adversarii.

PSALMUS CXXVIII. BEATI OMNES QUI TIMENT DOMINUM etc.

P_5_22 v.1 Felix o ter et amplius

2 quem timor Domini tenet,

3 quem non illius a via

4 flectit devius error.

5 Felix et tibi prospere

6 cedent omnia, nam tuo

7 carpes dulcia fercula

8 comparata labore.

9 Instar palmitis uberi

10 proventu gravidi, et coma
 11 cingentis viridi domum,
 12 te conjux hilarabit.
 13 Ceu plantaria fertili
 14 pubescunt oleae solo,
 15 jucundo tibi liberi
 16 cingent agmina mensam.
 17 Quem timor Domini tenet,
 18 inter talia commoda
 19 vitae tempora transiget.
 20 At te ex arce Sionis
 21 ditabit Domini manus
 22 larga, et conspicias bonis
 23 florentem Solymam, tibi
 24 donec vita manebit
 25 prolis adspicies tuae
 26 longa stirpe propaginem,
 27 festa semper et Isaci
 28 laetos pace nepotes.

PSALMUS CXXIX. SAEPE EXPUGNAVERUNT etc.

P_5_23 v.1 Jure dicat grex bonorum : "Mille me molestiis
 2 factio pressit malorum." Prima abusque origine
 3 factio pressit malorum mille me molestiis,
 4 nec tamen subvertere umquam quivit ullis machinis.
 5 Terga saevis exaravit verberum vibicibus,
 6 terga longis secta sulcis, hostis ad fastidium,
 7 sed parens rerum benignus vincla rupit impia,
 8 meque nervo liberavit servitutis asperae.
 9 Qui Sionis non amico spectat arces lumine,
 10 vota semper vana volvat, spes inanes nutriat.
 11 Marceat, ceu sole marcet herba languens torrido,
 12 herba summis nata tectis, quae repente corruiat
 13 ante falcis plagam acutae, sicca marcidis comis
 14 unde nec sinum replevit qui manipulos colligit.
 15 Nec manum messor perustus, prata tondens florea,
 16 nec viator ominatus prospera est metentibus
 17 sic precatus arva laeta, et arva lauta, et roscida.
 18 "Hunc in annum et usque in annos hunc sequentes numinis
 19 vos favor semper benigni servet, ornet, augeat."

PSALMUS CXXX. DE PROFUNDIS CLAMAVI etc.

P_5_24 v.1 Curarum rapidis fluctibus obrutus,
 2 arcanis animi de penetralibus,
 3 audi verba precantis,
 4 clamavi : "Pater optime,
 5 audi verba, pater, quae tibi supplices
 6 multo cum gemitu fundimus. Applica
 7 intentam bonus aurem
 8 tristes ad querimonias.
 9 Si vindex tetricus facta nefarie
 10 poenis cuncta velis plectere, quis sibi

11 tam confidit, acerbum
 12 ut non horreat exitum ?
 13 At tu non furiis tristis es asperis,
 14 sed largus veniae, et munificus parens,
 15 ut te jure colamus,
 16 legum et jussa salubria.
 17 Nam spes polliciti me recreat tui,
 18 promissique fides fallere nescii,
 19 et fiducia certa
 20 mentem sustinet anxiam.
 21 Non sic praecipiti nocte vigil diem
 22 observat roseum, non roseum vigil
 23 Phoebi sic avet ortum,
 24 ut flagrat mea mens Deum."
 25 Securi in Domino figite spem, pii,
 26 non duro veniam supplicibus dare,
 27 et prompto dare pressis
 28 duro servitio manum.
 29 Electi generis progeniem gravi
 30 pressam servitio ex hostibus asseret,
 31 et de morte redemptam,
 32 noxis eximet omnibus.

PSALMUS CXXXI. DOMINE, NON EXALTATUM COR MEUM etc.

P_5_25 v.1 Si spiritu impotenti,
 2 si lumine insolenti
 3 elatus ambulavi,
 4 si virium mearum
 5 fiducia superbus
 6 despexerim minores,
 7 si mentis arrogantis
 8 sublime vectus alis
 9 majora quam liceret
 10 sperare cogitavi,
 11 ni vota temperavi
 12 modestia salubri,
 13 nil deprecor rogove,
 14 nullam recuso poenam.
 15 Qualis puer tenellus
 16 vix lacte pulsus unam
 17 suspirat in parentem,
 18 hanc spectat, hac ab una
 19 dependet, ambit unam,
 20 aeterne rector orbis,
 21 te mens mea intuetur
 22 unum, uni adhaeret, unum
 23 te vindicem salutis
 24 agnoscit. O piorum
 25 propago sancta patrum,
 26 una Deum parentum
 27 spectate, spes in uno
 28 locate, cuncta ab uno
 29 sperate, spem nec umquam
 30 fovebitis caducam.

PSALMUS CXXXII. MEMENTO, DOMINE, DAVID etc.

P_5_26 v.1 Davidis esto memor, genitor, memor esto laborum
 2 quos tulit in rebus tua jussa secutus egenis.
 3 Ille tibi, Hebraeae gentis Deus unice, votis
 4 obstrinxit caput et promissis ora reclusit.
 5 "Non aedes prius ingrediar, mollive reponam
 6 membra toro, aut oculis dulcem indulgebo soporem,
 7 quam fanum inveniam, et sacri fundamina templi
 8 designem, sanctisque locum dimetiar aris.
 9 Fama licet patriae multum promitteret orae,
 10 inter saxa tamen silvestribus obsita dumis
 11 monstravit Deus ipse locum. Deus ipse perenne
 12 hic templum, templique sacris sedem innuit aris.
 13 Ergo alacres gratam Domino properemus ad aedam,
 14 scamna pedum pronis veneremur vultibus, et tu,
 15 sancte parens, bonus ac placidus cape vota, tuamque
 16 laetus adi sedem, neu dedignare penates
 17 qui memorem aeterni servabunt foederis arcam.
 18 Templi sacerdotes casti tueantur, et omnes
 19 qui tua rite piis venerantur numina sacris,
 20 laetitia exsultent." Si David pectore puro
 21 te coluit, ne Davidicae nunc respue prolis
 22 dona, tui populi cui frena tenenda dedisti.
 23 Davidi enim quondam (neque jam sententia vertet
 24 ulla tuam mentem) jurasti : "E stirpe propago
 25 nata tua solium et sceptrum retinebit avitum.
 26 Quod si posteritas servet mea foedera, pactis
 27 si steterit, leges si non temerarit avitas,
 28 nulla dies solio, vis nulla extrudet avito,
 29 et natos natorum, et qui nascentur ab illis.
 30 Ipse mihi sedem legi sine fine Sionem,
 31 quam colerem. Hic mihi certa quies, hic certa voluptas,
 32 haec mihi grata domus, caeli indulgentia fruges
 33 faxo alat, et duros large saturabo colonos.
 34 Templi tuebuntur casti justique ministri,
 35 laetitiaque piis perfundam pectora certa,
 36 Davidicoque novum producam e semine germen,
 37 quod late in populos fundet sua brachia. Stirpi
 38 prospiciam serae solium qui illustret avitum,
 39 claraque per cunctas diffundat lumina terras.
 40 At pudor et turpes maculas infamia spargens
 41 hostibus inficiet vultus. Jessaea propago
 42 florebit, cingetque sacrum diademate crinem,
 43 transmittetque suam longaeva in saecula famam."

PSALMUS CXXXIII. ECCE QUAM BONUM ET QUAM JUCUNDUM etc.

P_5_27 v.1 Nil caritate mutua fratrum, nihil
 2 jucundius concordia.
 3 Non aura suavis balsami, cum funditur
 4 Aronis in sacrum caput,
 5 et imbre laeto proluens barbam et sinus

6 limbum pererrat aureum.
 7 Non ros, tenellae gemmulis argenteis
 8 pingens Sionis gramina,
 9 aut verna dulci inebrians uligine
 10 Hermonis intonsi juga,
 11 fraterna quam pax incolit domum, juvat
 12 Dominus benigna dextera,
 13 et opibus auget. Filiorum et filios
 14 multis propagat saeculis.

PSALMUS CXXXIV. ECCE, NUNC BENEDICITE DOMINO etc.

P_5_28 v.1 Domini ministri, nocte qui custodiae
 2 sancti excubatis atrii,
 3 laudate Dominum laudibus donec sacro
 4 nox annuit silentio.
 5 Interque laudes mentibus puris manus
 6 caelo supinas tollite,
 7 et vos beabit Dominus invicem omnibus
 8 caeli solique commodis,
 9 Dominus Sionem qui tuetur, unicus
 10 caeli solique conditor.

PSALMUS CXXXV. LAUDATE NOMEN DOMINI etc.

P_5_29 v.1 Vos quibus est sacri custodia credita templi,
 2 eia Deum laudate. Deum celebrate, ministri
 3 qui sacra assidua vigilatis ad atria cura.
 4 Eia Deum laudate bonum, nomenque beatum
 5 tollite perpetuo vestro super aethera cantu.
 6 Quippe Jacobum ultro legit, lectumque dicavit
 7 hunc sibi, ceu privam patrimoni in saecula sortem.
 8 Nota quidem Domini est immensa potentia, notum
 9 numen, quippe deos sub se premit altior omnes,
 10 quos alii stolidi placant ceu numina cura.
 11 Versat enim nutu caelo, terraque, marique,
 12 aut si quod caecis clausum est penetrabile tenebris
 13 naturae, quodcumque libet. De viscere terrae
 14 evocat, et liquido suspendit in aere nubes,
 15 fulguribusque vagis venientes praevenit imbres,
 16 deque suis promit ventorum flamina gazis.
 17 Ille hominum primos fetus pecudumque per arva
 18 divitis Aegypti stravit, regemque superbum,
 19 et quicumque bibunt septemflua flumina Nili
 20 terrui ostentis ; validis ille oppida muris
 21 turrita evertit ; numeroso milite cinctos
 22 cum stirpe exstinxit violento funere reges ;
 23 stravit Amorrhaeum valida virtute Seonem,
 24 quique Basan Ogus magna ditione tenebat,
 25 regnaque non uni Cananaeia subdita sceptro,
 26 arvaque, dejectis nuper viduata tyrannis,
 27 accepere novos Jacobi e stirpe colonos.
 28 Sancte parens rerum, qui justo examine nosti
 29 parcere subjectis et debellare superbos,

30 posteritas te sera canet, tua splendida facta
 31 nulla umquam ex animis tollent oblivia nostris.
 32 At sibi quae variis finxit simulacra figuris
 33 vana superstitio, calidis fornacibus aurum
 34 argentumve liquans, nil sunt nisi ludicra dextrae
 35 humanae commenta. Illis os vocis inane,
 36 lucis egent oculi, surdas sonus advolat aures,
 37 et patulas frustra nares jucundus odorum
 38 halitus incursat, calidus non pectora pulsat
 39 spiritus. O quisquis ludibria talia fingit
 40 aut colit, ipse suis similis dis exigat aevum,
 41 mentis inops et lucis egens : non aure nec ore
 42 accipiat reddatve sonos, nec nare sagaci
 43 sentiat halantes per prata nitentia flores.
 44 Tu vero genus a magno Israele profectum,
 45 et domus Aronis genitique e sanguine Levi,
 46 et quicumque pio rerum venerare parentem
 47 obsequio, laudate Deum, qui tecta Sionis
 48 ardua, qui sacrum Solymae bonus incolit aedem.

PSALMUS CXXXVI. CONFITEMINI DOMINO QUONIAM BONUS etc.

P_5_30 v.1 Eia Deum laudate, Deum facilemque bonumque,
 2 larga benignum semper indulgentia.
 3 Eia Dominum laudate, Deus namque ille deorum est,
 4 larga benignum semper indulgentia.
 5 Cui domini rerum submittunt sceptrum tyranni,
 6 larga benignum semper indulgentia.
 7 Qui facit attonito solus miracula mundo,
 8 larga benignum semper indulgentia.
 9 Qui nitidos mira arte polum convolvit in orbem,
 10 larga benignum semper indulgentia.
 11 Qui liquidis terras emergere jussit ab undis,
 12 larga benignum semper indulgentia.
 13 Qui vitreo accendit flammantia lumina caelo,
 14 larga benignum semper indulgentia.
 15 Qui solem auricomum jussit dare jura diei,
 16 larga benignum semper indulgentia.
 17 Qui lunam et stellas tenebras distinguere noctis
 18 jussit, benigna semper indulgentia.
 19 Pignora prima Phari qui fato exstinxit acerbo,
 20 larga benignum semper indulgentia.
 21 Isacidas medio incolumes ex hoste recepit,
 22 larga benignum semper indulgentia.
 23 Qui rubri Oceani torpentes diffidit undas,
 24 larga benignum semper indulgentia.
 25 Perque undas fissas sobolem traduxit Abrami,
 26 larga benignum semper indulgentia.
 27 Pharonem et Pharios submersit gurgite currus,
 28 larga benignum semper indulgentia.
 29 Deduxitque suos deserta per avia tutos,
 30 larga benignum semper indulgentia.
 31 Et validos merita prostravit clade tyrannos,
 32 larga benignum semper indulgentia.
 33 Stravit Amorrhaeum valida virtute Seonem,

34 larga benignum semper indulgentia.
 35 Stravit et incassum confisum viribus Ogum,
 36 larga benignum semper indulgentia.
 37 Metatusque novis agrum est utriusque colonis,
 38 larga benignum semper indulgentia.
 39 Isacidis habitare suis dedit hostica rura,
 40 larga benignum semper indulgentia.
 41 Qui nos in rebus miseros respexit egenis
 42 larga benignum semper indulgentia.
 43 Avertitque ferum nostris cervicibus hostem,
 44 larga benignum semper indulgentia.
 45 Qui genti vitam humanae victumque ministrat,
 46 larga benignum semper indulgentia.
 47 Astrigeros laudate Deum qui temperat orbes,
 48 larga benignum semper indulgentia.

PSALMUS CXXXVII. SUPER FLUMINA BABYLONIS ILLIC SEDIMUS etc.

P_5_31 v.1 Dum procul a patria maesti Babylonis in oris,
 2 fluminis ad liquidas forte sedemus aquas
 3 illa animum subiit species miseranda Sionis,
 4 et numquam patrii tecta videnda soli,
 5 flevimus, et gemitus luctantia verba repressit,
 6 inque sinus liquidae decidit imber aquae.
 7 Muta super virides pendebant nablia ramos,
 8 et salices tacitas sustinere lyras.
 9 Ecce ferox dominus, Solymae populator opimae,
 10 exigit in media carmina laeta malis,
 11 qui patriam exilio nobis mutavit acerbo,
 12 nos jubet ad patrios verba referre modos,
 13 quale canebamus steterat dum celsa Sionis
 14 regia, finitimis invidiosa locis.
 15 Siccine divinos Babylon irrideat hymnos ?
 16 Audiat et sanctos terra profana modos ?
 17 O Solymae, o adyta et sacri penetralia templi,
 18 ullane vos animo deleat hora meo ?
 19 Comprecor, ante meae capiant me oblivia dextrae,
 20 nec memor argutae sit mea dextra lyrae.
 21 Os mihi destituat vox, arescente palato,
 22 haereat ad fauces aspera lingua meas,
 23 prima mihi vestrae nisi sint praeconia laudis,
 24 hinc nisi laetitiae surgat origo meae.
 25 At tu (quae nostrae insultavit laeta rapinae)
 26 gentis Idumaeae tu memor este, pater.
 27 "Diripite, ex imis evertite fundamentis,
 28 aequaque," clamabant, "reddite tecta solo."
 29 Tu quoque crudeles, Babylon, dabis impia poenas,
 30 et rerum instabiles experiere vices.
 31 Felix qui nostris accedet cladibus ultor,
 32 reddet ad exemplum qui tibi damna tuum.
 33 Felix qui tenero consperget saxa cerebro,
 34 eripiens gremio pignora cara tuo.

PSALMUS CXXXVIII. CONFITEBOR TIBI, DOMINE, IN TOTO CORDE MEO etc.

P_5_32 v.1 Pectore te grato Dominumque Deumque fatebor
 2 coram superbis regibus,
 3 et tua facta canam.
 4 Ad tua templa oculis, animo ad tua numina spectans,
 5 nomen celebrabo tuum,
 6 perpetuamque fidem,
 7 qui promissa novis donis cumulata rependis,
 8 audis vocantem, robora
 9 das animo trepido.
 10 Te quacumque patet tellus circumflua ponto
 11 reges fatebuntur Deum,
 12 cum sine labe fidem
 13 audierint, ritusque tuos super aethera cantu
 14 ferent, tuaeque gloriae
 15 ad jubar attoniti.
 16 Nam liquidi quamquam trans ignea moenia mundi
 17 beatus in te permanes,
 18 attamen haud humiles
 19 despicias, elatosque premis. Discrimina mille
 20 passim mihi circumstrepant,
 21 te duce tutus ero.
 22 Tu valida obsistes dextra furialibus ausis
 23 qui me laccessunt hostium,
 24 incolumique dabis
 25 quod superest, si quid superest. Bonitate perenni,
 26 quo coeperas gradu tuae
 27 facta tuere manus.

PSALMUS CXXXIX. DOMINE, PROBASTI ME ET COGNOVISTI ME etc.

P_5_33 v.1 Momenta vitae nulla te latent meae,
 2 rector benigne caelitem.
 3 Seu sedeo, sive surgo, seu quid cogito,
 4 tu cuncta praesens adspicis.
 5 Lux sive curam, seu quietem nox tulit,
 6 curam et quietem temperas.
 7 Nec te minutae vocolae fugit sonus,
 8 quam lingua temere fuderit.
 9 Et os et humeros, totiusque corporis
 10 sic arte mira fabricam
 11 finxisti, acumen nullum ut humani ingeni
 12 ratiove possit assequi.
 13 Quonam ergo vultum fugero tuum ? Quibus
 14 clausus latebris occular ?
 15 Petamne caelum ? Praesto es hic. Ad inferos
 16 demergar ? Illinc non abes.
 17 Aurora curru me volucris ut deferat
 18 ad occidentis litem.
 19 Hic deprehendes me, nec hic tutus tuae
 20 vitabo fulmen dexterae.
 21 Incauta mens si forte secum cogitet,
 22 nox me tenebris occulet,
 23 obscura tenebris nostra nox luce est tibi

24 meridiana clarior.
 25 Tibi nec tenebrae sunt tenebrae, nec tuae
 26 nox ulla providentiae est.
 27 Arcana mentis tu tenes, qui pectoris
 28 arcana fabricatus es.
 29 Qui me parentis ventre conditum cutis
 30 tenello amictu involveras.
 31 Compago mira corporis nostri tuae
 32 miraculum est solertiae,
 33 stupenda cujus opera nec nostra assequi,
 34 sed nec negare mens potest.
 35 Nam nulla nostri tam minuta est corporis
 36 pars ut tuam scientiam
 37 fugiat, nec ulla claustra pectoris latent
 38 te conditorem pectoris.
 39 Massae recentis rudia adhuc primordia,
 40 rudisque massae semina,
 41 ceu scripta haberes, corporisque lineas,
 42 metum statumque noveras.
 43 Et membra nondum cum forent quid adderent
 44 dies sciebas singuli.
 45 Haec mente tacita cogitanti mihi stupor
 46 torporque sensus alligat,
 47 animus labascit cum tuae miracula
 48 perpendo mecum dexterarum.
 49 Citius inibo numerum, arenae in litore
 50 quot volvet aestus corpora,
 51 quamvis ocellis pervigil, numquam meis
 52 dulcem soporem indulsero.
 53 O quando perdes impios, rerum parens,
 54 o quando sanguinarios
 55 a me repelles, qui scelesti nomini
 56 et numini illudunt tuo ?
 57 Te quisquis odit, non ego odi ? Non tuos
 58 hostes habebam pro hostibus ?
 59 Odi profecto, nec tuis ex hostibus
 60 amicus est quisquam mihi.
 61 Revolve mentis intimos sinus, Deus,
 62 latebrasque nostri pectoris.
 63 Nisi hic amorem videris tui, nisi
 64 animus obsequi numquam pigrum,
 65 si par scelestis scelere sum, vitae parem
 66 da cum scelestis exitum.

PSALMUS CXL. ERIPE ME, DOMINE, AB HOMINE MALO etc.

P_5_34 v.1 Aeterne rerum conditor, a malae
 2 linguae veneno me bonus assere,
 3 meamque perjuri tuere
 4 hostis ab insidiis salutem,
 5 qui fraude tecta bella nefaria
 6 ciet, nec atris mitior anguibus
 7 vibratque linguam virulentam, et
 8 ore vomit rabido venenum.
 9 Averte fraudem, et me violentiae

10 hostis scelesti subtrahe, qui mea
 11 vestigia observat, scrobesque
 12 objiciens, laqueosque tendens.
 13 At tu, salutis praesidium meae,
 14 audi precantum. Tu Dominus mihi
 15 Deusque, tu me liberasti
 16 incolumem crepero e duello.
 17 Idem impiorum nunc bonus irrita
 18 fac vota, saevam frange superbiam,
 19 virusque linguae pestilentis
 20 in domini exitium refunde.
 21 Dejecta caelo flammea perfidos
 22 procella fundas praecipiti fuga,
 23 caecosque propellat profundas
 24 perpetui in barathri tenebras.
 25 Linguae loquacis perfida vanitas
 26 numquam quieto deget in otio,
 27 sed impie dignum patratis
 28 exitium domino parabit.
 29 At impiorum a vi Dominus suos
 30 et fraude vindex asserit, ut pii
 31 numen Dei praesens potensque
 32 perpetuo celebrent honore.

PSALMUS CXLI. DOMINE, CLAMAVI AD TE, etc.

P_5_35 v.1 Aurem vocanti da, parens, propere, meas
 2 audi preces salutifer.
 3 Cum verba fundo tristis, et puras manus
 4 attollo, sic preces meas
 5 manusque puras respice, ac si tureo
 6 odore mane te colam,
 7 ac si colam te victima et libamine
 8 sero rubente vespere
 9 freno coerce linguam, ad oris januam
 10 fac excubet custodia.
 11 Fac mens sequatur recta, fac in lubricam
 12 ne flectat erroris viam.
 13 Fac ne scelesto gaudeat coetu, neque
 14 mensa fruatur impia.
 15 Me malo justus increpet, me verberet,
 16 quam palpet impius, comam
 17 quam rore nardi spargat. Impii, precor
 18 et impiorum praesides,
 19 de rupis altae cum ruent specula, sui
 20 supplicia sceleris ut luant.
 21 Tum subeat animum conscium, salubriter
 22 quod me monentem spreverint.
 23 Sic mortis horror ossium compagine
 24 mihi laxat, ut caesae jacent
 25 fagi per arva fissa cuneis fragmina.
 26 Tu, sancte rector caelitem,
 27 spes una nobis es salutis, unicum
 28 agnoscimus te vindicem.
 29 Vitam tuere ab impiorum cassibus,

30 a fraude quam struunt mihi.
 31 Compos salutis impios fac in sua
 32 cernam ruentes retia.

PSALMUS CXLII. VOCE MEA AD DOMINUM CLAMAVI etc.

P_5_36 v.1 Invoco supplex Dominum, manusque
 2 tendo ad sidera supplices.
 3 Mentis huic pando lacrimas, querelis
 4 imploro miseris opem.
 5 Pectus afflictum dolor obruebat,
 6 quamvis, rex bone caelitem,
 7 puriter vitae mihi tu peractae
 8 esses arbiter optimus.
 9 Cum domo gressum tamen efferebam,
 10 tendebant mihi retia.
 11 Nec mihi notus, nec amicus usquam,
 12 quoquo lumina verteram ;
 13 exitus nusquam, fuga nulla, nemo
 14 qui me sospite plauderet.
 15 Ergo te, rerum pater, invocavi,
 16 unum praesidium in malis,
 17 tu meae vires, mea spes opesque,
 18 dum sedes hominum colo.
 19 Da meis aurem facilem querelis,
 20 fracti cladibus ultimis
 21 assere a saevi manibus tyranni,
 22 qui me fortior opprimit.
 23 Carceris vitam rape de tenebris,
 24 ut te laudibus efferam,
 25 teque conventus celebret piorum,
 26 promptum ferre piis opem.

PSALMUS CXLIII. DOMINE, EXAUDI ORATIONEM MEAM etc.

P_5_37 v.1 Audi vocantem rebus in asperis,
 2 et lenis aurem da precibus meis,
 3 rerum creator, quaque soles fide
 4 et aequitate ex hostibus eripe.
 5 Juris severi ne trutina meam
 6 expende vitam. Nemo hominum innocens
 7 sic est, tribunal possit ut ad tuum
 8 se profiteri crimine liberum.
 9 En hostis atrox imminet, et premit
 10 stratum. Tenebris tristibus abditus,
 11 et lucis exsors dego, velut specu
 12 quos in sepulchri mors fera condidit.
 13 Mens paene curis obruta volvere
 14 priora coepit tempora, cum patres,
 15 spes quos fovebat prasidii tui,
 16 de fauce leti saepe revelleres.
 17 Hac recreatus rursus imagine,
 18 imploro supplex auxilium tuum.
 19 Intenta mens te respicit, arida

20 tellus ut imbres sub cane torrido.
 21 Non lentus audi, nam mihi spiritus
 22 vix fessa pulsat pectora. Si tui
 23 avertis oris lumen amabile,
 24 mors atra siccis faucibus imminet.
 25 Spe mens labores auxilii tui
 26 fert. Spectat unum te, pater optime.
 27 Audi precantem lenis, et exitum
 28 jamjam obruturis pande periculis.
 29 Ab hoste saevo protege me, meae
 30 custos salutis. Prava repellere
 31 mentem manumque, et recta capessere
 32 doce, unicum te qui veneror Deum.
 33 Arcana fac vis numinis ut tui
 34 per plana gressum dirigat, ut tua
 35 mandata secter, neu male credulum
 36 error malorum vertat in orbitam.
 37 Ut nulla numen non celebret tuum
 38 et aequitatem natio, recrea
 39 me destitutum praesidio, et malis
 40 hostis scelesti libera ab artibus.
 41 Favoris umbra me solita tege,
 42 et, qui me acerbis usque doloribus
 43 affligit, hostem perde nefarium,
 44 servumque serva perpetuo tuum.

PSALMUS CXLIV. BENEDICTUS DOMINUS MEUS etc.

P_5_38 v.1 Quo te, rex hominum, carmine prosequare ?
 2 Qui firmas animum robore, qui manum
 3 et bellare doces et dubii regis
 4 per discrimina proelii.
 5 Quod vivo et valeo, tutus et hostium
 6 a fraude, eximia fulgeo gloria,
 7 quod late validis impero gentibus,
 8 totum muneris id tui est.
 9 O rerum genitor, quantulus est homo,
 10 hac quem prosequeris munificentia,
 11 et curas patria sollicitudine !
 12 Figmentum fragilis luti,
 13 quo nec bulla levis vanior est, neque
 14 quae mentes agitant somnia turbidas,
 15 nec serum fugiens umbra crepusculum,
 16 nec fumi volucris vapor.
 17 Caeli pande fores, rex bone caelitem,
 18 ac de sidereis labere sedibus.
 19 Montes nube operi, per liquidi aeris
 20 campos fulgura trajice.
 21 Turbatos trepida sparge fuga impios,
 22 et sparsos jaculis perde sequacibus,
 23 porrectaque manu me, pater optime,
 24 saevis eripe fluctibus.
 25 Hostis pelle malam vim bonus impii ;
 26 linguae vaniloquae reprime toxica,
 27 assuetaque dolis pestiferis manus

28 vires contere viribus.
 29 Ut te nostra novo carmine barbitos
 30 dicat, subsidio qui recreas tuo
 31 reges, qui gravibus saepe periculis
 32 vitam Davidis eripis
 33 hostis pelle malam vim bonus impii.
 34 Linguae vaniloquae reprime toxica,
 35 assuetaeque dolis pestiferis manus
 36 vires contere viribus.
 37 Natorum soboles crescat, ut ubere
 38 surgit silva solo laurea. Virgines
 39 cultu sic niteant, ut laquearibus
 40 templorum tholus aureis.
 41 Stipentur gravidis horrea frugibus,
 42 pleno cuncta penu copia suggerat.
 43 Fecundi pecoris non capiant greges
 44 latis pascua saltibus.
 45 Pingues plaustra boves et nitidi trahant,
 46 nec tristi resonent compita classico,
 47 nec fletu plateae, nec furor hosticus
 48 clausis affremat oppidis.
 49 Felicem populum, inter bona talia
 50 qui vitam in tacito transigit otio.
 51 Felicem populum ter quater, omnium
 52 cui rerum pater est Deus.

PSALMUS CXLV. EXALTABO TE, DEUS MEUS REX etc.

P_5_39 v.1 Te regem Dominumque canam, dum lucida volvet
 2 lucidus astra polus,
 3 et unicum colam Deum.
 4 Luce canam te, nocte canam te. Nulla carebit
 5 laudibus hora tuis,
 6 rerum creator et salus.
 7 Magne parens, nullo cui clausa potentia fine est,
 8 saecula cuncta tuas
 9 laudes sonabunt, et patres
 10 longaevi tua facta canent, seraque nepotum
 11 per seriem soboli
 12 prodent, nec aetas gloriam
 13 nesciet ulla tuam. Mirandaque facta decusque
 14 ille memor referet,
 15 hic magnitudinem canet,
 16 ille bonum feret et justum, et placabilis irae
 17 et veniae facilem, et
 18 larga benignum dextera,
 19 totque inter decora, et laudum praeconia nullo
 20 emoritura die,
 21 nil clarius clementia.
 22 Ergo, parens rerum, stellantis machina caeli
 23 cuncta suo gremio
 24 complexa praedicat tuum
 25 robur, et intacti scelerum contage nefanda
 26 te celebrant alacres,
 27 tuique vires imperi

28 per populos late vulgant, ne nescia sceptri
 29 terra sit ulla tui,
 30 et gloriae et potentiae.
 31 Imperium sine fine tibi, nec legibus aevi
 32 subdita sceptrum tenes,
 33 aut clausa metis temporum.
 34 Tu lapsos rursum attollis, firmasque labantes,
 35 incolumesque foves
 36 vitae beatae commodis.
 37 Te volucrum pecudumque genus, te saeva ferarum
 38 saecula respiciunt
 39 unum, suoque tempore
 40 accipiunt victum. Tu dextram pandis, et omne
 41 de locuplete penu
 42 animal benigne recreas.
 43 Quicquid agis, justeque et sancte agis. Impiger aurem
 44 supplicibus facilem
 45 praebes, opisque compotes
 46 dimittis puro qui pectore cumque precantur,
 47 auxilioque piis
 48 praesens es, et periculis
 49 eruis e cunctis qui te venerantur amanti,
 50 cumque suo scelere
 51 a stirpe vellis impios.
 52 Ergo omnes te jure canent, nomenque tacebit
 53 natio nulla tuum
 54 in saeculorum saecula.

PSALMUS CXLVI. LAUDA, ANIMA MEA, DOMINUM etc.

P_5_40 v.1 Te, magne rerum conditor, et tuas
 2 sonabo laudes, factaque posteris
 3 miranda prodam, dum recurret
 4 per calidos mihi sanguis artus.
 5 Securitatem ne stabilem tibi
 6 promitte, regum praesidio, neque
 7 de stirpe mortali et caduca
 8 pone tibi columen salutis.
 9 Ut membra liquit spiritus, in suam
 10 terrena moles terram abit, et diu
 11 consulta vanescunt, et auras
 12 irrita per vacuas feruntur.
 13 O ter beatum, quem Deus aetheris
 14 fido tuetur praesidio, suas
 15 qui spes opesque omnes in uno
 16 constituit Domino Deoque,
 17 qui terram et aequor condidit et polum,
 18 et quicquid aequor terraque continet
 19 polusque, qui promissa praestat
 20 perpetuo stabilis tenore.
 21 Qui nec tyranni vi sinit opprimi
 22 infirmiore, aut esurie premi,
 23 qui carcerum exemptos tenebris
 24 compedibus levat innocentes.
 25 Qui nocte pulsa luminis aurei

26 caecis refundit luminibus jubar,
 27 gressusque firmat claudicantes,
 28 justitiamque amat aequus aequam.
 29 Cura fideli qui fovet advenam,
 30 orbae marito qui viduae favet,
 31 orbos puellos qui tuetur,
 32 et scelerum labefactat artes.
 33 Rex ergo habenas imperii tuus,
 34 Sion, tenebit, sidera dum polum
 35 pingent, et obliquum per orbem
 36 sol rutilos agitabit axes.

PSALMUS CXLVII. LAUDATE DOMINUM, QUONIAM

P_5_41 v.1 Eia, Deum laudate, Deo date carmina digna.
 2 Certa erudito dignus ille est carmine
 3 qui Solymam instaurat rursus, passimque per orbem
 4 sparsos reducit exsules Abramidas ;
 5 qui fractos animi levat, et corda anxia lenit,
 6 mulcet dolores, mitigatque vulnera ;
 7 qui numerat tacito labentia sidera mundo,
 8 suisque quaeque nuncupat vocabulis ;
 9 magna Dei virtus, immensa potentia, nulla
 10 quam lingua fari possit, aut mens cogitet ;
 11 qui mite ingenium fovet, allevat, auget honore,
 12 humique sternit impiam superbiam ;
 13 eia Deum cantate, Deo persolvite grates,
 14 grato benignum canite patrem barbato ;
 15 qui caelum obnubit tenebris, terram rigat imbres,
 16 montesque laeto vestit altos gramine ;
 17 qui pecudum genti larga dat pabula dextra,
 18 corvoque victum se roganti sufficit ;
 19 quem neque magnanimum delectat robur equorum,
 20 nec vis ferocis aut lacertus militis,
 21 sed pietas animi simplex, et in illius una
 22 quae spem salutis collocet clementia.
 23 Eia, Dei laudes Solymaeae pangite turres,
 24 benignitatem mons Sionis praedica,
 25 qui portarum aditus claustris firmavit ahenis,
 26 civesque cunctis commodis auxit tuos ;
 27 qui te pace beat laeta, et defendit ab hoste,
 28 et messe flava tritici campos tegit ;
 29 cujus ad imperium fundit sua munera tellus,
 30 natura cujus prompta paret jussibus.
 31 Qui nivibus celsos operit, ceu vellere, montes,
 32 densas pruinas cineris instar dejicit,
 33 et glacie lapsus solidarum frenat aquarum,
 34 cujus rigorem quis feret mortalium ?
 35 Cum libuit, molles glacies tabescit in undas,
 36 adspirat aura mitior, rivi fluunt,
 37 ostenditque suam per signa illustra mentem,
 38 legesque Abrami tradidit nepotibus.
 39 Non ita se populis aliis monstravit amicum,
 40 qui scita legum nesciunt caelestium.

PSALMUS CXLVIII. LAUDATE DOMINUM DE CAELIS etc.

P_5_42 v.1 Laudate Dominum caelitem,
 2 chori beati, qui procul
 3 contagio mortalium
 4 templa aetheris tuemini.
 5 Laudate Dominum, quos sibi
 6 adesse jussit angelos,
 7 laudate Dominum exercitus
 8 parere prompti jussibus.
 9 Laudate Dominum, qui diem
 10 sol, luna noctem illuminat,
 11 laudate Dominum, lucidis
 12 stellae decorae flammulis.
 13 Laudate eum rotatiles
 14 tot orbium compagine,
 15 et unda longe celsior
 16 campis nitentis aeris.
 17 Huic cuncta laudes dicite,
 18 numenque cuncta pangite,
 19 quod cuncta nutu condidit,
 20 et cuncta nutu sustinet,
 21 fixitque firmo cardine,
 22 ne vi senectae corruant,
 23 certisque vinxit legibus,
 24 quas transgredi non audeant.
 25 Laudate Dominum, sub specus
 26 terrae dracones abditi,
 27 et vasta cete, qua sinus
 28 ponti repostos finditis.
 29 Ignes, nives, et grandines,
 30 vaporque, et aerae spiritus,
 31 ad jussa Domini mobiles
 32 circumrotantes turbines,
 33 colles feraces, et feri
 34 montes, et omnes arbores,
 35 seu montibus rigescitis,
 36 seu cultibus mansuescitis,
 37 mites feraeque bestiae,
 38 humique lente reptiles,
 39 et quae liquentes aeris
 40 campos volando carpitis,
 41 reges et orbis praesides,
 42 et nationes liberae,
 43 et pauperi plebeculae,
 44 qui jus ab alto dicitis,
 45 et vos, juvena florea
 46 laeti puelli et virgines,
 47 senesque vitae in ultimo
 48 jamjam exituri limine,
 49 laudate Dominum. Numini
 50 sit ejus uni gloria,
 51 unumque noscat omnium
 52 caelum solumque principem.
 53 Hunc omne in aevum laudibus

54 propago tollat Isaci,
 55 sibi dicatam qui bonis
 56 gentem beavit omnibus.

PSALMUS CXLIX. CANTATE DOMINO CANTICUM NOVUM etc,

P_5_43 v.1 Cantate Domino canticum
 2 novum, sonet laus illius
 3 coetus per omnes qui sacris
 4 non se profanis polluunt.
 5 Oblectet Isaci genus
 6 auctore se suo, suo
 7 regi Sionis arduae
 8 congratulentur filiae.
 9 Nomen celebrent illius
 10 laetis choris et tympanis,
 11 ejusque laudes accinant
 12 blande canoro pectine.
 13 Gentem bonus parens suum
 14 amore sancto amplectitur,
 15 mitemque mansuetudinem
 16 firmat salute immobili,
 17 coetus piorum ut gestiant
 18 foris paratu splendido,
 19 domique secum clanculum
 20 laetenter in cubilibus.
 21 In ore, rerum praesidis
 22 laus continenter personet,
 23 utrimque acuti in dexteris
 24 vibrentur enses vindices.
 25 In se ferarum ut gentium
 26 crudelitatem vindicent,
 27 et in futurum iras, minas,
 28 superbiamque comprimant.
 29 Reges suorum ut hostium
 30 artis catenis alligent,
 31 et ferreis coerceant
 32 vinclis feroces principes,
 33 poenas secundum caelitus
 34 praescripta ab iis ut exigant,
 35 et laus piorum pervolet
 36 omnes per orbis cardines.

PSALMUS CL. LAUDATE DOMINUM IN SANCTIS EJUS, etc.

P_5_44 v.1 Laudate Dominum, lucidum
 2 templum colentem siderum,
 3 qui vi suae potentiae
 4 firmavit orbis cardines.
 5 Laudate Dominum fortiter
 6 ubique gestis inclytum,
 7 laudate magnitudinem
 8 captum supra mortaliū.
 9 Laudate Dominum bellicae

10 claris tubae clangoribus,
11 laudate Dominum nabliis,
12 lyrisque blande garrulis.
13 Laudate Dominum tympanis,
14 chorique festi cantibus,
15 laudate Dominum fidibus, et
16 sonore dulci tibiae.
17 Laudate eum tinnitibus
18 laetis canori cymbali.
19 Hunc cuncta laudent, quae trahunt
20 vitalis aurae spiritum.